



أول مرة أسافر لوحدني..
 صحيح طريق صلاح سالم كان فاضي عشان الساعة ٤ الفجر، لكن
 المطار نفسه كان زحمة جدًا وفيه أجواء شبه احتفالية، ابتسامة خفيفة على
 وش اللي مسافر ونظرة لهفة وحنين في عيون كل اللي راجعين.
 المطار مكان له طبيعة خاصة. ليا صديق كان دايبا يقول إن أرض المطار
 شهدت على دموع حب وأحضان صادقة أكثر من اللي شافتها قاعات
 الأفراح ودور المناسبات، جايز عشان فيه ارتباط وثيق بين لحظات الوداع
 والمشاعر الحقيقية.

جايز ما بنحسش بقيمة الحاجة غير وإحنا بنسيبها..

جايز ما بنحسش بقيمة حاجة خالص..

جايز ما بنحسش تماما..

يمكن أنا مش عارفة مسافرة ليه لكن عمري ما كنت متأكدة من قرار
 زي ما أنا متأكدة من قرار السفر المرة دي، ممكن يكون ده أول قرار شجاع
 أخده في حياتي.. ممكن يكون ده أول قرار حقيقي في حياتي عموما.

أنا قررت أسافر..

أنا عاوزة أسافر..

فيه قوة خفية بتقول لي أسافر البلد دي، في التوقيت ده، وأركب الطائرة
 دي..

- ناسية حاجة؟ معاكي شاحن الموبايل والكاميرا؟

رديت بدون تفكير: «معايا يا أمي»

- فرشة سنانك؟

- معايا.
 - شراياتك، بيعجاماتك؟
 - معايا. اطمني يا أمي أنا مش ناسية حاجة. مانسيتش حاجة خالص.
 - سكنت شوية وبصت بعيد وبعدين لفت بوشها وسألتني بنبرة صوت
 كلها قلق: «وناوية تقعدني قد إيه؟»
 - لسه مش عارفة، شهر مثلا أو شهرين. أنا مش هاقعد المدة كلها في
 مكان واحد، عاوزة أتفسح، أستجم، أشوف كل المدين، أكل كل حاجة،
 أغني، أرقص!
 - على فكرة خالتك زعلانة جدا إنك مش هتقعدني عندها.
 - ماتقلقيش، هاقعد كام يوم في الأول معاها وهاصالحها بالسبوسة.
 - مش عارفة إيه سر حبها في السبوسة؟ إنتي متأكدة إنها مغربية ومش من
 شبرا؟
 ضحكت وهي بتبص على الطيارات من ورا الإزاز في الكافيتريا،
 وسألتها:

- حطيتها فين صحيح؟
 بطلت تضحك ووشها اتغير زي ما أكون فكرتها إني مسافرة وقالت
 لي: «إيه؟ أه، حطيت السبوسة في شنطتك الكبيرة على الوش»
 - على الله بس ماتقفش بيها. هو المصري كده دايمًا بظنه فاضحاه، يتفش
 في المطار فيلاقوا معاه ملوخية، رنجة، بسبوسة!!

*على السادة المسافرين على متن الطائرة رقم ٦١٩ المتجهة إلى الدار
 البيضاء التوجه إلى...*

- هتوحشيني يا أمي.. ادعيلي
 - ربنا يحب فيكي خلد.. أقصد ربنا يريح بالك يا بتي ويجعل لك في
 كل خطوة سلامة.
 - وأنا اللي باقول على خالتي مغربية من شبرا؟ طلعت أختها أصلا من
 الحلمية! هتوحشيني يا ست الكل، هاتي بوسة، سلام، سلام.

سلمت على ماما وخذت شنطتي ووقفت في الطابور عشان أكمل باقي الإجراءات. بصيت لها من بعيد وهي ماشية بالراحة لوحدها.. جزء مني

كان رايع معاها وساييني.
كان عندي أمل كبير أرجع من السفرية معايا إجابات للأسئلة الكثير اللي في دماغني عشان مابعدش عنها تاني أبدا.. ماكتتش عارفة أحدد إحساسي في اللحظة دي إيه.. إحساس بين الغربية والسلام.. بين الوحشة

والونس، الدوشة وتضارب الأفكار مع صمت غريب.
طلعت الطائرة وفضلت أبصر على أرقام الكراسي لحد ما وصلت عند الكرسي اللي عليه رقم تذكرتي، كرسي عظيم جنب الممر، ومن غير ما أفكر قعدت جنب الشباك. كنت عارفة إنه مش الكرسي بتاعي، لكن الطفل اللي جوايا كان شيطان يقعد جنب الشباك لحد ما (عمو) صاحب الكرسي

بيجي ويقومني.
قلعت الموبايل وحطيته في الشنطة هو وجواز السفر والدفترا الأزرق اللي باكتب فيه الخواطر، ربطت الحزام وتفحصت المكان بعناية، عملت كل حاجة ممكن تتعمل والطيارة لسه واقفة. وبعد ٢٠ دقيقة من السكون غير المبرر قررت أسأل. ندهت للمضيفة وسألتها: «لو سمحتي.. هو إحنا مستنيين إيه؟» قالت لي: «Sorry يا فندم.. بس آخر راكب كان متأخر؛ هو خلاص بيعمل Boarding دلوقتي»

ماكتتش مصدقة إن ثقافة (الميكروباص) المصرية الأصيلة وصلت لحد شركات الطيران كمان.. واضح إن حتى (الطيارة) ماينفعلش تطلع غير لما الطيار (يحمل)!

طلعت الموبايل تاني وحطيت الساعات في ودي وشغلت مزيكا هادية ل(عمر خيرت) وبصيت من الشباك على منظر شروق الشمس البديع، آخر شروق هاشوفه في القاهرة قبل رحلة لسه مش عارفة مدتها قد إيه. حسيت بحركة في الكرسي اللي جنبي، شلت الساعة من ودي ولفيت وشي لقيت راجل طويل وعريض لابس قميص أبيض وبنطلون جينز واقف في ممر الطائرة ويحط شنطة على الرف اللي فوق الكراسي في الحطة اللي أنا قاعدة فيها، استتجت إنه أكيد صاحب الكرسي اللي جنبي اللي أنا حاليا قاعدة

فيه، ماكتش شايفة وشه لكن كنت متأكدة إنه مش هيكون مبسوط قوي
 لما يعرف إني (احتليت) الكرمي بتاعه.
 - ماعلش أنا آسفة، أخذت كرسيك. أنا ها قوم حالا، اتفضل.
 رد عليا ولسه وشه مش باين من الشنطة اللي شكلها كبيرة على الرف
 ومش راضية تدخل بسهولة وقال لي بصوت واثق وهادي:
 - لا لا خليك، أنا عارفك طول عمرك بتحبي تقعدني جنب الشباك.

- نعم؟؟
 - كنت فاكر إنك هتعرفيني من صوتي، أنا شايفك من ساعة ما دخلت
 من باب الطيارة.

- مين؟ يا نهار أبيض! مش معقول ده بجد؟؟ إيه الصدفة دي؟
 - ده بجد أبوه. عاملة إيه يا بنتي؟
 - تمام! إنت إزيك؟ بقالنا قد إيه ماتقابلناش؟ سنتين؟ ثلاثة؟
 - لأ تسعة. إحنا بقالنا تسع سنين ماتقابلناش. تخيلي؟

- يا الله، بس انت.. انت اتغيرت قوي، للأحسن.. للأحسن قوي
 بصراحة يعني! متأكد مش عاوز تقعد في كرسيك؟

- لا لا خليك زي ما انتي، أنا أصلا ما باحبش أقعد جنب الشباك، الله
 يجازيها بقى السكرتيرة هي اللي حجزت لي، وبينني وبينك أنا أول ما الطيارة
 بتحرك بانام. انتي بقى ماتغيرتيش خالص، لسه حلوة زي ما انتي.

- إحم. أه.. إنت مسافر تنفسح؟
 - لأ شغل.. عندي مؤتمر ٤ أيام.
 - أول مرة تروح المغرب؟
 - أبوه. لكن انتي أكيد مش أول مرة، أنا عارف إن طنط مغربية. هي
 عاملة إيه صحيح؟

- كويسة. بقت مصرية خالص، بقالها فوق الـ ٣٠ سنة في مصر
 - سلميلي عليها أول ما ترجعي. وماتنسيش زي كل مرة!
 - غالبا انت اللي هتسلم لي عليها المرة دي عشان انت هترجع مصر قبلي.
 - ليه؟ هتقعدني كتير؟

- يعني، شهر.. اتنين.. لسه مش عارفة.

- هو إنتي سبتي الشغل ولا إيه؟

- كنت باشتغل لغاية إمبراح..

- تقاعد مبكر؟

- لأهدنة أو ممكن تسميها أزمة (منتصف العمر).

* حضرات السادة الركاب أهلاً ومرحباً بكم على متن الطائرة..*

- باقول لك إيه، بتعرفي تعومي؟

- أيوه طبعاً.

- كويس، عشان لو الطائرة وقعت في البحر تنقذيني.

- ده انت داخل على طمع بقى اكل ده عشان سببتني أقعد جنب الشباك؟

- طول عمرك جميلة ودمك خفيف.. يلا كل شيء نصيب. سيبك

- انتي، أنا النهارده فعلاً مبسوط.. مبسوط جداً.. كفاية الصدقة اللي جمعنتي

بيكي.. فاكرة واحنا صغيرين لما كنتي بتعملي شعرك ديل حصان وكانت

مامتك بتعملك (قصة) كده؟ كنتي شبه فيروز الممثلة.

- فاكرا انت لما طلع لك شنب إعدادي الرذل ده وباباك اتخانق معاك لما

حلقتة؟

- آه طبعاً، طيب فاكرة لما كسرتلك العروسة العجيبة بتاعتك وقعدتي

تعيطي؟ كان اسمها إيه؟ (كرنبه) باين؟

- فاكرا لما كنت قارفنا بالأتاري اللي عمك جابهولك من السعودية؟؟

- ياااه.. إيه الأيام دي! ماتغيرتيش.. لسه زي ما إنتي. يا ترى لسه

بتعيطي؟

- للأسف لأ، بقيت ناشفة قوي، الدنيا خلتنني أقوى من أي حاجة

ممكن تخليني أعيط. بقيت زي النخلة، الهوا بيحركها وممكن يخليها تفضل

تميل لكن مايجيبهاش نصين، النخلة يوم ما بتقع على الأرض بتنزل حته

واحدة.

- برضو شايف فيكي طفولة متدارية ورا كلامك ده كله، مهما حاولتي

تقنعيني، هافضل شايفك البنوة الصغيرة أم (ديل حصان) و(قصة)،

صدقيني أحسن حاجة إن الواحد يفضل طفل من جواه، يعيط بصرخ يلعب ومايسبب حد آذاه أو جرحه يغير من طبيعته وفطرتة.
 - فعلا.. لازم الواحد يفضل أهبل ويعيش طول عمره ياخذ على قفاه.
 - وإيه اللي فيها لما الإنسان يفضل طفل ويفضل عنده شوية هبل؟
 - عارف فيلم (The eternal sunshine of the spotless mind)؟
 - عارفه، وعارف كمان إنه من أكثر الأفلام اللي بتحببها.
 - ده انت ذاكرتك قوية بقى. المهم بخصوص الفيلم ده، ساعات يبقى نفسي أنسى سنين كاملة في حياتي.. أنساها كلها باللي فيها.
 - إشمعنى؟
 - فيه حاجات عبيطة كثير الواحد عملها ماكانش ليها أي لازمة.

- زي إيه؟
 - زي السفريات الحلوة اللي الواحد لغاها في آخر لحظة عشان نشترى بالفلوس حاجات مادية ماهاش معنى وضيع على نفسه لحظات سعادة، زي التليفون اللي مابتدش عليه بدون أي سبب منطقي وبتضيع على نفسك قعدة ولمة حلوة، زي الصداقة اللي مسكت فيها مع إنها بتشدك وقصة الحب اللي أخلصت فيها وكنت كويس جدا وفي الآخر طلعت حمار كبير بديل.

- الله يحفظك!

- آسفة مش قصدي.

- ولا يهملك. أنا معاكي في اللي بتقوليه لكن مش صح إن الواحد ينسى، حتى لو يقدر وفي إيدته الاختيار. لو كل واحد عمل حاجة غلط، داس على زرار ونسيها ماحدث هيتعلم. الغلط بيعلمنا.
 - جازي الغلط بيعلمنا لكن بعد ما بيكون علم علينا.

* نحيط سيادتكم علما أنه يوجد بالطائرة أربعة مخارج للطوارئ.
 * يوجد..*

- ماقلتيليش صحيح، هتعملي إيه في الهدنة دي؟ عندك أي خطط للسفيرة؟

- عندي، بس مش خطط خطط يعني، أصلي رايحة (أدور) على حاجات كثيرة.

- زي إيه؟

- (زي إيه؟) سؤال حلو، سؤال حلو فعلا بس يا ريت كل الأسئلة القصيرة من نوعية (زي إيه؟)، (ليه؟) و(إزاي؟) كان لها إجابات قصيرة زيبا. مافيش حاجة تتحكي قوي، كل الموضوع إن كل الأحداث في الفترة الأخيرة من حياتي وصلتي إني أسأل نفسي ٣ أسئلة بالضبط وأدورهم على إجابة.

- ووصلني؟

- دي حكاية طويلة قوي.

- ولو حتى حكاية طويلة، ماتحكي لي إحنا ورائنا إيه؟

- فاضي قد ٣ أو ٤ أيام؟

- مش متأكد إني هاكون فاضي ٤ أيام كاملين عشان المؤتمر والشغل، بس متأكد إني فاضي الخمس ساعات الجاين مسافة السكة وانتي مضطرة تسحلميني وتكلمي معايا باعتباري جارك الوحيد هنا أو تفضلي باصة من شبك الطائرة ودي حاجة مانصحش بيها لأننا دقايق من دلوقتي وهنقى فوق السحاب فمش هتشوفي حاجة غير أبيض في أبيض.

- أسباب منطقية وأسلوب عقلاني ومقنع جدا.

- ده غير إن فيه سبب عاطفي كمان. بما إني ماقابلتكيش من سنين وأفتكر زمان كنا قرييين من بعض جدا فلازم تحكي لي إيه اللي حصل لك وأنا مش موجود. احكي لي بقى احكي لي.

- احكي؟؟ طيب والله فكرة، ليه لا؟ اسمع يا سيدي، هاحكيلك حدوتة بدأت من حوالي ٥ شهور.. بس ركز معايا عشان ماباحش الأسئلة الكثير، انفقنا؟

- انفقنا.. احكي.

* حضرات السادة الركاب، برجاء ربط الأحزمة *



كان يوم الجمعة.. أول جمعة بعد رمضان.. صحيت بدري من غير منبه،
صليت وحمدت ربنا إنه اداني يوم جديد أعيشه.. فطرت ونطيت في جينز
وتيشيرت عليه (باتمان) وضربت نظارة الشمس. سلمت على ماما
وبُست راسها وأخذت دعوة كل يوم:
«روحي يا بنتي.. ربنا يحب فيكي خلقه»

نزلت من البيت بحماس شديد، الهوا كان جميل والشمس كانت
طالعة.. أول يوم جمعة بعد رمضان يعني مافيش شغل، والشوارع فاضية..
مش فاضية بس، لأ.. دي سوبر فاضية!! كل الناس ضربوا أجازة العيد
مع weekend إلا أنا. أصل هاسافر ليه وأنا ممكن أعمل - إحم - (دماغ)
هنا في القاهرة؟

أنا مستنية اللحظة دي من أول رمضان وأهي فرصة (أتشاقى) شوية
بقي، ولا أنا ماليش نفس يعني؟؟

خرجت من باب العمارة في طريقي للجراج، عدت قدام ست وراجل
واقفين بيتكلموا بصوت عالي وبيزعقوا لبعض، الست أول ما شافتني
شاورت عليا وقالت للراجل: «يعني انت عاوز واحدة شكلها إيه يا
أسامة؟ عاوز واحدة زي دي؟»

يا فتاح يا عليم!! استهدي بالله يا ست مش كده! أنا طبعا عملت
نفسي مش واخدة بالي؛ بصراحة كنت منتشية ومش عاوزة حد يعكر صفو
الساعة دي عليا. طلعت بالعربية وفي أقل من ربع ساعة كنت وصلت
قدام المكان. ضربات قلبي بدأت تزيد، بصيت يمين وشمال قبل ما أركن
عشان أتأكد إن مافيش حد هيطلعي من تحت الأرض. اليوم ده بالذات
ماكتش عاوزة حد يشوفني ولا عاوزة أشوف حد، كنت عاوزة أفضل في
الحالة دي لغاية ما أخلص اللي جاية أعمله وأمشي من سكات.

قفلت العربية ودخلت المكان بهدوء. بصيت عليه من بعيد لقبته
موجود، وقفت قدامه وابتسمت وقلت: «صباح الخير. إزيك؟»

بصلي بسعادة وقاللي: «صباح الفل! حمد الله على السلامة»

- الله يسلمك. باقول لك إيه، الحقني بسرعة.

- زي كل مرة ولا نجرب حاجة جديدة؟

جاويت بدون تفكير: «لا أنا ماباغيرش يا إسلام، ما إنت عارفني».

كراميل مكياتو»

أيوه أنا مدمنة قهوة!! ومش أي قهوة، أنا مدمنة (كراميل مكياتو) من ستاربيكس. المكان ده بالذات فيه حاجة، أو مافيهوش، لكن إحنا دايبا بنبرر جنبنا الغير ممنطق للناس والأشياء بإن (فيها حاجة)، حاجة إيه؟ ماحدث عارف.

قعدت جنب الإزاز باشرب المكياتو وأبص على الشارع واستغرقت في تفكير عميق خلاني أعمل في دماغى حسبة بسيطة. أنا باشرب قهوة من ستاربيكس بقالي ٦ سنين بمعدل ثلاث مرات في الأسبوع.. كل مرة بادفع ٣٠ جنية مثلا.. نضرب ثلاثين في ثلاثة في اثنين وخمسين أسبوع في السنة في ستة يعني أنا دفعت أكثر من ثمانية وعشرين ألف جنيه على قهوة بلبن في كبايات كرتون على مدار ٦ سنين!! ثمانية وعشرين ألف جنيه!!!

قلت لنفسى، مش كان زمانك جبتي شقة في (حدائق أكتوبر) اللي بيعلنوا عنها في التليفزيون ولا غيرتي عربيتك. فالحين بس يحذرونا من مخاطر إدمان المخدرات مع إن فيه أنواع تانية خالص من الإدمان، قانونية ومشروعة.

فضلت قاعدة وباصّة على مج المكياتو اللي جاي بعد شوقه، مستمتعة وباشرب كل (بق) بأداء سينمائي زي - الله يرحمه - توفيق الدقن وهو بيقرّب الكونياك عشان ينسى!

شوية وضربت عيني على التراييزة اللي جنبى، كان فيه بنت صغيرة ماتزيدش عن ٢٢ سنة، جميلة ورقيقة، قاعدة مع شاب شكله أكبر منها نسبيا وماسكة إيده بحنان، بتبصله وهاتك يا رغبي، لكن مش دي المشكلة. المشكلة إن أثناء ما هي بتعمل كده، البرنس بسلامته محتاس ومسحول في ١٠٠ حاجة. شوية يمسك الموبايل يبص فيه وهي ماسكة إيده، بعد كده قعد يتفرج على اللي رايع واللي جاي وهي لسه ماسكة إيده، بدأت أتوتر وكان هاين عليها أقوم أديله بلحة في وشه جايز يتعدل. بعدها بشوية وعشان أتقط زيادة، بدأ (النوس) يبص في الساعة وهي برضو ماسكة إيده! في اللحظة دي فقدت أعصابي تماما وجزيت على سناني وبدأت أزووم

وأزجج ولا أجدعها كلب بوليسي. وقبل ما أنطلق وأهجم عليه أجيبه من وشه، قلت في عقل بالي: «خليكي في حالك يا بت واشربي المكياتو وقومي امشي» وفعلنا مشيت وفيه كلام كثير قوي محشور في زوري. لو كان في إيدي ريموت كنت وقلت المشهد ده وثبت الصورة عليهم ورحت خدت البنت الرقيقة دي من إيدها وقتلتها ابعدى خطوة وبصي على الصورة الكبيرة من براء، كنت هاقول لها فيه حاجة غلط، إنتي تستاهلي أحسن من كده، تستاهلي الأحسن.

كنت هاقول لها: «صدقيني يا بتي في مكان ما، على وجه هذا الكوكب الحزين، شخص هيكون متحمس لعلاقتكم أكثر من كده وهيبحك للدرجة اللي تخليه يبص في عينيكي وانتي ماسكة إيده مش في الموبايل» المهم، ركبت العربية وقعدت ألف شوية وأفكر. فكرت كثير فيا وفيها وفي البنات الأصغر مني والأكبر. هو ليه فيه بنات عارفة قيمة نفسها وبنات مش عارفة الألف من - لامؤاخذة - كوز الدرلة؟

الجماعة الأمريكية عندهم مصطلح اسمه البنات الـ (High Maintenance) ومصطلح تاني اسمه البنات الـ (Low Maintenance) النوع الأول هو نموذج للبت اللي مايبعجبهاش العجب، اللي شايفة إن الشخص اللي معاها لازم يعمل مجهود مستمر عشان يحافظ على وجودها في حياته، البنت القوية الجامدة اللي فيه ناس ممكن تشوفها مغرورة وناس بتشوفها متطلبة، لكن هي شايفة إنه من حقها ماتقبلش بأقل من اللي هي تستاهله. طبعا البنات اللي زي دول بيتجوزوا رجالة حلوة شغالين في شركات عالمية يشتروهم خواتم ألماظ وفيلا في قطامية هايتس، وبعدها هيخلفوا ولد يسموه (مالك) بس هيقولوله (ميكي) وبتن هيسموها (فريدة) على اسم جدتها، بيروحوا تمرين الاسكواش والسباحة والأجازة في (ديزني لاند)، وييلفوا العالم ويتصوروا سيلفي ويحطوا الصور على انستجرام مع هاشتاج # Mylife # MyFamily ويكبروا ويعجزوا ويموتوا وهما سعداء.

وعلى النقيض فيه النوع الثاني البنات الـ (Low Maintenance)، البنات المسحولة، اللي مش طالبة حاجة خالص، اللي راضية بأي حاجة وساكنة

وخلاص، البنات اللي مش عارفة هي تستاهل إيه ولو عارفه ما بتتطلبش. دول طبعا بيعيشوا يدوروا على الحب بفطرتهم الطيبة وطبيعتهم البسيطة فيقعوا في الناس الغلط في الوقت الغلط ويجبوهم بطريقة غلط، يقوموا يتسكروا على دماغهم ويتصدموا فيهم ويتبهدلوا ويعيطوا ويسهروا الليالي ياكلوا شوكلاتة وبعدها يتسندوا على نفسهم وعلى بعض ويقبوا بنات جميلة وقوية ويغيروا حياتهم ويلهموا كل اللي حوالينهم، يكتبوا كتب ويطلعوا في التليفزيون ويلفوا العالم ويقنوا حياتهم في إغاثة الأطفال في المجاعات وياخدوا نوبل ويدخلوا التاريخ.. وفي الآخر هيكبروا ويعجزوا ويموتوا وهما سعداء.

السادة الركاب، برجاء إغلاق جميع أجهزة الهواتف المحمولة..

- يعني في الآخر دول هيقوا سعداء بعد ما اتجوزوا وعملوا أسرة، ودول هيقوا سعداء بعد ما دخلوا التاريخ، صح؟
- تقدر تقول كده.

- يعني السعادة فين؟

- هما قالوا لك فين؟

- لا بجدة.. السعادة فين.. أو بمعنى أدق السعادة إيه؟

- هو السؤال حلو وبسيط، لكن الإجابة مش بسيطة قوي كده. مشكلة البشر الأزلية تكمن في البحث عن السعادة. بنعيش ونموت بنجري وراها ونزعل قوي لو ما وصلناش وصعب نوصل. أصل السعادة دي كلمة مطاطة جدا، يعني عاوز تفهمها (فلوس) تنفع، عاوز تفهمها (صحة وستر) ماشي.. عاوز تعتبرها عيلة وونس وضهر، مش هتقول لأ.. كلمة مطاطة فعلا ماهاش معنى ثابت ومع ذلك عمالين نجري وراها. عمرك شفت واحد أهبل عمال يدور على حاجة مش عارف أصلا هي إيه؟ زي اللي اشترى الترمي.

- أنا ليا رأي ثاني. مهتمة تسمعيه؟
- طبعا.

- السعادة بمفهومها البسيط هي شعور ببيجي للإنسان لما يوصل لحالة من (الإشباع)، إشباع أي احتياج. لكن للأسف، البشر كائنات غير قابلة للإشباع فصعب قوي نوصل للسعادة المطلقة ونستمر في الحالة دي. - جايز.

- طيب وانتي سعيدة؟

- قلتلك، مش كل الأسئلة القصيرة لها إجابات قصيرة. أصل ماحدث عنده مرجعية يقيس عليها هو سعيد ولا لا، مافيش (ترمومتر) نقيس به السعادة غير إننا نقارن الوقت ده بوقت فات فبالتالي هتلاقي معظم الناس اللي إنت تعرفهم حاسين بحنين شديد تجاه الذكريات حتى لو ذكريات كانت حزينة ومؤلمة، فيه حاجة بتوحشنا في الواقع أول ما بياخذ صفة (الماضي). جايز أنا مش عارفة أنا دلوقتي حالا سعيدة ولا لا لكن متأكدة إني كنت سعيدة أيام الجامعة مثلا وكنت سعيدة أكثر أيام المدرسة.

- إشمعني؟

- ياااه. أيام المدرسة بقي وحلاوة أيام المدرسة. عارف، وأنا صغيرة كنت باحب قوي ريحة الشوارع في الشتا وقت المدرسة وريحة الشوارع في الصيف وقت الأجازة، كانت الحياة بسيطة قوي والأحلام كبيرة قوي. كان نفسي أكبر وأتخرج عشان أشتغل. وفعلاً، كبرت واتخرجت واشغلت وخذت الماجستير وبقيت مديرة، ودلوقتي بقي نفسي أرجع لأيام المدرسة تاني.

وأنا صغيرة كنت باكره الحموم في الشتا جدا، دلوقتي نفسي الأقي في اليوم عشر دقائق فاضيين أنزل فيهم تحت الميا وماطلعش، عشر دقائق من غير تفكير من غير تليفونات من غير مواعيد من غير التزامات.

وأنا صغيرة كنت بافرح قوي لما ماما تجيبلي سندوتشات الحلوة والجبنه اللي بالخيار وأنا باذاكر، دلوقتي باتضايق من أي حد يعزم عليا بأي أكل عشان باقبي عارفة إن أي لقمة هاكلها هتتحول لدهون تلزق في فخذ ولا دراع، الواحد مش ناقص.

- عندك حق، أيام المدرسة كانت فعلا جميلة. كان الواحد بيحلم براخته ومتأكد إنه هيوصل لكل أحلامه، كنا بنحلم وخلص. المهم احكي لي،

عملتي ليه بعد كده؟ فضلتني تلفي في الشوارع وتفكرني؟
- لقيت شوية ويعدين رجعت البيت لقيت ماما وطنط (زي زي)
جارتنا عاملين قعدة شاي بلبن مع كحك العيد. أمي أول ما شافتني داخله
من باب الشقة ندهت عليا بفرحة شديدة وقالتلي: «تعالى يا حبيبتى سلمى
على طنط زيزي»

- عروستنا الحلوة إزيها!!!!؟
بصيت لها وأنا باستعد لساع المقطوعة المعتادة ورسمت الابتسامة
البيلاستيكية اللذيذة على وشي وقتلتها: «إزي حضرتك يا طنط زيزي؟»
ردت عليا بحماس مبالغ فيه وقالتلي: «تمام يا روح طنط». باستني
ويعدين مدت إيدها حطتها قدام وشي وقالتلي: «إيه رأيك في ضوافري؟»
سكت شوية وقتلتها: «حلوين»
- على فكرة دول تركيب.

- آه ماهو باين.

- نعم؟؟؟

- قصدي حلوين، حلوين قوي يا طنط، والصبغة جنان خالص، حاجة
(تهوس)!

- ده من ذوقك يا بسبوسة. طنطك زيزي خلاص كبرت بقى وما بقتش
حلوة زيكم انتم يا بنات يا صغيرين. هو انتي عندك كام سنة صحيح؟
بصيتها نانيتين قبل ما أجاب على السؤال اللي أنا متأكدة إنها عارفة
إجابته ومع ذلك مصرة تسألولي كل ما تشوفني: «ثمانية يا طنط زي زي»
- ثمانية وعشرين سنة! طيب وليه مش صابغة شعرك ولا حاطة مكياج
ولا حاطة مانيكير؟ ده أنا عمري ضعف عمرك يبجي ٣ مرات وعاملة في
نفسى البدع. اوعى تكوني لسه مقضياها مذاكرة؟
- لا خالص. أنا خلصت الماجستير خلاص.

- ألف مبروك يا بسبوسة!! يلا عقبال الليلة الكبيرة بقى!
- الليلة الكبيرة اللي هي ال... دكتوراه؟

- دكتوراه إيه؟ لا طبعا، فرحك! ولا إنتي مانفسكيش زي كل البنات؟
لا لا لا!!!!!!، شدي حيلك يا بسبوسة!

طبعا المقطوعة يومها كانت أعنف بكثير من كل مرة وفجأة لقيت
دماغي وقفت تماما وما بقيتش عارفة أرد أو أقول كلمة، لكن طنط زي
زي ماسكتتش وحبب (تجويد) أكثر: «إيه القطة كلت لسانك ولا مكسوفة
يا ست العرايس! بالمناسبة، إبراهيم ابني بيسلم عليكى ونفسه يشوفك»
بسبتهم ومشيت من غير ما أرد بدل ما يجيلي جلطة ولا أتشل وساعتها
ماحدث مينفعني. بصراحة أنا آخر حاجة كنت عاوزة أسمعها يومها هي
جملة «شدي حيلك».

دخلت أوضتي باحاول أحسب أنا سمعت الجملة دي كام مرة في
حياتي لحد دلوقتي. بقالي ١٠ سنين باسمع الجملة دي بمعدل ٣ مرات
كل يوم. ثلاثة في ٣٦٥ يوم في السنة في عشرة.. شوف إنت بقى! الجملة
اللي أتحدى أي حد يكون عارفها إجابة منطقية أحضرها في دماغي قبل
ماروح أي خطوبة، حنة، فاتحة، كتب كتاب، زفاف، سبوع، عيد ميلاد،
عيد جواز، طلاق وقبل حتى ما أفتح باب بيتنا!
لما يتقال لي (شدي حيلك) أرد أقول إيه؟
إيه الرد المنطقي؟ أنا بأسأل بجد.

أقول (حاضر) مثلا، أقول (حالا أهو)، (ماشي هاشده)، أقول (شديته
والله قبل ما أنزل)!!

حيلي ده أشده إزاي؟ أشده بقوة قد إيه؟ أشد بسرعة وخلص ولا
بطء بس أشد جامد؟ طب أشد كام مرة في اليوم؟ مرة؟ مرتين؟ أشد طول
الأسبوع ولا أشده يوم بعد يوم؟

طب هو أنا لو شديت حيلي جامد ممكن يتقطع مني؟ لو ماشديتوش
خالص ممكن يرخي من الركنة زي الأستك مثلا؟
سؤال تاني، هو أنا لما أشد حيلي كام مرة في اليوم أوصل في وقت قد
إيه؟

بتعرف تحسب؟ وأنا بأسالك ليه؟ بسيطة، نضرب السرعة بالكيلومتر
في الوزن بالكيلوجرام يدنا التاريخ باليوم باين.
طب، هو الحيل ده أصلا آخره إيه من الناحية الثانية؟ مانا لازم أفهم
قبل ما أشد!

وبعد من المفروض إن العلاقات العاطفية تبقى بين (اتنين) من الجنس البشري مختلفين في النوع لكن متفقين على نفس القيم والمبادئ عشان وقدروا يعيشوا مع بعض في سعادة وسلام.

السؤال هنا بقى، هو الموكوس خايب الرجا ده اللي أمه (دعتله) في ساعة فجرية عشان يقع في إيدي، مش هيشد هو راخر؟ ها قعد أشد لو حدي كده؟ مش نساعد بعضينا يا كابتن؟

في اللحظة دي كانت دماغى سخنت واناكدت إن ده مش يومي الخالص فعملت كباية شاي أخضر بالنعناع وقعدت في السرير أقرأ وعلى الساعة واحدة بعد نص الليل جالي تليفون من (مايسة) صديقتي وزميلتي في الشغل. رديت وأنا نص نايمة لقيتها بتقول لي: «آلو.. الحقيني!»

- استر ياللي بتسترا دخلتي في عربية مين يا مايسة؟
- لا لا أنا كويسة.

- أمال فيه إيه؟

سكنت شوية وردت بأداء طفولي وتخيلتها قالبه شفايفها وبترفس برجلها في الأرض وهي بتقول: «هو أنا شكلي وحش؟»

- إيه؟

- أنا.. شكلي وحش؟

- سمعت يا مايسة سمعت!! أنا بس مش مصدقة إنك مكلهاني الساعة واحدة بعد نص الليل عشان تقولي «شكلي وحش»!

- يا ستي ريحيني وردى عليا من غير تقطيم.

- لا يا مايسة، لا يا حبيبتى، إنتي جميلة. صحيح أنا مش عاجبني آخر لون عملتيه في شعرك، البني من فوق وأزرق عند الأطراف ده بس غير كده أنا شايفة إنك بنت رقيقة وجميلة.

- بس أنا حاسة إن مناخيري وحشة. أصغرها؟
- نعم؟

- طيب ولون جلدي؟

- ماله لون جلدك بس يا أستاذ مايكل؟
- مايكل مين؟

- مايكل جاكسون الله يرحمه!

- ماتريش عليا!

- انتي مش سامعة نفسك يا مايسة؟!

- أعمل إيه، حاسة إني مش حلوة!

- يا مايسة يا حبيبتني، كام مرة هنقول نفس الكلام؟ كام مرة هاقول لك إن الحكاية مش بالشكل؟ أنا من ساعة ما عرفتك أصلا وانتي كل يوم بشكل. إنتي عندك كام سنة؟
- خمسة وعشرين.

- خمسة وعشرين سنة وعملي في نفسك كل حاجة ممكن أي حد يتخيلها، صبغتي شعرك تقريبا كل الألوان، قصيتيه كل القصات، ده غير الشعر اللي لزقتيه واللي ركبتيه، كان ليكي الريادة في شراء العدسات اللاصقة والضوافر الصناعي والمكياج وغيره. لكن اللي ماعرفتيش تتعلميه بعد كل التلويش ده إن الجمال بيدأ من جوا، أما اللي برا فهايفش أحسن من الحاجة الطبيعية، الحاجة الحقيقية، والله زي ما باقول لك كده.
- تفتكري؟

- طبعا أفكر! والأسباب بسيطة جدا. مافيش أحلى من إنك تتمرطي يوم من أوله في مشاوير في عز الحر وشعرك يتنكش ويروح في ١٠٠ اتجاه تقومي بحركة سحرية تسرحيه بصوابك بكل ثقة وسلاسة. مافيش أحلى من إحساسك وانتي متوترة جامد في اجتماع في الشغل، وبتلعي في ضوافرك مش خايقة واحد يطير، ويدخل في عين حد من الزملاء أو يتزل في مج الشاي اللي قدامك.

- يا لهوي؟

- صدقيني! مافيش أسوأ من مرحلة طلوع الجذور بعد الصبغة، مضطرة تعيشي بشعرك لونين لمدة شهر على الأقل. منظر يغم النفس ويقلب المعدة.. الأستاذة (سنية أكسجين)!

- إخص عليكى! أنا سنية أكسجين؟

- مافيش أسوأ من لون العين لما يتحمّر بسبب العدسات في وسط ما انتي في فرح وبترقصي ومدياها، ويا سلام بقى لو لازقة رموش كمان، عين

- مايكل جاكسون الله يرحمه!

- ماتريش عليا!

- انتي مش سامعة نفسك يا مايسة؟!

- أعمل إيه، حاسة إني مش حلوة!

- يا مايسة يا حبيبتي، كام مرة هنقول نفس الكلام؟ كام مرة هاقول

لك إن الحكاية مش بالشكل؟ أنا من ساعة ما عرفتك أصلا وانتي كل يوم
بشكل. إنتي عندك كام سنة؟

- خمسة وعشرين.

- خمسة وعشرين سنة وعملي في نفسك كل حاجة ممكن أي حد

يتخيلها، صبغتي شعرك تقريبا كل الألوان، قصيتيه كل القصات، ده
غير الشعر اللي لزقتيه واللي ركبتيه، كان ليكي الريادة في شراء العدسات
اللاصقة والضوافر الصناعي والمكياج وغيره. لكن اللي ماعرفتيش تتعلميه
بعد كل التلويش ده إن الجمال بيدأ من جوا، أما اللي برا فهايش أحسن من
الحاجة الطبيعية، الحاجة الحقيقية، والله زي ما باقول لك كده.

- تفتكري؟

- طبعا أفكر! والأسباب بسيطة جدا. مافيش أحلى من إنك تتمرطي

يوم من أوله في مشاوير في عز الحر وشعرك يتنكش ويروح في ١٠٠ اتجاه
تقومي بحركة سحرية تسرحيه بصوابك بكل ثقة وسلاسة. مافيش
أحلى من إحساسك وانت متوترة جامد في اجتماع في الشغل، وبتلعب في
ضوافرك مش خايفة واحد يطير، ويدخل في عين حد من الزملاء أو يتزل
في مج الشاي اللي قدامك.

- يا لهوي؟

- صدقيني! مافيش أسوأ من مرحلة طلوع الجذور بعد الصبغة،

مضطرة تعيشي بشعرك لونين لمدة شهر على الأقل. منظر يغم النفس
ويقلب المعدة.. الأستاذة (سنية أكسجين)!

- إخص عليكى! أنا سنية أكسجين؟

- مافيش أسوأ من لون العين لما يتحمّر بسبب العدسات في وسط ما

انتى في فرح وبترقصي ومدياها، ويا سلام بقى لو لازقة رموش كمان، عين

هر اعلی رموش لازقة تحت ٢ كيلو مكياج، اوعى طبق اليوم
سكتت مايسة خالص لدرجة إني شكيت للحظة إنها نامت وبعدين
سمعتها بتاخذ نفس طويل بصوت وقالتلي:
- عندك حق. المشكلة إني طول الوقت حاسة إن فيا عيوب ولازم
أداريها عشان الناس تقبلني وتشوفني جميلة، باتكسف لو شعري قصف
أو ضوافري باظت، باحس إني هابقى وحشة وكمان ممل.
- عارفة يا مايسة، الشعر المقصف الهايش الخفيف ممل لكن طبيعي.
الضوافر القصيرة الضعيفة اللي بتتشقق وبتتكسر مش جذابة بس (Cute).
العينين البني عادية لكن مريحة للي يبصلها عشان بتعكس حته من روحك.
مشكلتك يا مايسة، إنك مش عارفة تشوفي جمالك وتحبي نفسك زي ما
هي. حاولي تحبي نفسك يا مايسة.

- هاحاول حاضر، هاحاول أحبها عشان معتر كمان يحبني.

- لا تحبها عشان (مايسة) تحبك دايمًا، وده الأهم.

قلت السكة في وش مايسة وكل اللي كنت بافكر فيه، إيه اللي بيخلينا
نضجع وقتنا وطاقتنا في أفكار سلبية وتساؤلات مالهش إجابة بتعكس قد
إيه إحنا مش عارفين نحب نفسنا زي ما هي.

إيه اللي بيخلينا ندخل في معركة خسرانة مع فكرة الجمال المثالي مع إننا
عارفين إن المثالية مالهش وجود بين البشر وإن الصور والمجلات اللي
بتقارن شكلنا بيها معمول عليها رتوش وتعديلات ١٠٠ مرة!

وساعتها سألت نفسي، إيه اللي ممكن يخلي الإنسان يقبل نفسه زي ما
هي من غير رتوش، من غير تجميل؟

ناس كثير ممكن تعتبر كلمة (متصالح مع نفسه) حاجة بايخة مكررة
ومالهش معنى لكن الحقيقة إن معناها كبير وتحقيقتها صعب جدا.
إيه هي التجربة اللي لازم نمر بيها عشان ندرك قيمتنا الحقيقية، قيمتنا
بعيدا عن اللبس والعرييات والمكياج الاجتماعي.

إزاي ممكن الواحد يتخلص من كل الأسئلة الصغيرة اللي مضیعة طاقته
وشاغلة باله على الفاضي ويبدأ يدور على إجابات للأسئلة الجوهرية اللي
ممكن تغير حياته كلها، الأسئلة اللي لو عرف إجاباتها هيقدر يجاوب على
أي سؤال ثاني بكل ثقة وبكل سهولة.

في اللحظة دي ومن وسط ١٠٠ سؤال ممكن الواحد يسألهم لنفسه، جه
في دماغى ٣ أسئلة بالطبط، ماكتش عارفة أفكر غير فيهم. ال ٣ أسئلة هما:
إحنا مين بجد؟

وعاوزين نعمل إيه في حياتنا؟

واللي عاوزينه ده، نوصل له إزاي؟

وقبل ما أفكر في إجابة أي سؤال من الثلاثة كنت نمت.

* * *

*السادة الركاب، كابتن طيار/ محمود جلال والطاقم يرحبون بكم
على متن الطائرة رقم ٦١٩ والمتجهة إلى مطار ال... *

- تعرفي إن الستات كائنات مميزة ومثيرة للاهتمام أكثر من الرجالة بكثير.
أصلكوا بتهتموا بالتفاصيل قوي. صاحبك مركزه في شكلها ومناخيرها
وحتى لون جلدها بتفكر فيه. الرجالة أبسط من كده بكثير، الراجل ممكن
يتخن ٥٠ كيلو وماياخدش باله، شعره كله يقع وهو عادي كل يوم يبرح
رأسه وهي فاضية، الرجالة ما بتهتمش بربع التفاصيل اللي إنتوا بتهتموا
بيها. المهم إيه اللي حصل بعد كده؟ جاوبتي على ال ٣ أسئلة الصبح؟

- أسئلة مين؟ ولا افتكرتهم أصلا! صحيت تاني يوم الساعة ٧ الصبح،
صليت وحمدت ربنا إن اليوم عدى على خير وماقطعش شرايني بالطول.
كان يوم السبت، ويوم السبت ده يعتبر نص أجازة ال Weekend بس
نحسه كتيب كده يا أخي، عامل زي يوم ال (free) عند الناس اللي بتعمل
ريجيم، اللي هو مش عارف تستمتع به ولا تعيط عشان بكره هتبدأ أسوع
جديدا

يومها صحيت بدري من غير منبه، وكالعادة صليت وحمدت ربنا إنه
اداني يوم جديد أعيشه، ومن غير ما أفطر ولا أعمل أي حاجة نظيت في
(ترينج) وجزمة جري لوها فسفوري وضربت نظارة الشمس. سلمت
على ماما وبُست رأسها وخذت دعوة كل يوم:
"روحي يا بنتي ربنا يحب فيكي خلقه"

قفلت الباب ونزلت، خرجت من باب العمارة لقيت عم ناجح في

وشي..

- صباح الخير يا عم ناجح.

- صباح الفل يا دكتور

- إزيك وإزي البنات؟

رد عليا وقاللي: «بخير جوي يا دكتور». وده غالبا رد عم ناجح اليومي المعتاد، وحرف (الجيم) اللي بيستخدمه في كلامه ويفكرني بالنوبة وجاها وطيبة أهلها.

- مين اليه اللي قافل عليا بعربيته ده يا عم ناجح؟

- ده الدكتور إبراهيم يا دكتور.. أصله جه الساعة ٦ الصبح وكان لا مؤاخذه مش شايف جدامه فجال لي إنه هيركن جدام عربية حضرتك ولما تن..

- مفهوم مفهوم. ماعلش اطلع اندهله بسرعة أو هات منه المفتاح أحسن أنا كده هاتأخر!

طلع ناجح وغاب خمس دقائق وبعدها نزل ومعه المفتاح، حرك عربية إبراهيم وطلعت من الجراج وأنا معايا قايمة طويلة من المشاوير المستعجلة اللي لازم أنجزها النهارده في شوارع المحروسة.

لسوء حظي يومها، أصل فيه أيام كده ما يعلم بها إلا ربنا بتبقى باينة من أولها، بدل ما أفتح الراديو على محطة (البرنامج الموسيقي) زي كل يوم، فتحت على محطة شبابية (جدا) لقيت المذيع يقول لـ (صديقة البرنامج): «وانتي بقى في ثانوي علمي ولا أدبي؟»

المتصلة سكتت شوية وقالتله: «ولا علمي ولا أدبي. أنا تجارة»، مش يسكت بقى، لأ قام سائلها: «ثانوية عامة تجارة إزاي؟» قالتله: «مش عام.. تجارة!»

قال لها: «مممم.. طيب، لما تخلصي عاوزة تخشي كليه إيه؟ إعلام؟» المتصلة ردت بشيء من الدهول: «آ.. آه، إن شاء الله» سكت المذيع المثقف شوية وقال لها: «بصي أنا مش فاهم حاجة بس أتمالك التوفيق، وبنهديلك غنوة جديدة شهيااااا!»

طبعاً المحرق دمي وقفلت المحطة فوراً!!
 المذيع المحترم اللي عايش في البلد دي مايعرفش إن فيه حاجة اسمها
 (ديبلوم) وإن فيه حاجة اسمها ثانوي (تجاري) وثانوي (صناعي) وغيره.
 السؤال هنا، على أي أساس يتم اختيار مذيعين الراديو وخاصة المحطات
 الأوسع انتشاراً والأكثر تغطية على مستوى الجمهورية؟
 أنا متخرجة من كلية الإعلام جامعة القاهرة، وهي واحدة من كليات
 قليلة ماهاش نقابة. خريج هندسة بيتخرج يبقى مهندس، خريج طب
 يبقى طبيب، لكن خريج إعلام مش شرط يبقى (إعلامي) عشان الإعلام
 ده مسؤولية ورسالة وله هدف نبيل مش كل الإعلاميين عارفينه.
 هما يختاروا المذيعين على أي أساس بجد؟ هو الأهم إن المذيع يكون
 عنده قدر من الثقافة والمعلومات العامة عن بلده ولا إنه يعرف بقول
 (شهيصة) و(أبوه بقى) و(هو ده) و(يا برنجي) و(نقول ألوك)!
 وقبل ما أصاب بنوبة عصبية أو تشنجات، وصلت عند عم (سيد)
 صديقي بتاع الكاوتش.

- حاج سيد، انت فين يا عم؟ سألت عليك.

- كنت واخد يومين أجازة يا أستاذة.

- ماشي يا حاج. عاوزة أزود العجل، على ال ٣٠ بعد اذنك.

- من عينيا! بس، العجلة دي مهوية شوية. أكشف عليها؟

قعدت قدام ورشة عم سيد المتواضعة للمرة ال ٢٠ السنة دي. أصلي
 موسوسة وكل يومين أخليه يكشف على العجل زيادة في الاحتياط، وهو
 خلاص اتعود وبقينا أصحاب.

ورشة عم سيد بحري شرقي والهوا صاروخ وده لأن الورشة قدامها
 تنفق. جنب الورشة فيه قهوة بتعمل سحلب (عجب)، ينضرب به المثل
 فعلاً، يعني خدمة (فايف ستارز)، مايبعكرش صفو القعدة غير حاجتين:
 (محمد) ابن عم سيد اللي مقتنع إن البانيو اللي فيه مية الكاوتش للعب
 والطرطشة، ونظرات المارة وهما بيتفحصوني بعناية شديدة.
 مش عارفة إيه الملفت في منظري بصراحة؟ شابة زي الورد لابنة

(ترينج) وقاعدة بتشرب سحلب قدام محل كاوتش. عادي يعني ا
- مشكلتنا إن إحنا شعب الفراغ قاتله والفضول واكله والجلالة
واخداه.

- عندك حق، الجلالة واخداه فعلاً. المهم، بعد نص ساعة من نظرات
الوجوم على وجه جميع المارة وسائقي المركبات، خدت العربية اللي عجلها
على (سنه) واتكلت على الله عشان أعمل مشاويري. طبعاً كلمة (مشاوير)
بعد العيد ما خلص والناس بدأت تفوق من الغيوبة وتفكر وراها إيه
يتعمل، أقرب لكلمة (كوايس). فكرة إتنا في شهر يوليو كمان تحلي
(مشاوير) هي المرادف لكلمة (تعذيب)!

وقفت في كم إشارات مرعب مستنية معجزة إلهية تحرك الطريق، شفت
أكثر من ٢٠ خناقة، إشي اتنين كسروا على بعض وإشي اتنين خبطوا مرايات
بعض، مولد وصاحبه غايب، اللي شاييل خروف على موتوسيكل واللي
شاييل قفص عيش وسابق عجلة واللي بيجري بد (مشنة).
لكن في وسط الزحمة والكلاكسات المختلطة بأنغام المهرجانات الشعبية
وكميات العوادم الغير آدمية زائد أخلاق مجرمي الحرب في السواقة، ظهر
بصيص أمل!

جواهر ودرر الكلمات، أقوال مأثورة ركزت فيها وسرحت معاها،
جايز دي اللي هونت عليها زحمة الطريق.

واحد كاتب على ظهر الميكروباص (عين العبد غدارة وعين الرب
سئارة)، تحس إن فيها حكمة وعظة. الثاني كاتب (يا تعدي وتسيبها في
حالها، يا تهدي وتبص على جمالها)، شوف بيديلك اختيارات ازاي! واحد
كاتب (إحنا الأساس وعلمنا كل الناس) شوف الثقة بالنفس، و(مش
هيصعب عليا حد عشان ماصعبتش على حد)، واللي حلوة برضو (دايخ
في زمن بايخ)، ده غير اللي كاتب (للبيع) و(للبيع عشان ترتاحوا) و(للبيع
بجد)، كنت عاوزه أقول له «إحنا مصدقينك والله!»

وأثناء سحلتني بين الأقوال المأثورة العميقة دي ومعانيها الأعمق،
عديت من ميدان الجيزة لا بيا ولا عليا واتفاجئت بجحش نافق مرمي
في وسط الطريق. منظر مرعب! جحش ميت وبدأ يتحلل مرمي في وسط

الشارع. وطبعا الريجة كانت سيئة والمنظر كان أسوأ لكن ما حدث من اللي
 معدين كان مهتم. اتصلت بالنجدة فوراً، نمرتهم معروفة يعني، مين مش
 حافظ (٢٢ نجدة)، سهلة دي! وبعد رنتين ثلاثة ردت عليا ست عجوزة،
 قلت لها «ألو النجدة؟» قالت لي: «لا يا بنتي النمرة فلفط ولعله خير»
 قلت أكيد الخطوط دخلت في بعضها، أما أحاول تاني. اتصلت تاني
 والمرة دي ردوا عليا فعلا. عليت صوتي وأنا باشرح للشخص اللي رد عليا
 وقتلته: «حضرتك فيه جحش نافق في ميدان الجيزة وبدأ يتحلل وده بينشر
 الأمراض»، قال لي: «فين النفق ده؟»
 - نالافق مش نفق، ميت يا أستاذ!

رد عليا باستنكار شديد وقال لي: «ميت؟؟؟ لا ده مش تبعنا يا مدام»
 طبعا اتفرقت من كلامه جدا وقتلته: «أستاذة من فضلك! طيب أكلم
 مين؟ ساعدني لو سمحت»
 - كلمي الطب البيطري وقوليلهم فيه (كلب) ميت.. يا مدام.
 - جحش!!

وبعد محاولات مالهاش عدد وصلت للطب البيطري وبلغتهم وقالوا
 إنهم هيعملوا اللازم. لكن اللي كان يحيرني ساعتها هو ليه بتتعامل مع
 الحاجات اللي زي كده بأريحية شديدة وكان العادي إننا نعيش وسط
 الجثث والأمراض؟ هي الغلظة غلظة مين؟ غلظة الراجل بتاع النجدة ولا
 الطب البيطري ولا الست اللي ردت عليا ودعتي يكون خير؟ ولا يمكن
 غلظة الجحش المسكين اللي قدره خلاه يعيش ويموت في القاهرة.. القاهرة
 الساحرة الأسيرة الهادرة الساهرة الساترة السافرة.
 - قصيدة (هنا القاهرة) لسيد حجاب؟
 - أيوه، وغناها (علي الحجار).

- عارف، وعارف كمان إنك بتحبي كل أشعار سيد حجاب، لكن مالها
 بقى القاهرة؟

- القاهرة مدينة عفوية وبسيطة جدا، وأي حاجة في القاهرة عفوية
 وبسيطة برضوزيها.

يعني مثلا، في القاهرة أي حد ممكن ببساطة يقف ياكل في الشارع،
 ويقول لك «يا عم الجوع كافر.. قول بسم الله». في القاهرة عادي برضو

تشرب شاي وقهوة وسحلب وشيثة في الشارع ويقول لك «باهنا
والشفا». عادي تشوف واحد بيرمي زبالة في الشارع ولو كلمته يتضايق
جدا ويقول لك «أصل مافيش صناديق»، عادي كمان تشوف واحد نايم في
الشارع، ما أصل «النوم سلطان»، واللي بيتف واللي بينف «كرشة نفس يا
أخي، الواحد يكتمها ويموت يعني؟»، ده غير اللي بيعمل بي بي في الشارع،
يكفيك شر الزنقة، واللي بيعمل اللي (مش) بي بي برضو في الشارع، واللي
يشتم واللي بيعيب في دين غيره، واللي بيتزل ضرب في اللي يكرهه واللي
يزعله، ويقول لك: «مصارين البطن بتتخاتق». لكن اللي عيب واللي مش
عادي إننا نحب بعض في شوارع القاهرة، عيب نحضن بعض. أصل إحنا
شعب متدين بطبعه! قال نحضن بعض قال!

- تصدقي أول مرة أفكر في الحكاية دي؟ إحنا تقريبا بنستريح الطريق في
كل حاجة ما عدا في الحب والمشاعر الطيبة.

- بالضبط. تعرف إنه بالمنطق والدليل، مستحيل أي قصة حب صحية
ومتوازنة تنشأ وتنمو في شوارع القاهرة؟ أصل هيجيبوا النفس منين؟
فين المكان اللي ممكن اتنين يقعدوا فيه يسمعوا بعض في هدوء ويتكلموا؟
بالعقل كده، لو شاب معاه حبيبته، هياخذها ويروحوا فين؟ الأهرامات
مثلا؟ مزار سياحي جميل ومن عجائب الدنيا السبعة لكن في نفس الوقت
زحمة جدا ودوشة و ١٠٠ واحد هيجيلك يحاول بيعلك ورق بردي أو
تمثيل جيس على شكل توت عنخ أمون وراس نفر تيتي.

بلاش الهرم، يروحوا كافيه أو مطعم؟

برضو زحمة ودوشة، ٩٠ شاشة مشغلة قنوات فيديو كليب بصوت
عالي، غير الجرسون اللي جاي يوشوشك بصوت رخيم ويقول لك:
«فيه (Minimum Charge) خمسين جنيه»، الظاهرة المصرية المتأصلة اللي
مستحيل تشوفها في أي مكان ثاني في العالم.

ياخذها ويروحوا مول مثلا؟

المولات عندنا أشبه بغابة من الأمهات بتجري ورا عيال واجوازهم
يجروا وراهم بالترولي اللي مليون على آخره اكياس فيها جبن وزبادي
وشامبو ولحوم مجمدة.

نفترض إنه هياخذها ويروح حديقة عامة مثلاً؟ ولا بلاش هشان
ماعنديش طاقة أتكلم عن الزبالة والعشوائية وحلل المحشي.
ياخذها ويركبوا فلوكة في النيل؟

الريس بتاع الفلوكة ماهيصدق يعمل على الشاب مصلحة ويدفعه
الدويل لمجرد إن معاه (واحدة)، مهما كانت البنت شكلها محترم ولطيف
وحتى لو خطيبته أو مراته. الناس هنا حافظين إن (أنسى + ذكر + فلوكة =
مصلحة).

ولو البنت قنوعة وبترضى بقليلها ممكن يشتريها واحد كابتشينو
وشوكولاتاية من أي محطة بنزين ويقعدوا في العربية وخالص، لكن
المشكلة إن بمعدل ٤٠ مرة في الدقيقة هيلاقى بياع مناديل ورق أو فواحات
أو ورد أو فل أو بلالين على شكل دبدوب أو طراطير، وهيبصله ويغمز
وهو بيقول: «ربنا يخليك الأمورة! يا رب تتجوزها» قال يعني كده
بيحججه.

في كل الأحوال احتمالية إنك تكون طرف في علاقة حب صعبة
وناضجة بتقل جدا لمجرد إنك عايش في مدينة (القاهرة).
- للدرجة دي مابتحبيهاش؟

- بالعكس! باعشقتها، باموت فيها! باحب تفاصيلها، دوشتها،
الحميمية اللي في زحمتها، الدفا الغير مفهوم اللي في كل شارع فيها. باحبها
من غير ما أحاول أفهم باحبها ليه. القاهرة مدينة عفوية ومن عفويتها
بيجي سحرها.

- وبعدين، إيه اللي حصل بعد موضوع الجحش النافق ده؟

- أبداً، خلصت مشاويري بعد عناء مرير وفي الطريق فتحت الراديو
على محطة تانية خالص، سمعت مذياع بيرد على مستمع باعيت رسالة بيقول
إن مدينة نصر زحمة وإنه متأخر على مشواره، المذياع مشكوراً قعد عشر
دقايق بيوصفله على الهوا إزاي يخترم من شوارع جانبية!

وصلت أخيراً وقفلت الراديو بعدما اكتفيت من اللي حصل لي طول
اليوم. طلعت البيت، خلصت طقوسي المسائية وعملت كباية شاي أخضر
بالنعناع وقعدت في السرير أقرأ وخلال ربع ساعة كنت نمت على نفسي.

والساعة ١ بالليل جالي التليفون المعتاد: «الو.. الحقيقيني!»
 - استر ياللي بشرت ا دخلتني في عربية مين ثاني يا مایسة؟
 - لا لا أنا كویسة.
 - مامتك كویسة؟ باباكي كویس؟
 - أبوه.
 - أخوانك؟ صحابك؟ حد جراه حاجة؟
 - لا تمام. كله ماشي.
 - كله ماشي؟ أمال مكلهاني الساعة واحدة بعد نص الليل ليه يا ست
 نادية الجندي؟
 - أصل كله ماشي لكن الجوازة مش ماشية!
 - مش ماشية إزاي؟ ده انتي كتي بتقولي أخيرا لقيت (معتز) وبتاع،
 مش اسمه معتز برضو؟
 - أبوه بس خلاص. ده طلع خاين!
 - يا نهار إسودا بعد ١٠ شهور بتحبوا بعض يخونك! ده خلاكي تتعرفي
 عل أهله وكتتوا خلاص داخلين في الجدد.
 - خاين باقول لك. أنا خلاص عملت للإنسان ده (Block) من حياتي
 كلها!

مكت شوية وكنت ناوية أغير الموضوع عشان فعلا اتضايقت من اللي
 مایسة بتحكيهولي، مایسة إنسانة كویسة وماتستاهلش حد يعمل فيها كده.
 لكن بصراحة الفضول كان قاتلني والمحلل النفسي اللي جوايا كان عاوز
 يعرف تفاصيل أكثر: «وخانك مع واحدة؟»
 - لا.

- أمال مع واحد؟
 - نعم؟

- لا ده إفيه كده في فيلم (السفارة في العمارة)، روعي ذاكري إفيها
 أفلام يا مایسة ضروري، وابدني بعادل إمام وهندي.
 - ده وقت هزار!!

- لاني موضوع القوم
 في اللحظة دي كنت
 ردت عليها بكل هذه
 واتساء ما أنا بأحادي
 عليا من اللي باسمه ما
 التي مش حكيتلي مرة
 - ليه ده حصل في
 على والسبب واتعرفت
 - لالا كده كتير
 - اهدي طيبا كذا
 سكتت مابسة شو
 ليه سب فشل العلاة
 - ياخني اتيلي،
 (offline)!!
 سكتت شوية تاز
 وتخليني أشغل زيادة
 نساك وقتلتها: دباق
 قصدي أقتل معاك
 - على فكرة صا
 - لو عاجباك
 - آه تاشغلي
 - عصير برتقال
 - فيلم (الناظر
 - برافو عليك

- أعمل لك إيه طيب؟ ماهو يا إما خانك مع واحدة يا إما خانك مع
 واحد. أمال هيكون خانك إزاي؟ خان العشرة مثلا؟ خان العيش والخبز
 خان وطنه؟ العروبة طيب؟ خانك إزاي سي زقت ده!
 - اهدي بس هاحكيلك وإنتي احكمي بنفسك. أنا في الأول لمت
 بيعمل (like) و (follow) لبنات غريبة كده على انستجرام. ده غير إن أوله
 عموما وتوجهاته غيري خالص وده باين جدا على تويتر ده غير إنه.

وفي اللحظة دي اتعدلت في القعدة وولعت الأباجورة اللي جني
 وقاطعتها قبل ما تكمل وقتلتها: «باقول لك إيه يا مابسة، ما تقفلي ال
 اللي فتحته في وشي وكلمي (معتز) أحسن وافهمي منه»
 - يا بتي مانا كلمته على فيس بوك عشرين مرة وماردش.
 - لا إنتي مش فاهماني يا مابسة، الحكاية محتاجة قعدة. لازم تتقابلوا
 وتتكلّموا.

سكتت شوية وقالتلي بصوت واطي: «لا، ما أصل.. احنا.. احنا
 ما بتقابلش»

- يعني إيه ما بتقابلوش؟

- ما بتقابلش.. (It's a virtual thing)

- Virtual؟ حاجة (افتراضية) يعني؟ يعني انتي ماشفتيش النبي آدم ده

ولا مرة قبل كده؟

- ماشفتوش إزاي؟ ده أنا بقالي عشر شهور باشوفه كل يوم. ده أنا

حافظة شكله!

- مش فاهماني. قصدي ماتعرفيش بيشتغل إيه؟ بيشتغل فين؟ يشغل

أصلا ولا عايش على المعونات؟

- إزاي يا بتي ده أنا حافظة صفحته على (LinkedIn) وأنا اللي رشحة

للو وظيفة الأخيرة.

- يا ولية فتحي نحك معايا بدل ما أبطحك! مش يمكن يكون سخيف؟

نخلت عقليا؟ بياكل بصوت زي السناجب؟ بيشرّب القهوة من بين سنانه؟

- لاني موضوع القهوة ده أنا عارفاه كويس . ده إحنا شربنا مع بعض
قهوة ييجي ١٠٠ مرة على (Skype).

في اللحظة دي كنت فقدت أعصابي ومايقيتش قادرة أستحمل أكثر من
كده. «وهو ده اسمه ارتباط يا مایسة؟!»

«It's a social media relationship» وقالتلي: «يا مایسة، افتكرت حاجة مهمة: «باقول لك إيه يا مایسة،
ردت عليا بكل هدوء وقالتلي: «باقول لك إيه يا مایسة،

انتي مش حكيتلي مرة إنك اتعرفتي على أهله. طب إزاي؟!
- أبوه ده حصل فعلا. من ٣ شهور دخلني على جروب (My family)
على وانساب واتعرفت عليهم. دول لذاذ جدا.
- لا لا كده كتيسير.. Over.. كثير!!

- اهدي طيب! كده كده الموضوع باظ خلاص.
سكنت مایسة شوية وسألتني بسذاجة شديدة: «باقول لك إيه، تعرفي
إيه سبب فشل العلاقات اللي بتبدأ (online)؟!»
- ياخوتي اتبيلي، مش لما أبقي اعرف سبب فشل العلاقات اللي بتبدأ
(offline)!!

سكنت شوية تانيين زي ما تكون بتفكر في سؤال تقضي عليا بيه خالص
وتخليني أنشل زيادة وقالتلي: «باقول لك إيه..» رحت مقاطعاها قبل ما
تسأل وقتلتها: «باقول لك إيه انتي، أنا مضطرة أعمل لك (unfollow)،
فصدي أقفل معاكي دلوقتي عشان عاوزة أنام!»

* * *

- على فكرة صاحبك مایسة دي ظريفة جدا
- لو عاجباك اتفضل شيل. حلو عصير البرتقان اللي انت بتشربه ده؟
- آه. تاخدي شوية؟
- عصير برتقان! ليه، هو احنا عندنا أنقلونزا؟
- فيلم (الناظر) مشهد الكباريه، صح؟
- براقو عليك!

- طبيب فهميني بس، ليه هجمتي على مايسة قوي كده لما قالتلك إنها في علاقة افتراضية؟ الـ Social Media بقت كلمة متداولة في قاموس حياتنا اليومية. فيسبوك مثلا، كيان ضخم جدا، فيسبوك حاليا فيه أكثر من ٢٠ مليون حساب في مصر لوحدها يعني غالبا كل الناس اللي في دايرتك الاجتماعية دلوقتي وفي المستقبل موجودين حاليا على فيسبوك. وبالتالي عادي نكوّن علاقات اجتماعية بأشكال مختلفة عن طريق مواقع الـ Social Media أو نعتبرها نادي اجتماعي كبير.

- أنا معاك. لكن برضو الصوت حاجة تانية، والصورة حاجة تالثة.

مهما وصلنا لمراحل تطور تكنولوجيا في وسائل الاتصال، برضو الدم واللحم هو اللي بيحسك بالإنسان اللي قدامك وبيقربك منه.

- متأكدة إنك مش عاوزة تدوقي عصير البرتقان؟

- ميرسي كثير لسه ضاربة كشري.

- مشهد من فيلم الناظر برضو صح؟ انشراح وعاطف وهما بيرقصوا؟

- برافو! ثقافتك السينمائية ممتازة!

- المهم كمل، صحيتي تاني يوم..

- بالضبط، صحيت الصبح بدري بس بعد ما المنبه ضرب مرتين،

صليت وحمدت ربنا إنه اداني يوم جديد أعيشه، نظيت في بنظلون إسود

وجاكت أحمر وجزمة سودا بكعب عالي، فطرت وسلمت على ماما

وئست راسها وخذت دعوة كل يوم:

«روحي يا بتي ربنا يحب فيكي خلقه»

فتحت باب الشقة ونزلت وأنا حاسة إنه هيبقى يوم جميل، أو على

الأقل كنت باتمنى كده. نزلت من البيت نص نايمة وفي حالة إنكار إن

الأجازة خلصت. تحس يا أخي إن يوم الحد ده بيبجي فجأة كده، بيبجي

على غفلة كأنه قاصد يفاجئك.

- صباح الفل يا دكتورة.

- فل ازاي يا عم ناجح وأستاذ إبراهيم من ساعة ما رجع من السفر

وهو كل يوم يقفل عليا بعريته! اطلع اندهله من فضلك! بس ماتحيش

الفتاح المرة دي، هاتهولي هو شخصيا!

وبعد عشر دقائق، نزل إبراهيم، بقالي أكثر من ١٠ سنين ماشفتوش،
من يوم ما سافر يدرس برا، أنا حتى مش عارفة هو سافر يدرس إيه، كل
اللي أعرفه إنه سافر يدرس ويشغل وبعدها تجوز أجنبية ودلوقتي رجع.
أول حاجة جات في دماغي لما شفته وخلتني أتعصب جدا هو الشبه
الكبير اللي بينه وبين - الله يرجمه - صلاح ذو الفقار، جتك القرف فيك وفي
حلاوتك يا إبراهيم!
بصيته وابتسمت وقلتله: «صباح الخير»، رد عليا وقال لي: «صباح
الخير»

- ممكن أسالك سؤال؟

- اتفضلي.

- هو النهارده إيه في أيام الأسبوع؟

- النهارده؟ الحد.

- الحد.. آه.. الحد. والحدده في مصر يوم عمل ولا يوم أجازة؟

- يوم عمل.

- عمل.. آه.. عمل - يعني شغل، يعني نصحى بلدي نركب عربياتنا

ونجوي بسرعة على أكل عيشنا!!

- إيه؟ صدقيني مش فاهم قصدك إيه.

بصيته جامد قوي وقلتله: «مش فاهم؟ آه، مش فاهم. طب، حمد الله

على السلامة يا إبراهيم، يا رب تكون اتبسطة، نورت مصر، مبسوطة إني

شغلك، ممكن تشيل عربيتك من قدامي بقى!!!»

خدت بعضي ومشيت وأنا مترفة جدا من العطلة ومترفة أكثر من

رد فعل إبراهيم، مش بس قافل عليا ومعطلني لا كمان بصلي شزرا عشان

قلقت منام سيادته!

شغلت الراديو على محطة (البرنامج الموسيقي) عشان أسمع مزيكا

هادية في الطريق من البيت للشغل.

- بتحبي شغلك؟

- بلح شغلي طبعاً وبلح الشغل عموماً. العمل شرف، وودي أول

قاعدة من قواعد العمل الأربعون.

- قواعد العمل الأربعة؟ أنا أعرف (قواعد العشق الأربعة) لكن قواعد العمل دول ماسمعتش عنهم.
- ولا هتسمع، أصل أنا اللي مألفاهم. قواعد بسيطة وصلتلها مع الوقت وخبرة السنين وأي حد يقدر يطبقهم في شغله، أربعين قاعدة فيهم الخلاصة.

- أقدر أعرفهم؟

- أكيد. استنى ثانية بس أصل أنا كاتباهم في الدفتر اللي معايا ده. متأكد

إنك عاوز تسمعهم كلهم؟

- طبعا متأكد، اتفضللي.

- اسمع يا سيدي، قواعد العمل الأربعة:

١. العمل شرف.

٢. كل الناس مش مبسوطة في شغلها.

٣. العمل عبادة.

٤. كل الناس اللي مش مبسوطة في شغلها بتدور على شغل في شركات فيها ناس ثانية مش مبسوطة برضو.

٥. يوم الحد يبسجي فجأة ويوم التلات بيتحسب بيومين.

٦. يوم التلات مش يوم عادي، ده روح شريرة بتطارذك من الأربع للتلات اللي بعده.

٧. مهما نمت بدري هتصحى داينج ومصدع.

٨. القهوة مش بتفوق بس انت اتعودت عليها. الميا الساقة بتفوق أكثر ودي حقيقة علمية على فكرة.

٩. مش كل شوية تقفل المنبه وتضبطه تاني عشان يصحيك بعد عشر دقائق، صدقني مش هيفرقوا معاك لكن هيجلوك تأخر عن

ميعادك، اضغط على نفيك واصحى وابقى نام بدري بعد كده

١٠. مهما اتصورت على المكتب وانت مركز وتتشتغل، إحنا عارفين إن ما حدش صورك وانت مش واخذ بالك وعارفين إنك سايب

الشغل وتنصور نفسك (سيلفي). ماتثلش.

١١. كل إدارة فيها موظف وظيفته يلم (أوردن) الفطار. أبوه، بيتعجب عشان كده بس.

١٢. كل إدارة مقتنعة إنها الوحيدة التي يشتغل في الشركة.
١٣. ماتصدقش كل اللي تسمعه والأحسن ماتسمعش خالص.
١٤. كل موظف مقتنع إنهم لو شكوه الشركة لمدة شهر هيكسها ملايين ويخليها تنافس (سامسونج) و(ميكروسوفت) هناك.
١٥. ماحدث بيقرأ أي إيميلات أولها (FYI, FYKA, FYA).
١٦. ماحدث فاهم يعني إيه (FYA, FYKA, FYI) ماتعتمدش على الاختصارات. إنت مش في (مابها تن)!
١٧. ٩٠٪ من الشغل قرف والـ ١٠٪ بيخلونا نستعمل الـ ٩٠٪ الباقين.
١٨. امشي عدل عشان رينا ثم نفسك، مش عشان أي حد يختار فيك.
١٩. مهيا اجتهدت وطلح عينك في الشغل هيجي واحد بعد ما تكون خلصت كل حاجة يقول لك: «ليه عملت دي كده بس؟ عارف إنت لو كنت سألتني كنت قلتلك تعملها إزاي» مع إنك قايل له من زمان.. في المواقف اللي زي كده اوعى تتعصب، ابشتم بكل هدوء وقول له «انت صح، أنا الغلطان»!
٢٠. الناس بتضايق لما حد يتكلم عليها في الشغل.
٢١. الناس كلها بتكلم على بعض في الشغل.
٢٢. الناس اللي مع بعض في الشغل لما بيخرجوا مع بعض بعد الشغل يتكلموا عن الشغل.
٢٣. أكثر وقت بتفتكر فيه إنك محتاج تدور على شغل هو أول ما بتوصل الشغل.
٢٤. الـ(إنترفيو) مش جواز صالونات، ماتعملش فيها ملاك وقول الحقيقة أحسن.
٢٥. مهيا كان سقف طموحك عالي، سيب لنفسك مساحة أمان عشان ماتصدمش وافتكر إنك رايح تشتغل مكان واحد ساب الشغل ده عشان يروح مكان تاني.
٢٦. فيه ناس بنصاحبهم عشان نعرف نشغل معاهم وناس بنشتغل معاهم بس ماينفعش خالص نصاحبهم.
٢٧. مش عشان فيه واحد سلم عليك في الشغل عمله إضافة على

- فيسوك. اختار مين يبقى (صديق) ومين يفضل (زميل).
٢٨. ماتحاولش تبقى الصدر الحنين أو المصلح الاجتماعي. احنا مش في مصحة.
٢٩. ماتعمدش على الود والصدقة في الشغل، كله بييجي وقت الحد ويجري.
٣٠. حاجتين بيقللوا بركة المرتب، كروت الائتمان وجملة أهو على قد فلوسهم.
٣١. كلنا بنشتغل عشان الفلوس وبعد الفلوس بتيجي الحاجات الثانية.
٣٢. الفلوس بتصرف ويتروح لكن علاقاتك بالناس بتفضل. خليك كويس مع الكل وسيب ذكرى عدلة يفتكروك بيها، الإنسان سيرة.
٣٣. مافيش شغلانة بتتخّن عشان قعدة المكتب، بلاش حجج فارقة. بطل أكل عمال على بطل وانت تخس.
٣٤. يوم الخميس يوم شغل عادي مش جزء من ال weekend. ماتعملش خطط جبارة عشان هتبقى نعسان. آخرك تقعد على القهوة شوية وتروح.
٣٥. ماترتبطش بواحدة من الشغل غير لو ناوي تتجوزها.
٣٦. ماتتجوزش واحدة من الشغل غير لو واحد فيكوا ناوي يروح شغل تاني.
٣٧. في الشغل إن كان لك عند الكلب حاجة (اوعى) تقول له يا سيدي، الناس هتحترمك أكثر وانت كمان هتحترم نفسك.
٣٨. اتكلم مع الناس عن الناس الثانية كويس عشان انت مش عارف مين يعرف مين.
٣٩. ادي كل حاجة حقها يس ماتنساك نفسك.
٤٠. اوعى (تحب ما تعمل حتى تعمل ما تحب)، شوف انت بتحبها واجري وراه. ماتستناش تحصل لك معجزة.
- ياااه.. كل دي قواعد. طيب بها انك خلصتي، تسمحيلي أسألك

يا ترى انتي... بتحبي ما تعملين ولا بتعملي ما تحيين؟
 - الاتنين. أنا بأحب شغلي جدا، لكن برضو بأحب الفن والأدب
 وخصوصا الكتابة. الكتابة هي (أفيوتني المفضلة) زي القهوة ومع ذلك
 فعدت سنين مش قادرة أستغنى عن الوظيفة الثابتة، جايز جبانة، جايز
 اتعودت، لكن طول الوقت كنت حاسة إن فيه حاجة ناقصة، كنت حاسة
 إن لازم أرجع أكتب، لازم أقعد وأكتب. كنت دايا باقول لما أفضي
 هاكتب، أول ماتيجي الأجازة هاكتب، وبرضو ماباكتبش.
 - عندنا أزمة حب وإخلاص.

- يعني إيه؟ مش فاهمة.
 - فيه ناس بتحب شغلها لكن مش مخلصه له، بيشتغلوا حاجة واتنين
 وتلاثة فتكون النتيجة إنهم بيهملوا في شغلهم اللي بيعبوه ومع الوقت
 ينسوا هما حبوه ليه. وناس تانية مابتحبش شغلها لكن مخلصه له، خايقة
 حتى تدور هي بتحب إيه. فيه ناس بتحب هوايات ماينفعلش تتطور وتبقى
 شغلانة، أو خايقة تركز فيها وتحليها شغلانة، فيتخون حبيها لهواياتها مع
 شغل مابتجهوش.

- عندنا أزمة حب وإخلاص، حلوة الجملة دي. المهم أكمل لك،
 دخلت الشركة صبحت على أمين وعادل، رجال الأمن الشرفاء، وقبل ما
 أوصل مكتي وبالضبط عند الأسانسير قابلته وهو واقف لوحده وأول
 ماشافني ابتسم وقال لي: «Good morning»
 - صباح الخير يا محمود.

- أشيل معاكي حاجة؟ Do you need help?

بعيسته بوش خالي من أي ملامح أو تعبير وقتله: «شكرا»

- Are you okay؟ أنا ضايقتك في حاجة؟

- بص يا محمود... انت عندك كام سنة؟

Twenty Seven.

- حلوة... ٢٧ سنة. يعني أصغر مني بسنة.

- لا أصغر منك بـ ٨ months بس!

- اسمعني بس، أنا أكبر منك وعارفة مصلحتك. انت دلوقتي تطلع

مكتبك في إدارة التخطيط وتقعده تشتغل. اعمل خطة للشهر، اعمل خطة سنوية، ولا أقول لك، اعمل خطة استراتيجية لمدة ٣ سنين الجايين. ماشي يا محمود؟ يلا يا بابا بالتوفيق!

ودي غالبا طريقتي في إنهاء المحادثات عديمة الهدف اللي يفتعلها (محمود المشد) معايا كل يوم قدام الأسانسير وأنا طالعة المكتب أو نازلة منه. محمود شاب محترم ومجتهد لكن لسبب ما (تقيل) جدًا على قلبي، طلعت المكتب، صبحت على مایسة من بعيد لبعيد عشان ما فتحتش على نفسي (فاتوحة) تضيعلي ٣ ساعات من اليوم.

قعدت على المكتب، فتحت اللاب توب وشربت الكابتشينو الصباحي المتين من إيدين عم (كامل)، أطيب وأجدع مسؤول بوفيه فيكي يا مصر وبكده أبقى عملت كل طقوس (رش الميا قدام الدكانة). ندمت على عم كامل وسألته: «باقول لك إيه يا عم كامل، هو الشغل بالنسالك إيه؟» رد وقال لي: «الشغل، الشغل شرف والإيد البطالة نجسة. انتي علوزة تشربي حاجة ثاني يا أستاذة؟»

- لا شكرا. طب سؤال ثاني، انت بتيجي في المواصلات والزجما ويتوصل عيالك المدارس الأول، إزاي بتوصل المكتب هادي كده؟
- المكان ده مكان أكل عيشي، رزقي ورزق عيالي يا أستاذة. عمرك شفتي واحد بيعترض على الرزق؟
- يا سلام عليك! هتشريني إيه بقى؟ عندك (كراميل مكياتو)؟
- نعم؟

وقبل ما أشرح للراجل الطيب الدوا اللي مافيش دكتور كتلي عليه دخل علينا عبد الرحمن زميلي وصديقي وقال: «إحم إحم، صباح الخير»
- خلاص يا كامل سك على المشاريب عشان أستاذ عبد الرحمن «
وإحنا الشاي في الإدارة على قدنا انت عارف.
- ارحمي نفسك من الهزار والتريقة وقوليلي «صباح الخير يا عبد الرحمن».

- صباح الخير يا علي يا ابن الناس الكويسين.
- يعني إيه؟

- جملة من فيلم (سهر الليالي)، مش عارفة يا عبده؟

- مش فاكراه قوي.
- طبعا واحد عامل ٢ ماجستير ودكتوراه ومدير قد الدنيا، أكيد
مايفترجش على تليفزيونات. المهم، تشرب إيه؟
- لا سبقتك وشربت الشاي معاها في البيت الصبح. عندك شغل

كثير؟
- آه، فيه تقرير عاوزة أكتبه بتركيز قبل الدوشة ولازم أبص على الCVs
اللي جاتي من عندكم عشان الموظف الجديد اللي عاوزة أعينه. وبالمناسبة
دي، أنا باناشدك كمدير موارد بشرية إنكم بعد كده تكتبوا في إعلانات
الوظائف «Arabic is a must» العيال طالعة خواجات خالص يا عبده!
- صحيح. الجيل الجديد لا عارف يكتب عربي صح ولا يتكلم حتى.
- احنا ماكانش كده، كنا بنحب نتعلم لغتنا وبنجتهد فيها.

- صحيح.
- صحيح، نهلة مراتك عاملة إيه؟
اداني ضهره ومشي ناحية شباك المكتب ولما وصل عنده قال لي: «نهلة
كويسة»

- قد إيه مراتك دي محترمة وجميلة، وبيتك عاملة إيه؟
رد وهو يبيص من الشباك على الشارع: «تمام الحمد لله. أبوها هو اللي
مش تمام»

- انت بتخزي العين ولا إيه يا عبده؟ انت إيه المشاكل اللي عندك يعني؟
ده انت عندك كل حاجة!

لف ومشي بالراحة ناحية الكرسي اللي قدام مكتبي لحد ما وصل عنده
وقعد وقال لي: «تعرفي، أنا عملت كل حاجة أهلي طلبوها مني، حققت
كل حلم حلموه، تجاوزت البنت اللي هما اختاروها، اشتغلت الوظائف
اللي كانوا شايفينها كويسة، خدت الشهادات اللي نفسهم فيها. تعرفي إن
ماكانش المفروض أنا اللي أعيش الحياة دي؟ صدقيني، دي كانت خطة
مرسومة لحياة أخويا الكبير، أما أنا فكان عندي أحلام تانية خالص. كنت
باحب بنت ماتنا سبنش من وجهة نظر أهلي، كنت باحب ألعب جيتار،
كنت عاوزة لف الدنيا أغني وأعزف، لكن لما أخويا أصر إنه يسبب البلد

ويهاجر.. مافضلش غيري يحقق أحلامهم. وفعلا، بقيت عايش الحياة المثالية اللي انتي شايفها دي».

بصيته وأنا مصدومة ومش قادرة أنطق كلمة، ابتسم ابتسامة توجع القلب وقال لي: «رنا يكفيكي شر حياة عايشاها بدل غيرك»
خدت الكلمتين دول وسبحان اللي خلاني أكمل اليوم وأشتغل وأنا عقلي لسه يفكر في كل كلمة قالها عبد الرحمن.

وما بين الاجتماعات والإيميلات وحل المشاكل وتقديم الخطط وتعديلها وتنفيذها، بيعدي يوم الشغل ولسه فيه حاجات كثيرة تعمل، لكن لحسن الحظ النهارده خلصت تقريبا كل اللي ورايا الساعة ٦ بالقبض. قفلت اللاب توب ولبت حاجتي ونزلت جري على السلم ماستيتش الأسانير.

مشيت وأنا يفكر.. ازاي إحنا غلابة كده؟

كلنا بتجري ونسعى ونعيش ونموت بندور على حاجة مش عارفين هي أصلا إيه. ناس بتسميها (السعادة) وناس بتسميها (الرضا) و(راحة البال)، زي اللي بيعجري ورا هدف متحرك، هو يجري والهدف يجري قدامه. لا عمره هيحصله ولا عمر الهدف هيقف ويستناه.

بتتبرق قوي بالأماكن الفخمة، فنادق خمس نجوم، عربيات مرعبة، رحلات لجزر (المالديف) و(الكاريبى)، مع إن راحتنا ممكن تكون في مكان بسيط، في وسط عيلة، في حضن حد بنحبه ومتطمنين معاه.

بنفرح قوي بكل جنيه بيزيد في المحفظة والبنك، مع إن السيمنون فيميه يشبع، والقطيرة أم سمنة وسكر بتشبع، وكوز الدرّة يشبع. شاغلين بالنابالي ناقص في دواليبنا اللي أصلا مليانة مع إن الجسم واحد والطول معروف والوزن مش فارق كثير.

بنشترى عشرين كرسي وكنبة ونقعد على كرسي واحد، بنام على نفس الناحية في السرير بقالنا سنين، بتتظمن لما بنشترى، بنحس بالانتفاء ناحية الأشياء، بنشتغل فوق طاقتنا عشان ناخد فلوس ما بنصرفهاش ويوم ما نصرفها بنجيب حاجات ما بنستخدمهاش أو مش محتاجينها.

وفي وسط كل ده بتروح علينا كام قعدة حلوة، وأكلة سخنة، وضحكة من القلب، وحضن دافي.

- جازيز البشر كائنات محبة للاقتناء. لكن قوليلي، إنتي ليه اتصايقتي من (Good morning)؟

- إيه؟

- ليه اتصايقتي من كلام محمود المشد ده مع إن انتي كمان بتقولي كلمات كتير بالإنجليزي في وسط كلامك؟

- ماتصايقتش. أنا بس باغير على لغتنا العربية الجميلة. انت لو مابتكلمش إنجليزي خالص مش ماتصايق منك لكن هانبهك لأهمية اللغات الأجنبية في عصرنا ده، أما لو مابتكلمش عربي أكيد هاتصايق منك وهاتصايقك متي كمان. ماينفعش ماتكلمش لغة بلدك، ماينفعش ماتنفعش في حبا قبل ما تتعلم أي لغة تانية أصلا.

عارف، سنة ٩٣ كنت في المغرب مع ماما وكان هدفها الأهم في السفرة دي إني أرجع باتكلم مغربي كويس. بعد كام يوم كادت تفقد الأمل فاقترحت عليا أنزل ألعب مع ولاد الجيران في الجينة تحت العمارة جازيز ألقط منهم كلمتين. وبالفعل عملت كده وفي أقل من ساعتين طلعتها ساحبة ورايا عشرين طفلة وطفل مغربي بيتكلموا مصري (ليلب)!

مش قادرة أنسى رد فعل ماما لما سمعتهم يقولوها: «إزيك يا طنط؟ عاملة إيه يا حبيبتشي؟» ليها الجنة الست دي والله!

- بس أنا فاكر إنك بتكلمي مغربي كويس؟

- أيوه. أكيد اتعلمت اللهجة المغربية لكن بعد ما كبرت. وفي يوم سألت أمي: «انت ليه ما علمتينيش أتكلم لهجة المغرب، بلدي الثاني، مع المصري من الأول؟» وبصراحة ردها كان مقنع جدا. قالتلي إنها أول ما جات مصر، ماكانتش عارفة تتكلم كلمة مصري، كانت بمجرد ما تنطق بكلمتين بيعرفوا إنها (خواجاية). لكن هي فضلت تحاول وعملت مجهود جبار وفعلا اتعلمت اللهجة المصري لحد ما أتقتها، عملت المجهود ده كله عشان تعرف تربي بنت مصرية، مصرية (بجد). الأم لو مش مدركة أهمية السن الصغير في اكتساب الطفل لهويته وثقافته هيطلع متلخبط، زي اللي واقف على السلم، حاجة مايعه صايصة، ومادة خصبة لسخرية زمايله منه في المدرسة وده هيقتضي على ثقته بنفسه بدري وهيري فيه إحساس إنه (مختلف) بس بشكل سلبي.

- تعرفي إن عينيكي بتلمع وانتي بتحكي عنها، هي فعلا ست عظيمه
المهم، عملتي إيه بعد كده؟

- وصلت ستاريكس عشان أقابل سميحة صديقتي، أجدع وأذكى بنت
في الدنيا. لو أنا عاقلة وموزونة، سميحة أعقل مني ١٠٠ مرة. يومها قعدت
أهزر معاها وأقول لها الجملة اللي باقوطهاها من ساعة ما بقينا صحاب: «لو
كتي ولديا سميحة كنت اتقدمتلك من أول يوم قابلتك فيه»
ابتسمت وهي بتصنع الجدية وقالتلي: «لو حد غيري سمع الكلمتين
دول هيشك فيا وفيكي على فكرة».

- أنا باتكلم جدا! انتي تقريبا فيكي كل حاجة أنا بالنهاها، جدعنة، كرم،
طموح، ذكاء، دماغك كبيرة وما بتقفشيش، مركزة في حياتك وشغلك،
بتسوقي كريس وبتعرفي تركني كمان.

حطت إيدها على بقي عشان أسكت وقالتلي: «طيب كفاية عشان
الموضوع بدأ يبقى (مريب) شوية!»

وقامت ضاحكة وأنا كمان ضحكت على ضحكها وبعدين مسكت
مج الكابتشينو بين إيديها الاتنين ويصت بعيد ورجعت بصتلي زي اللي
مستياي أسأها عن حاجة معينة عشان تحكي اللي هي عاوزة تحكيه.
- وصلتني لإيه معاه يا سميحة؟ كلمك؟
- لا.

- طب، هتعملي إيه؟

ردت بحزن وكسرة نفس وقالتلي: «مش عارفة، ما عرفش. كل اللي أنا
عارفاه إني باحبه ومش شايفة غيره. كل الرجالة في عيني هو».
- طب اتكلمي معاه، قولي اللي في قلبك، أكيد هتوصلوا للحاجة.
- ما بقاش ينفع. فيه حاجات بتبقى مشروخة ويوم ما بتكسر بتني
فتنافيت، ما فيهاش حجة ممكن تلتزق جنب الثانية.
- مش قادرة تنسيه؟

سألها السؤال ده زي ما يكون نفسي تقول لي «لأ قادرة»، لكن سميحة
عصرها ما بتكذب. ردت بمرارة فيها قوة وتحدي غريب وقالتلي: «مش
قادرة أنساه أيوه، باشوف الرجالة كلها هو أكيد، لكن هيجيلي يوم ولازم»

أقوم، لازم أعرف التحيل نفسي مع حد غيره، لازم أشوف إن الحياة بتمشي
سالتها: «ده نضج عاطفي ولا كلمتين فض مجالس؟»
- ده لقاء أعلى درجات اليأس مع المنطق. لما الست بتعمل كل اللي تقدر
عليه عشان علاقتها باللي بتجبه تنجح، لما تشيل همه كأنه همها، وتفكر فيه
قبل نفسها، لما تفرح بأي حاجة تتعمل عشانها وماتلاقيش حد يقدر اللي
هي بتعمله، يوم ما تتأكد إنه مافيش فايده، يوم ما تسمع ضحكة الاستهتار
بمجهودها وتعبها وتشوف الخيانة بعينها، بترمي الراجل بطول دراعها
زي ما يقولوا وما يتبصش وراها تاني أبداً. الست يوم ما تقرر إنه (كفاية
لحد كده) يبقى كفاية بجد.. وخلاص خالصنا.

- ما قابلتش حد في عقلك يا سميحة. ساعات الفضول بياكلني وبياقي
نفسى أعرف حيتي فيه إيه؟

- كان طيب وجدع، كان بيسمعني، كان بيسمع.. في الأول على الأقل
لكن دلوقتي مش سامع حد غير نفسه.

بصيت لسميحة القوية الشجاعة الجريئة ولأول مرة أشوف عيونها
السودا الجميلة حزينة ومهمومة، ابتسمت وقربت منها وقتلتها: «عارفة
يا مبسي، أنا دايماً أقولها كلمة.. لو قابلتي واحد يسمعك ومركز في اللي
بتغوليه لدرجة إن عينيه مش بترمش يبقى حاجة من اتنين؛ يا معجب بيكي
ويحاول يبهرك، يا سرحان في حاجة تانية خالص.. جعان مثلاً!»

ضحكنا إحنا الاتنين وقعدنا بعدها ندردش في أي مواضيع مالهاش
لازمة لحد ما بدأنا نتناوب، سلمت عليها بعد ما وعدتني تشيل أي أفكار
سلية من دماغها وتسبب كل حاجة للوقت.

كلام سميحة فضل يرن في ودني طول الطريق: «كل الرجالة في عيني
هو» هو فيه حد ممكن يجب حد بالشكل ده وفي الآخر يسيه ويتخلى عنه
بالحجود والقسوة دي كلها؟

وصلت البيت، غيرت هدومي، عملت كباية شاي أخضر بالتنعاع
وقعدت في السرير أقرأ، وخلال ربيع ساعة كنت نمت على نفسي وأنا
حاجنة الكتاب كالعادة وبعد شوية تليفوني رن، بصيت في الساعة لقيتها
«١١:٣٠ بعد نص الليل: «الحقيني!»

- حادثة المرة دي يا مایسة ولا إيه؟؟
- لا لا أنا كویسة أنا مكلماكي أسألك سؤال. تفكرني أنا فیا حاجة غلط؟

- نعم؟
- أنا، أنا وحشة مثلا أو فیا حاجة غلط؟
خذت نفس عمیق وكتمتة شوية وردیت:
- لا يا مایسة.. لا يا حیبتی.. بالعكس انتی بنت شاطرة وجميلة كمان..
ده أنا نفسي أتمناكي!

- أمال إيه؟ ما عندهمش نظر لیه؟؟ فهمیني! أنا كل صحابي اتجوزوا وأنا مافيش موضوع بيكمل لي!!

- لا!!!!!! يا مایسة كده كتیر! والإنسان طاقة! مانكرش إني حاولت أتجاهل الأمر في البداية لكن الموضوع كده مايتسكتش علیه. أنا بقالي ستین باسمع منك جملة «أنا كل صحابي اتجوزوا»، طب ما يتجوزوا يا مایسة! ما يتجوزوا ياختي! ما يتجوزوا! فیها إيه یعنی؟ فتحوا عكا یعنی؟ حرروا القدس؟ سدّدوا ديون مصر؟ ما يتجوزوا! ألف مبروك لیهم، رينا يسعدهم، قولي آمین كده؟

- آمین يا ستي آمین! أنا بس بأسأل مش هيسجي دوري بقي؟ هو أنا ماليش نفس؟

في اللحظة دي كنت بدأت فعلا أتترفز، عدیت في سري ١..٢..٣..
شهیق.. زفير.. شهیق.. زفير.. اهدي.. اهدي.. سيكاها!!!!.. سيكاها!!!!.
وبعدین قتلتيها: «يا مایسة، يا حیبتی.. خلینا ناقش الموضوع بشكل منطقی عقلانی متوازن خالی من أي هراء أو هرطقة، OK؟»
Ok-

- لیه كل صحابك اتجوزوا يا مایسة؟
- أنا اللي بأسأل.

- أنا أقول لك لیه، عشان انتی وصحابك رسميا في السن اللي الشرع والقانون والأعراف یسمحوا فیہ بالزواج. ما حدش كان بیتجوز أيام ما كتتم في الإعدادية، صح ولا إيه؟

وقبل ما ألحق أجاب على السؤال ده.. نعمت!
 - سؤال مهم جدا نسأله لنفسنا فعلا. ووصلتي لحاجة؟
 - وصلت للي أنا فيه ده.
 - مش فاهم.

- متفهم كمان كام يوم، قصدي بعد ما أحكيك اللي حصل بعد كده..
 ثاني يوم، صحيت في ميعادي من غير منبه، وكالعادة صليت وحمدت ربنا
 إنه اداني يوم جديد أعيشه. نظيت في فستان بيج وقميص جيتز وسلمت
 على ماما وبُست راسها وخذت دعوة كل يوم:
 «روحى يا بتي ربنا يحب فيكى خلقه»
 نزلت وأنا مقررة إنى هابقى هادية طول اليوم ومش هاخلي أي حاجة
 تعكر مزاجي. نزلت من البيت وكالعادة.

- صباح الفل يا دكتورة.
 - صباح الخير يا عم ناجح. هو (إبراهيم) مش حاسس إن ربنا خلق
 أماكن للركنة غير قدامي؟؟؟

في اللحظة دي افكرت إنى مقررة أبقي هادية: «طيب يا عم ناجح، يا
 ابن النوبة يا أصيل، ممكن بعد إذنك تطلع تندهله عشان يشيل العربية؟»
 طلع عم ناجح وسابني واقفة على باب الجراج وبعد شوية عدى شاب
 وقال «الله» ولسه هاقول في سرّي «اللهم قوّي إيمانك» لقيته بيقول: «على
 الجبال والحلاوة» كنت هالف وأرد عليه لكن قلت لنفسي: «خلاص
 المسامح كريم. أنا هادية، أنا مبسوطة، أنا Cool»

فضلت مستتية كثير، وبعد ربع ساعة تقريبا نزل. بصيقله بنرفزة وقتله:
 «إبراهيم! انت مش حاسس إن.. صباح الخير!!»

ماحاولتش أبالغ في تفسير رد فعله البلاستيكي الخالي من أي ود وقلت
 أكيد اتأثر بطباع الأجانب بعد معاشرته لهم ١٠ سنين. مش مشكلة، أنا
 هادية.. أنا مبسوطة.. أنا Cool.

وقفت حوالي ٢٠ دقيقة في إشارة ميدان الجلاء وأنا مصرة الابتسامة
 متفارقش وشي برضو. قد إيه الشوارع عندنا رومانسية. باستغرب جدا
 من البنات اللي بتشتكي من افتقارهم للمشاعر الرومانسية والحب في

- طيب كملني.
- وصلت الشارع اللي فيه شغلي بأعجوبة، ركنت وحاولت أمشي على
الرصيف زي أي مواطن صالح وأنا ضامة دراعاتي عليا على الآخر ومع
ذلك كل شوية ألاقي نفسي باخد (نص حصن) من اللي رايح واللي جاي،
حتى لو الرصيف فاضي.

غير بقى اللقطات الرومانسية قدام مطعم الفول والطعمية اللي على
ناصية الشارع. تلاقيني الراجل من دول واقف وهاتك يا حشر، (مقرمة)،
الساندوتش بالنسباله لقمتين، واحدة في بقه والثانية في إيده. رومانسية
رهية باقول لك!

دخلت الشركة، صبحت على أمين وعادل رجال الأمن الشرفاء،
وطلعت المكتب، صبحت على مايسة من بعيد لبعيد. قلعت الجاكت
وقعدت على المكتب، فتحت اللاب توب وشربت الكابتشينو الصباحي
المتين.

- باقول لك إيه يا عم كامل..

- أو مري يا أستاذة.

- هو انت يتحب بتك أكثر ولا ابنك؟

- باحب الاتنين قد بعض يا أستاذة.

- طيب بتخاف على مين أكثر؟

- باخاف على الواد. البت عاقلة وراسية وطالعة لأمها ناصحة، الواد

خايب خالص ومغلبني.

بصيت لكامل وضحكت وفجأة ويدون سابق إنذار سمعت حد بيقول

في ودي بحماس رهيب: «Good Morning, My Favorite colleague»

- خضتني يا محمود. صباح الخير.

وفي اللحظة دي دخلت مايسة زي القضا المستعجل وبصت لمحمود

بقرف شديد وقالتله: «انت بتعمل إيه هنا؟!»

الولد يا عين أمه اتصدم وبصلها شوية وعدل النظارة على وشه وقال

ها: «Sorry»

- أبو من إيدك كفاية إنجليزي!! أساعدك إزاي؟

.. Well.. أنا مش محتاج منك مساعدة يا مایسة، أنا جاي أتكلم معاه هي بس شكلكم (busy).

- أبوه يا محمود. !! We are very Busy !!

طبعاً كان لازم أتدخل وأمنع التين المجنح قبل ما تبخ نار من بقها في وش الواد. قتلها: «خلاص يا مایسة خلاص. ماعلش يا محمود، حطك عليا أنا، قول طيب كنت عاوزني في إيه؟»

اتكسف جدا ووشه بقى لون الظماطماية وقال لي وهو بيعدل نظارته تاني: «لا خلاص It's Ok.. نتكلم بعدين.. Excuse Me»

خد بعضه وخذ الباب في إيده وسابني أنا والتين المجنح أقصد مایسة: «فيه إيه يا مایسة؟ انتي كل يوم تبخي في واحد كده!» - نرفزني!

- لا اهدي. هو صحيح محمود ثقيل شوية بس مش كده. باقول لك إيه، ماشفتيش حسين؟

وفجأة ظهر (حسين زكي) زميلنا زي ما يكون سمعني. اتقنيت في اللحظة دي أكون فكرت في حاجة أهم شوية من حسين، هو صحيح إنسان طيب وعلى نيته لكن فيه خبث وجبروت الراجل المصري النموذجي: «صباح الفل على أحلى وأجمل وأرق وأطيب و..» - Bonjour عليك يا حسين.

- أنا سمعت اسمي وأنا داخل، أوامري يا قمر؟ - أبوه أنا كنت فعلاً عاوزاك في حاجة مهمة، يوه نسيته! مش فاكرة. روح مكتبك طيب وهابقى أجيلك لما أفتكرك.

- طيب. لسه مش لاقياي عروسة من صحباتك الحلوين اللي يتعدوا معاك في ستاريكس دول؟

- أه افكركت!! ابعثلي حالا التقرير اللي أنا طلبته وابتعت للناس فكرهم بالاجتماع ولأ يا حسين مالفيتش عروسة واصطبح كدا وقول صباح الخير! جات النجدة من السماء ساعتها أقصد جه عم (كامل) الطيب قبل ما حسين ياكل ودني في موضوع العروسة اللي عاوزني أشوفهاله دي: «تشرّب حاجة يا أستاذ حسين؟ تشرّب حاجة يا أستاذة؟»

- لا أستاذ حسين مستعجل وهمشي يا عم كامل، هو المثل يقول امشي
في جنازة ولا تمشي في إيه؟

- جوازة يا أستاذة!
وبين الاجتماعات والإيميلات والمشاكل بيوعي يوم الشغل دايا ولسه
فيه حاجات كتيرة تتعمل. خلصت في ميعادي، قفلت اللاب توب وملت
حاجتي ونزلت جري على السلم ماستنيتش الأسانسير لكن قبل ما أخرج
من باب الشركة قابلته: «Leaving early today? ماشية بدري يعني؟»
- آه فيه حاجة؟

- No..No.. انتي كويسة؟

- ليه شكلي تعبان؟

- بالعكس.. You look very..

- سلام يا محمود.

خذت بعضي ومشيت وبعد ١٠ دقائق ركنت قدام ستاريكس ودخلت
عشان أقابل كاميليا صاحبتني أنا وسميحة (الأنثيم) وكلمة الأنثيم في
قاموس البنت المصرية هي البنت اللي معاها صحيفة سوابقك كلها
وماسكة عليك حاجات تداخلك السجن، البنت اللي مابتكسفيش
تضحكي معاها زي الطبله أو تعيطي زي العيال وفي نفس الوقت
مابتكسفيش (تاكلي) قدامها، تاكلي كتير قوي. لقيتها بتقول لي: «عارفة
كل شوية باقابل مين بالصدقة؟»
- مين؟

- حسين. تاخدي حطة؟

- لا شكرا. حسين مين؟ حسين زكي اللي معايا في الشغل؟ بتقابليه فين
يا كاميليا؟

- هنا في ستاريكس. كل شوية أتكعبل فيه هنا، ساعات بابقى لوحدي
وساعات بيقي معايا سميحة.. بيجي يسلم علينا ويقعد يرغي ويقولني إنه
لسه شايفك الصبح في المكتب.

- آه خلقتنا في حلقة بعض كل يوم في الشركة.

غطت وشها بيأيديها الاتنين وقالتلي: «المصيبة إنه كل ما يشوفني أبقى
باكل!»

- مش هتبطلني طفاسة أبدا يا كاميليا!

- ماعتقدش!

بصت كاميليا للطبق اللي قدامها ومسكت الشوكة وقعدت تلعب بشوية فتافيت وتوضبهم على جنب ويعدين تنعكشهم تاني وبعد شوية سألتني: «فاكرة يوم عيد الحب اللي فات؟»

- طبعا فاكرة. ده إحنا يومها أكلنا أكل! أنا مش هاكل أكل صيني تاني في حياتي، أنا قعدت يومين عندي إسهال!

- عاوزة أقول لك إني روحت البيت بعدها كلت شوكلاتة كمان.

- مش باقول لك طفسة يا كاميليا.. ارحمي نفسك شوية!

- باحب الأكل.. أعمل إيه.. باطلع همي فيه.

- افضلي كده لحد ما هيبقى عرضك قد طولك، هتتحولي لبلاكار صغير انتي حرة!

مسكت كاميليا الشوكة وحطتها في الطبق فوق السكينة وقالتلي: «باقول لك إيه، هو إحنا كل سنة هنتحتفل بعيد الحب مع بعض كده؟ أنا زهقت!»

- كده يا كاميليا؟ زهقتي مني ومن سميحة؟ خلاص روحي شوفيلك حد تخرجي تاكلي معاه طالما مش عاجبك الخروج معانا!

- عاجبني والله لكن هاتجنن! ٣ بنات زي الفل يفضلوا بطولهم كده للأبدا الرجالة عميو؟

- أو بيشوفوا بس لسه النصيب ماجاش يا كاميليا.

- تعرفي إني عمري ما ارتبظت بحد قبل كده.

- عارفة طبعا يا كيمي، هو أنا لسه مقابلاكي امبارح؟

- تخيلي عندي ٢٩ سنة وماعرفش إيه إحساس البنت لما ولد يكلمها في التليفون يتطمئن عليها ويرغوا بالساعات، ماعرفش إيه إحساس البنت لما يجيلها ورد مثلا، ماجربتش أبقى في علاقة فاشلة وأتجرح وأعيط.

- ماتقلقيش مش فايتك كثير.

- عارفة أنا إيه مشكلتي؟ مشكلتي إن عمري ما حسيت إن أنا مميزة. كبرت واتريت في بيت عادي، دخلت كلية عادية، اشتغلت في مكان

عادي، حياتي هادية وعادية جدا. كنت باخاف أرتبط بحد أحسن يزهدق
مشي عشان مش هاعرف أفتح مواضيع، مش هالاقمي حاجة أقولها له. فاهمة
حاجة؟

ابنمت وقتلها: «فاهمة يا حبيبتي، لكن ده مش صح. لازم تكوني
مقتنعة إن اللي هيحبك لازم يحبك عشان ده إنتي بكل مميزاتك وعيوبك،
إنسانة فيكي الخلو والوحش، لازم يحبك ويستمتع بصحبتك وروحك
مش بشطارتك في فتح مواضيع مثيرة. مش مطلوب منك تقومي بدور
التليفزيون في العلاقة اللي تدخلها!»

فعدت تضحك وقالتلي: «أنا عارفة ومؤمنة بوجود الحب جدا، مؤمنة
إن فيه ناس زي أمي وأبويها يعيشوا يحبوا بعض لحد آخر يوم في عمرهم،
مؤمنة إن الحب ممكن يكون قدام عينينا وإحنا اللي مش شايفينه، مؤمنة
كمان بالحب من أول نظرة وإن فيه ناس ممكن تحبنا من قبل ما نتكلم كلمة،
تجنا من بعيد لبعيد، ممكن يكون الحب بيخبط على بابنا وإحنا اللي..»

وفي اللحظة دي تليفوني رن، طلعت من الشنطة ورديت فوراً: «ألو،
لما افكرت؟ ولا أعرفك! دي كانت صداقة بلاستيك أصلاً!! أيوه أيوه
كل بعقلي حلاوة. طيب، ماشي ماشي، طيب.. هاجي حاضر لكن مش
عشان أنت صديقي وأعرفك من ١٥ سنة ولا عشان غلاوة طنط عندي
لكن عشان أثبت لك إن البنات أجدع من الولاد وصحاب صحابهم يا
إيحاب. يلا سلام سلام»

وأول ما قفلت معاه لقيت كاميليا بتقول لي: «سلميلي عليه»

- قفل خلاص يا كاميليا. كنا بتقول إيه؟

- كنا بتكلم عن الحب الحقيقي وإنه أكيد موجود. تفتكري الحب
الحقيقي هو اللي بيلاقينا ولا إحنا اللي لازم ندور عليه؟

- أفكر يا كاميليا إننا لازم نلاقي نفسنا الأول ونعرف إحنا مين
وساعتها أي حد هيلاقينا بسهولة. طول ما إحنا مش عارفين إحنا مين
هنفضل تأييد مش فاهمين حاجة، والتايه بيختار غلط ومايشوفش
الحقيقة حتى لو قدام عينيه. أنا هاقوم أمشي بقى، تصبحي على خير.

« حضرت السادة الركاب، بسعدنا لتقديم مجموعة رائعة من منتجات
السوق الحرة على متن الطائرة و... »

- وعملتني إيه بعد كده؟

- رجعت البيت غيرت هدومي وعملت كباية الشاي الأخضر المعهودة
وقعدت في السرير أفرا وخلال ربح ساعة كنت نمت على نفسي كالمعتاد،
والساعة ١١ بالليل جالي تليفون.

- عاملة إيه؟

- تمام يا سميحة. ماجيتيش ليه تقعدني معايا أنا وكاميليا النهارده في
ستاريكس؟

ردت عليا بصوت حزين.

- ماقيش مخوقة شوية

- مالك يا سميحة؟ مال صوتك؟

- أبويا جاييلي عريس.

ماقيش عارفة أقول لها إيه، سميحة مش البنت اللي بتفح أنقلها أو
أعمل لها مقارئة بين جواز الصالونات والجواز عن حب وتفاهم، سميحة
أصلا عاقلة ودماعها توزن بلد. قتلها: «طيب حلوا. هتشوفيه؟»
سكتت خالص وماردتش عليا:

«الو... سميحة؟»

فجأة انفجرت وقالتلي: «لا مش حلوا! مش حلوا! مش حلوا خالص
إني أشوف... مش حلوا إني أفكر... مش عادي نحب حد ٣ سنين وبعدين
نسيه وعادي، مش عادي نحلم مع حد، نعيش تفاصيل ونكوّن ذكريات
وبعدين نسيه وعادي، مش عادي إتنا نفتح قلبنا ونطلع شوية المشاعر اللي
حيلتنا وبعدين نأخذ جملة «مش هيتفح» ونلف ونكمل وعادي...»
- طيب إيه العادي يا حيتي؟

- العادي إتنا لازم نبقى أقويا، نغصب عن عين اللي جابونا لازم نياق
أقويا، لازم مانصحفش، لازم نبقى بنات سوبر... بس أنا مش سوبر...
واتني مش سوبر... تصبحي على خير.

- التي كويسة.
- لا.. بس عادي.

* * *

تعرفي، إني متعاطف مع سميحة صاحبك جدا وحاسس بيها. العلاقات زي الإدمان، وبعد الانفصال طبيعي تظهر علينا حاجة زي (أعراض الانسحاب)، انسحاب الشخص من حياتنا، انسحاب الذكريات، التفاصيل، الأماكن، الحاجات المشتركة. لو العلاقات إدمان فالذكريات هي المخدر نفسه والمادة الفعالة اللي بنسيها عشان تنكد على اللي قدامنا. عاوزة تعذبي حد جدا، اعلمي معاه ذكريات كثير ومسيهاله كلها وامشي.

- متخليني أخاف منك؟

- بالعكس، أنا عمري ما يبيت لحد ذكريات وحشة بهدف إني أعذبه، أنا بامسب ذكريات حلوة ودي يمكن عذابها أقوى. المهم احكي لي أكثر عن موضوع سميحة صاحبك؟

- شوف، قصة سميحة توجع القلب، ملخصها إن الست ساعات بتقف في شهر الراجل ويتنى إن ضهرها هي اللي مكشوف.

- نقدر نسميها (أزمة التخفي)؟

- لا، أزمة الكسل.

- الكسل؟

- الكسل صفة بشرية. لما ترتبط بإنسان ويبقى جزء من حياتك وبعد سنين علاقتكم تنتهي، مش بس بتزهد الحب، إنت كمان بتكسل. بتكسل تبدأ من أول وجديد، بتكسل ترجع تتعود على حد وتعود حد عليك، بتكسل تقول لشخص جديد بتحب إيه ويتكره إيه وتطبعه بطباعك، بتكسل تقول أنت بتحب كام معلقة سكر في الشاي، بتكسل تشرح تاني ليه بتفائل بالينظرون الكحلي، بتكسل تحكيه على الحادثة اللي عملتها بالمعجزة وانت صغير، بتكسل تعيش مع شخص جديد تفاصيل توجعك

لو هو كمان مشي. مشكلة سميحة هي مشكلة كل الناس اللي حبا قوي
ولما فشلوا اكلوا بيدؤوا تاني.
- وبعدين؟

- قفلت سميحة السكة في وشي.. تقريبا تليفونها فصل، وسابتني وأنا
بافكر في السؤال الثاني، إحنا عاوزين نعمل إيه في حياتنا؟ على الرغم
من موقف سميحة اللي ممكن يبان ضعيف أو سلبي عكس شخصيتها
القوية الناضجة، إلا إنها مميزة عني، على الأقل هي عارفة هي عاوزة إيه
وكانت بتحاول توصل له. حتى لو فشلت، حتى لو علاقتها مع الإنسان
اللي اختارته وحبته ماكملتش، على الأقل في يوم من الأيام كانت عارفة
هي عاوزة إيه. لكن أنا بقى، عاوزة إيه؟ عاوزة إيه بجد؟ عاوزة الحب
والارتباط ولمة العيلة والبيت، ولا الشغل والنجاح وتحقيق الذات، ولا
الفلوس أو الشهرة، ولا حبة من كل حاجة. فضلت حوالي ١٠ دقائق
ياسأل نفسي السؤال ده وبعدين تفكير عميق بقى.. نمت!

- خليني أفتحلك الصينية اللي قدامك عشان بدؤوا يقدموا الفطاطر.
- لا أنا مش عاوزة أفطر، مش عاوزة أكل (أكل) يعني.. فاهم؟ اسأل
المضيقة بس لو فيه كيككة بالشوكولاتة أو بسكوت بالشوكولاتة أو أي كائن
بالشوكولاتة أدفن فيها أحزاني جايز تخفف عني وأنا باحكيلك عن يوم
التلات والعياذ بالله.
- حاضر هاسألها. لو سمحتي، فيه عندكم أي حاجة بالشوكولاتة على
الطيارة؟

- فيه يا فندم. دقائق وهارجع لحضرتك.
- شكرا. المهم، كملي لغاية ما ترجع.
- طبعا انت عارف إن يوم التلات ده مش يوم عادي، دي روح شريفة
هدفها تنكد عليك عيشتك وتكسر الفرحة جواك.
يومها صحيت بلدي من غير منه، صليت وحمدت ربنا إنه اداني يوم
جديد أعيشه، ومن غير ما أفطر ولا أعمل أي حاجة نظيت في الجيز اللبني

والقميص الأبيض وضربت نظارة الشمس. سلمت على ماما وبنت
راسها وخذت دعوة كل يوم:

«روحى يا بنتى ربنا يحب فيكى خلقه»
فتحت باب الشقة ونزلت: «يا عم ناجح.. هو مافيش أمل إن إبراهيم

يقفل على أي مواطن مصري ثاني غيري؟»
- أصل يا دكتورة هو كل يوم يرجع الساعة ٦ الصبح مش شايف
جدامه، يدخل الجراج يركن العربية في أي مطرح وياخد شنته ويطلع

يا عيني جري و..
- متحكيلي قصة حياته ثاني يا عم ناجح! وأي حته دي لازم تبقى

قدامي؟ وإيه اللي بيسهره بره للصبح؟ اطلع صحيه بعد إذنك! اطلع!
نزل إبراهيم في أقل من دقيقتين مبتم وسعيد جدا، لابس قميص

مكوي وبنطلون وجزمة متلمعة زي اللي كان مستني ناجح يندهله. وأول
ما شافني جه لحد عندي وقال لي: «صباح الخير. ماعلش أنا آسف أصلي
رجعت تعبان جدا وما صدقت رميت العربية في أي حته وطلعت. عموما

أتمالك يوم سعيد»

بيته من غير ما أقول ولا كلمة. يوم التلات ما يتقالش فيه صباح

الخير، معروفة!

عديت على ستاربيكس قبل الشغل، دخلت لقيت طابور طويل قدام
الكاشير، خدت دوري ووقفت مستنية وكان فيه قدامي اتنين واقفين
يتكلموا بصوت عالي وهاتك يا ضحك. بالنظر كده كان واضح قوي إن
اللي على اليمين هي البنت، لكن اللي على الشمال هو اللي قعدت شوية مش
قادرة أحدد نوعه. بنت ده ولا ولد ولا نبات ولا جناد ولا إيه؟

الأتنين شعرهم نفس الطول ولا بسين بنطلونات (skinny) قوي ومستنية
من نحت، عارف انت البنطلونات اللي لازقة خالص على الجسم دي اللي
بتلبس (حشر) و(دفس)، وكيان قمصان عليها ورد وحفظات ملونة في
إيديهم والعجيب إن حتى حركاتهم وصوتهم واحد.

قلت لنسي، الكائن ده - والله أعلم - يا ست (مسترجلة) يا راجل
(مست)

ماخيش عليك الفضول كلني، فضلت أبحلق يمين شمال فوق تحت
مافيش فرق. وبعد محاولات كثيرة فشلت كلها، عرفت أخيرا لما الكاشير
قال: «أفضل ٢ كابتشينو يا أستاذ»

أستاذ!! ده إيه الوكسة اللي احنا فيها دي؟ يوم التلات والكائن ده يطلع
أستاذ!!

ده على أساس إن الرجالة الكويسة كثيرة ومتلقحين في كل حنة وعادي
نضحى بجزء منهم ونقلبه (كائنات) لا طائلة ستات ولا رجالة!! إيه
الموضة الزفت دي هو احنا ناقصين؟؟ ده مافيش رجالة أساسا ده اللي
موجود كله أشلاء، (بواقى)!

- وإيه اللي فيها؟ أنا مستغربك شوية خصوصا إني عارف قد إيه إنتي
شخص متفتح وبيقبل الاختلاف.

- مش بس باقبل الاختلاف، أنا كمان باحترمه طالما الشخص مش
بيضرني لكن بصراحة عندي مشكلة في تقبل الملابس الـ (unisex) اللي مش
بتبين ده ولد ولا بنت!

- هي فعلا موضة غريبة.

- أنا عارفة إنه صعب نرجع زي الخمينات لما كانت الستات شكلها
جميل وبتلبس فساتين شيك والرجالة شكلهم أجمل ويلبسوا بدل شيك
برضو، وأكد الحل مش إتنا نمع البنطلونات للستات عشان نعرف
نميز، ولا أنا متفائلة إتنا هنعرف نرجع زي الخمينات، أنا بس عندي
رجاء شخصي للأخوة الرجالة، لو ناوي تلبس الحاجات الـ (unisex) دي
براحتك، بس ماتنساش وحياة والدك تدينا أمانة نعرفك بيها من غير ما
نحتاج لكشف طبي زي اللي في التجنيد!

- إحم. متشكر جدا!!

- لا وانت ذنبيك إيه! ده انت فلة! المهم، وصلت الشغل بعد محاولات
مستمية عشان مادلقش المكياتو على نفسي مع كل فرملة بسبب اليه اللي
سابق العربية اللي قدامي ويبتكلم في الموبايل ومش مركز في السواقه!
ركنت ودخلت الشركة وقبل ما وصل مكنتي قابلته: «Bonjour!»
- إيه Bonjour دي؟

- صباح الخير بال (French)، أصلك بتضايقني لما باقول كلام (English)
 - لا أنا عارفة الترجمة بتاعة (Bonjour) يا محمود، أنا باسأل إيه السبب؟
 - لقبك ماشية متوترة قلت أشوف مالك. انتي فيه حاجة مضايقاكي

مني؟

لا.

- طيب إيه رأيك في شكلي بعد ما ربيت دقني، أنا عارف إن البنات
 بتحب الدقون.

- نعم؟

- يقولوا إني بقيت شبه وائل كفوري. ده حقيقي؟
 لغاية اللحظة دي كنت باحاول أتمالك أعصابي وأعدي المحادثة
 اليومية (اللذوذة) دي مع محمود المشد بخير لكن مش لدرجة إنه يقول
 لي إنه شبه (وائل كفوري) يعني، وائل خط أحمر، لا، وائل خطوط حمرا
 بالطول والعرض!!

بصيته بصة رذله وقتله وأنا باجز على سناني: «وائل؟ وائل كفوري
 يا محمود؟؟؟ باقول لك إيه، النهارده يوم التلات واليوم لسه في أوله يعني
 المفروض..»، طبعا حس بغلظته وماستناش أكمل وصلة الرذالة اللي كنت
 محضراها له وقال لي: «خلاص خلاص، Sorry!!»

خد ديله في سنانه وجري وأنا طلعت المكتب لقيت مايسة لامة حوالها
 يجي عشرين بنت يلفطروا سوا ويتفرجوا على حاجة في الكمبيوتر.
 - ده بنات الشركة كلها في مكتبنا.. متجمعين على خير دايا.. خير يا
 مايسة يا حبيبتني فيه إيه؟

- تعالي اتفرجي.

- صبغتي شعرك تاني يا مايسة؟

- أيوه.. بس مش ده المهم بصي بس.

- مش ده المهم إيه ده طلع أخضر المرة دي ومين اللي يتفرجوا عليهم
 دول؟ صحابك على استجرام؟
 - لا دول (Fashionistas)
 - مين؟

(شوينج) متخاري من الفاترينة اللي يعجبك وتشتريه وتشتريه وتشتريه... في حياتك
بين اثنين فيها مودة وتفاهم وحاجات تانية كثير. اتخلصي من إحساس أنك
أقل من الرجل وإنك ناقصك حاجة طول ماله ما تجوز تيش. وبعد
مش بعيد نصيبك يكون في الطريق ويسجي بعد كام يوم أو كام ساعة أو
كام دقيقة أو دلوقتي..
!! Good morning -

ولسه هارد الصباح على محمود، لقيت مایسة طلعت زي المدفع: انت
تاني!! فيه إيه يا محمود؟ خير؟
الولد اتوتر جدا وقال لها وهو محرج: «مايسة، What's wrong؟» ردت
عليه بعصية مبالغ فيها وقالتله: «Everything!! كل حاجة غلط! انت
كل شوية تيجي هنا، رايح جاي رايح جاي، فيه حاجة؟ محتاج حاجة؟
نساعدك بحاجة؟ يتيجي كل يوم ليه؟»
قلتله: «خلاص يا مایسة خلاص».
خرج محمود من سكات بعد الطلعة الجوية المساوية المفاجئة.

* * *

- طب، أنا ممكن أقول حاجة؟ أنا مش قاهم منطق البنات خالص بقى.
دلوقتي مایسة صاحبك هتموت وتلاقي شخص مناسب ترتبط به وتتدور
في كل شهر ومع ذلك ردود أفعالها وتصرفاتها عنيفة جدا مع الولاد.
- جايز مع الولاد اللي مش عاجينها، جايز أنا كمان زي مایسة. كلنا
عندنا ازدواج في المعايير، مش البنات بس، أفكر دي صفة بشرية.. لكن
جايز البنات مفضوحين بزيادة عشان احنا بطبيعتنا كائنات مبالغة، بنالغ
في تحليل الأمور لما بنكون مهتمين، بنركز في التفاصيل، الكلمة بيتقى لها
وقع مختلف حسب الشخص اللي قالها. لو واحد البنت مش مهتمة به قال
«إحم، هتقول: «يوووه يادي اللزقة، بنحرب بيت كده، فاضيين إحنا بقى!»
لكن لو واحد مهتمة أو معجبة بيه قال «صباح الخير» هتقول: «ياي قال
لي صباح الخير تفكروا بيحبي؟ وحشته؟ يفكر فيا؟ هيتجوزني؟ عاوز
يخلف كام طفل؟» ومن مجرد صباح الخير هيتحول لـ (عريسي يا أمي)

- فيلم (البحث عن فضيحة)؟؟

- يرافوا !!

- وبعدين كملي..

- وما بين الاجتماعات والإيميلات وحل المشاكل وتقديم الخطط وتعديلها وتنفيذها بيعددي كل يوم في الشغل من غير ما نحس، خلصت تقريبا كل اللي ورايا الساعة ٦ بالضبط، قفلت اللاب توب ولميت حاجتي ونزلت جري على السلم ماستيتش الأساتير، وعلى باب الشركة قابلته وأول ما شافني ابتسم بصعوبة وقال لي: «Hi»، أنا بس عاوز من وقتك خمس دقائق. ولا هاعطلك؟»

- فيه إيه يا محمود؟ عاوز حاجة؟

- كنت عاوز بس أتكلم معاكي، اعتبريني (A friend)، صديق، ساعات كثير يبقى نفسي أتكلم معاكي بس مابتجيش فرصة في الشغل.

- أنا بس مستعجلة شوية، خلىنا نتكلم ببعدين يا محمود. ماشي؟

روح البيت وبعدها نزلت تاني، والساعة ٧, ٣٠ بالضبط كنت قدام الشركة. بصيت على الياطرة الكبيرة المنورة زي الأم اللي شايفة ابنها كبير وبقي ناجح، ابتسمت ودخلت، لقيت سكرتيرة بشوشة ومبتسمة: «ماء الخير.. عندي ميعاد مع أستاذ إيهاب»

- حالا هابلغه يا فندم. اتفضلي استريحي.

قعدت حوالي خمس دقائق على كرسي مريح جدا في الشركة عند إيهاب، كنت متأثرة قوي وفيه شريط ذكريات عمره ١٥ سنة بيعددي بسرعة في دعاغي. إيهاب أصله مش صديقي بس، ده صوت الضمير، صوت الحكمة، إيهاب عنده إجابات لكل حاجة وأي حاجة، إيهاب عبقرى من غير تكلف، فيلسوف شعبي زي الخال الأبنودي وأحمد فؤاد نجم والشيخ إمام رينا يرحمهم جميعا. عارف إنت الصاحب اللي تروحله محتاس ومش عارف حاجة وشايل هموم الدنيا فيقول لك: «هات أشيل معاك؟» أهوده إيهاب.

جات السكرتيرة ومشيت وراها لحد ما وصلنا باب مكتب، وشاورتلي عشان أدخل.

- يا سلام على الحلاوة والجمال، إيه يا هوبا الشياكة دي؟
قام إيهاب من على مكتبه وسلم عليا وقال لي: «إزيك يا (لمضة)»
وطبعا أول حاجة شدت انتباهي في المكتب هي المكتبة العظيمة اللي لي
وش الباب: «كل دي كتب! ممكن أستعير منها؟»

- تشربي، إيه الأول؟ ماجدة ابعتي جمال يشوف الأستاذة هتشرب إيه.
- وخذي الباب في إيدك يا أستاذة ماجدة بعد إذتك. إيه يا عم ده،
سكرتيرة وحركات. كنت لسه هاوريها صورتك وانت مرمي جني على
سلم الكلية بتألف مسرحيات فاشلة ماحدث بيقرأها غيري.
- أنا عارف! انتي بالذات معاكلي حاجات تضيع مستقبلي وسمعتي في
الوسط الفني.

- قول لي صحيح، المسلسل الجديد اللي انت هتخرجه مافيهوش أدوار
نسائية تتغلي؟
- إشمعني؟

- يعني.. مافيش دور فتاة جميلة في مستقبل العمر تقع في حب رجل أعمال
شاب وسيم وتزوجه؟

- لا مافيش. بس لو نفسك في الموضوع ده قدامك أنا أهو، رجل أعمال
شاب.. إخص، بس أنا مش وسيم، أنا بنظارة وكرش وحالتي بالبلا!
- أولا انت صديقي وأنا باشوفك أجمل شاب في الكون، ثانيا الراجل
اللي من غير نظارة وكرش مايسواش قرش! أنا باهزر.. انت عارف إن
الموضوع مش في دماغ خالص.
- موضوع الجواز ولا الدور؟
- الاتنين.

وقجأة طلع صوت السكرتيرة من جهاز صغير على مكتب إيهاب:
«مستر عمرو برايا قندم»
- طيب خليه يتفضل.

ماعرفش له حسب إن روح مسلسلات التهاينات حضرت في المكان
ولقيت نفسي ياقول لإيهاب: «إيه جو (سعيد عبدالعني) ده؟ انت لازم
تسمي نفسك (شوكت بيه) على فكرة أو أقول لك، سمي نفسك سليم
البلخري، لابق عليك بكرشك بكركاتك!»

أرحمني نفسك من اللهاضة شوية!
بعد شوية دخل عمرو دخلة فنانين قوي، عمرو ده ممثل موهوب
جدا وصديق إيهاب من سنين، اللي يشوفه من بعيد يفتكره الفنان (تامر
مجرس)، واخذ (تان) كأن بقاله شهر نايم على البحر في الشمس وأول ما
دخل قال لنا: «Bonsoir»، أنا فضلت ساكنة باتفرج على الشو ولما شافني
فرح جدا وقال لي: «النسخة الحريمي من إيهاب؟؟ إيه المفاجأة دي!! عاملة
إيه يا بنتي؟»

قلتله: «أحسن منك يا عمرو. انت عامل إيه؟»

- تمام. مبروك يا إيهاب، دايبا كده مجمع الناس الحلوة.

إيهاب بص له نظرة استغراب وقال له بتريقة: «دي حلوة دي؟ ده
(واذ) و(لمض) كمان! البنت دي صاحبي الذكر!»

نزلت من الشركة بعد حوالي ساعة عمرو كان بيحكيلنا فيها عن
مغامراته وسفرياتة والبنت البرازيلية اللي سابها عشان البنت التايلاندية
لحد ما قابل بنت تركية، بيتكلم عنهم زي ما يكون بيقير ساعة ولا محفظة،
وطبعاً أنا ماسكتش واديت في (جنابه) جايز أكر عنجهية الراجل الشرقي
اللي بيتكلم بيها ده.

ركبت العربية وقعدت أفكر إزاي كل صحابي شايفين إني (Feminist)
أو باناصر البنات، عشان مؤمنة بقوة الأنثى ويكاملها، وإن الست مش
نص المجتمع، الست المجتمع كله، ومع ذلك يومها نزعة ال(Feminism)
خائتي وفرحت فعلاً بكلمة (صاحبي الذكر)، ذكر يعني جدع، جري،
حسن التصرف، شجاع.. أنا فرحت ليه؟؟ إزاي أفرح بتعليق كله عنصرية
كده؟ مع إني بنت وفخورة إني بنت و«لولا أكن بتاً لوددت أن أكون بتاً»
برضو يعني!

قلت لنفسني، بنت يعني صبورة، حنينة، بتهم بالتفاصيل. وفي اللحظة
دي اتصلت جداء، إزاي بافكر بالطريقة العنصرية دي! طيب إزاي؟
يا دي المصيبة! أنا فرحت عشان قال عليا (ذكر)!

أودي رشي فين من الناس؟ من زمايلي؟ من لولو وتوتو وسوسو وكل
أصحابي في مدينة البط؟

وبعدين قلت لنفسي، إيه يعني ولد ولا بنت. أيوه أنا ولد قوي، جدم
 و(أدرجي) وابن بلد، وساعات باكون (سوبر وومان) وباعمل خمسين حاجة في اليوم،
 ومحتاسة، وساعات باكون (سوبر وومان) وباعمل خمسين حاجة في اليوم،
 وساعات باحب أقعد لوحدي وماعملش أي حاجة خالص. ساعات
 راجل عجوز قاعد على كنية بياكل يوستاقتدي ويتفتف على جلايته،
 وساعات ست واقفة بتفاصيل في السوق وهي بتشتري الخضار.
 - عندك حق، تحسي إن فيه دور محفوظ وأفعال متوقعة من الراجل ومن

الست مع إن كل واحد فينا عنده التاحتين، كل ست جواها صفات من
 الراجل زي ما كل راجل فيه صفات من الست. لكن المشكلة إن ماحلش
 راضي يعترف بده والمجتمع زانقنا في أدوار محفوظة مع إن البشر كائنات
 معقدة وصعب نحدد تصرفاتها في قوالب جامدة.

- عارف المشكلة بتبدأ إمتى؟ المشكلة بتبدأ لما البنت من وهي ٣ سنين
 بتحضن العروسة وتلعب معاها دور الأم، بتأكلها وتلبسها وتبنيها
 وتعني بها.. الست بفطرتها بتحب المسؤولية وتستمتع بيها لكن مع
 الوقت المجتمع بيوجهها إن ده مش دورها ولازم تلاقى حد يشيل
 المسؤولية عنها حتى لو هي ماشكتش، المجتمع بيقنعها بعدم كمالها طول
 ما هي من غير راجل. أما الولد فيبتريبى إنه قوي، بيسمع جملة «انت راجل»
 من وهو ٥ سنين فيكبر وهو مقتنع إنه الأقوى والأفضل. ومع الوقت
 وعوامل الإحباط والخوف من المسؤولية بيعيش في ضغط من اللي حوالبه
 عشان يفتح بيت ويعمل أسرة، وهو من جواه لسه طفل عاوز اللي يشيل
 عنه ومعاه وبالتالي الاتنين بيحاولوا طول الوقت يلعبوا أدوار مش بتاعتهم
 ويبتتهوا تعساء مش سامعين بعض ومش فاهمين.

- تفتكري الحل إننا نقلب الأدوار؟ نسيب الست تشيل المسؤولية كاملة
 والراجل يعيش معتمد عليها مش أكثر؟

- بالعكس، الحل إننا نتصالح مع كوننا محتاجين، مع فكرة الاحتياج
 نتصالح مع فكرة إننا محتاجين بعض في كل حاجة. في النهاية كلنا عاوزين
 نفس الحاجة بس بتقارح وبتخبي، كلنا بتدور على بعض في نفس الوقت
 بنفس الطريقة في نفس الأماكن ومش لاقين حاجة، عشان بتقارح، عشان
 بتخبي.

الولاد بتخبي في زحمة الشغل وقعدة القهوة للمصبح وكتر صحابه
 البنات والسفرجات بتاعة «بلا نخرها»
 والبنات بتخبي في الشهادات والخروجات والسكوت خالص أو
 البعجة الفارغة والحاجات اللي شبه كده..
 وكلنا كذايين.. كذايين قوي.
 كلنا محتاجين مكالمة آخر اليوم اللي مايتقالش فيها أي حاجة مفيدة غير
 «الزيك.. احكي لي يومك كان عامل ازاي»
 كلنا محتاجين نسمع أنا موجود.. ماتخافش.. أنا جنبك..
 وكلنا نصايين.. بنحاول دايماً نبيّن للناس أجمل ما فينا، لكن اللي نحبه
 بجد يبقى عاوزينه يشوف الوحش اللي جوانا، يشوف الضلعة، يشوف
 الضعف ويفضل يجينا، ويفضل موجود.
 - اتفضل يا فندم، الChocolate Cake.
 - شكرا.. اتفضلي

- جات في وقتها شكرا ليك وليها. المهم يا سيدي، طلعت البيت
 غيرت هدومي وعلبت كباية شاي أخضر بالنعناع وقعدت في السرير أقرأ
 وخلال ربع ساعة كنت نمت على نفسي. والساعة ١٠ بالليل التليفون رن:
 «الو. صاحبة ولا هتامي؟»

- إيه يا سميحة.. مال صوتك؟

- حاسة إني مايقيش حلوة.

- مالك يا سميحة يا حبيبي؟

- بابص في المرايا مش شايفاني، شايفة واحدة مش أنا. وحشتني
 لغة كده كانت بتبقى في عينيا لما كان في حياتي، وحشني صوته، كلامه،
 وحشتي تفاصيله. تعبت من القوة، تعبت منها قوي.

- بس اتني حلوة يا سميحة، حلوة فعلا.

- كسر لي قوي.. دمر فيا حاجات كتير.

- حبي نفسك يا سميحة، اتسندي عليها واقفي على رجلك، اتقوي
 بيكي. لما تحبي نفسك مش هتقبلي عليها الذل وكسرة النفس، لما تحبي
 نفسك مش هتسحبي لحد يبينها أو يجرحها أو ينيمها معيطة، لما تحبي

نفسك مش هتقبلي بنص حب، بنص اهتمام، بنص مشاعر، لما تحمي نفسك
 تحمي اللي بيحبها بجد وتبعدي عن اللي مش فارق معاه.
 - يتبع تتقابل بكرة؟ الساعة ٧ في نفس المكان؟

* * *

- غريبة سميحة صاحبك. اللي أنا فاهمه إنها قوية وعقلانية وتمتظن
 الأمور، لكن الجانب اللي أنا حسبه وفهمته من كلامك جانب ضعيف،
 ضعيف قوي ومكسور.

- لو ركزت مع الناس الأقويا، اللي صوتهم فيه ثقة، اللي ضحكهم
 فضيحة، اللي مايتكسر وش، مايعيطوش، الناس اللي بتحاول وتتعاقر..
 متعرف إن كلهم يمثلوا وإنهم أكثر ناس محتاجة تحس بالحب والدفء،
 متعرف إن القوي مش أقل الناس احتياجا للمشاعر، القوي أشطر واحد
 يعرف يحمي.

- للأسف فيه بنات كثير ممكن ثقتها بنفسها تقل بعد فشل علاقتها.
 - وفيه علاقات تبدأ أصلا عشان البنت مش واثقة في نفسها. المشكلة
 الأزلية والغلظة الكلاسيكية اللي البنت يتبع فيها لو ماعرفتش تحب نفسها
 زي ما هي بعيوبها ومميزاتها إنها ممكن تتسرع في الحكم على مشاعرها تجاه أي
 واحد وتفكر إنها بتحبه لكن الحقيقة إنها بتحاول تحب نفسها من خلاله..
 تحب نفسها فيه. حالة عدم الاتزان والاضطراب العام بنات كثير بتسرها
 إنها وجع من خسارة اللي راح لكن في حقيقة الأمر بيكون اضطراب هوية
 بسبب عدم حب الذات.. وفقدان الشخص اللي حبت نفسها فيه.
 - وبعدين؟

- قلبي وجعني قوي.. قفلت معاها وماعرفتش أنام ليلتها خالص.
 - هو إحنا كده داخلين على يوم إيه؟
 - الأربعاء.. إحنا بقينا يوم الأربعاء. مش أنا قفلتلك تركز معايا من الأول؟
 - مركز صدقيني مركز.. كمل.

- يومها صحبت بدري من غير منه، صليت وحمدت ربنا إنه اتاني يوم
 جديد أعيشه، ومن غير ما أفطر ولا أعمل أي حاجة نظيت في حاجة سواد

على حاجة ثانية سودا برضو وضربت نظارة الشمس. سلمت على ماما
 وشتت راسها وخذت دعوة كل يوم:
 «روحى يا بنتى ربنا يحب فيكى خلقه»
 فتحت باب الشقة ونزلت، مألقيش عم ناجح خالص لكن لقيت
 إبراهيم قاعد في عربته ويقرأ الجرنال: «صباح الخير يا إبراهيم. انت بايت
 في العربية ولا إيه؟»
 - لا أنا لسه راجع.

- آه، طيب. صباح الخير أو تصبح على خير. سلام!
 وقبل ما أمشي لقيت يقول لي: «ممكن أسألك سؤال؟» قلته: «انفضل»
 - انتي مش متجوزة صح؟
 - هي طنط زيزي ما قالتكش؟
 ماردش على سؤالي زي ما يكون ماسمعش أو كان مركز في اللي ناوي
 يقوله:

- أنا كمان مش متجوز على فكرة!
 - بس أنا سمعت من كام ستة إنك اتجوزت أجنبية؟
 - اتجوزت وطلقت.
 - أنا آسفة.

- لا لا، ولا آسفة ولا حاجة. الموضوع أصلا ما استعرض كثير. هما
 غيرنا، طباعهم مختلفة عننا خالص.
 - بس أعتقد إن بعد الجواز أي اتنين بياخدوا من طباع بعض، ومع
 الوقت الاتنين بيبقوا شخص تالت.
 - بصراحة وحشتي بساطة الست المصرية. بصي الست المصرية
 ما فيهاش ولا ميزة غير إن دمها خفيف، الهزار والأفلام والتكت. الواحد
 لازم يتجوز واحدة يعرف يبقى على طبيعته معاها. تعرفي، مرة كنت بانفجج
 على فيلم قديم مع طليقتي وحاولت أشرح لها الإفيه بتاع «ست؟ ده إنتي
 ست أشهر» وما عرفتش أترجم المعنى. فعدت ربع ساعة باشرح لها لحد ما
 الإفيه بقى بايخ وسخيف ومالوش طعم.

خلص كلامه ويصلي زي ما يكون مستني يسمع مني تعليق على اللي هو قاله، لكن ساعتها مالفيتش حاجة أقولها غير: «ربنا يوفقك يا إبراهيم»
سلام

وفي طريقي للشغل فتحت إذاعة بثت أغاني أجنبية وسمعت غنوة اسمها (Not the only One) - أنا مش الوحيد، مطرب بريطاني اسمه (سام سميث)، من مواليد ١٩٩٢ بيغني ويكتب أغاني، عبقرى. الغنوة بتقول إيه بقى:

«أنا وانت عاهدنا بعض نفضل على الحلوة والمره، أنا مش مصدق إنك خذتني بس كل الأدلة بتأكد جرحك ليا، إنت بتقول عليا مجنون عشان فاكر إني ماعرفش، بس لما بتقول يا (حبيبي) يا احس إني مش الوحيد في حياتك، جايز أنا مش كفاية، أنا باحيك بقالي سنين»

لقتني بأسأل نفسي، هو أنا ليه حاسة إن وصف الإحساس بالحياة ده مش رجالي أبدا؟ مش ذكوري؟ أصل الست لما واحد بيخونها تلقاها بتحس إنها (مش كفاية) وإن (العيب فيها) أو بتلوم نفسها وتقول: «أكيد مالفاش معايا اللي هو محتاجه»

طعم المرار والآلام النفسية عند الست كرد فعل للخيانة أحاسيس استثنائية جدا. الست أول شخص بتلومه هي نفسها وتجلد نفسها في اليوم ١٠٠ مرة. على عكس شعور الرجل لو فيه واحدة خاتته، لا سمح الله، الموضوع يتحول في ثانية لطاقة غضب مدمرة، يبقى تاريخه وبينها. الرجل ماييلومش نفسه لو الست هي اللي بتخون ولا يفترض لثانية واحدة إن الست عندها سب أو دافع ورا خيانتها له وفي نفس الوقت يتوقع إن الست تسامحه لما يخونها، مش تسامحه عشان قلبها كبير أو كرم أخلاق منها، لا، تسامحه بالإجبار، بالإكراه، غفرائها له فرض عليها وتحصيل حاصل، تسامحه عشان هو لازم يتسامح، عشان هو راجل. الراجل هنا بيعتبر نفسه فوق الحساب.

وعشان كده الغنوة دي كانت غريبة في معانيها بالنسبالي، عشان الشعور الأنثوي بالخيانة عميز جدا. وعلى ذكر مسألة الخيانة بين الراجل والست في العلاقات العاطفية وغيره، افكرت مناقشة دارت بيني وبين أحد أساتذتي عن الحياة الزوجية.. الراجل ده كان دماغ قوي.. عبقرى ومحترم حدًا..

لقد الدنيا مرتين ثلاثة والهجور من كل بلادها، يومها لما سألته وهو كل
الرجالة لخاينين؟ بيكيت شوية واحد نفس عميق من (الهايب) العاج
بناعه وقال لي: «بص، يا بنتي، انتي دماغك شغالة وبتحبي تحللي الأمور
بدقة وأنا هاقول لك على اللي فيها. أبوه، الرجالة كلهم خاينين، لكن ده
له تفسير علمي وفسيولوجي. الذكر بيفطرته كائن انتشاري (انتشاري)،
حاسس إنه عنده كل حاجة بزيادة ويقدر يديها لأكثر من ست وده في
الإنسان والحيوان كمان. أما الأنثى فهي كائن انتقائي (انتقائي)، يعني
بتحب تنقي ذكر واحد بس وتوجهه كل حاجة عندها وما تبصش لحد غيره.
ساعتها كلامه صدمني وما صدقتوش لكن بعد سنين بدأت أستوعب
كلام أستاذي ده. الرجالة فعلاً كلهم خاينين، لكن فيه اللي خيانتة بتخلص
في خياله وأحلامه، وفيه اللي بيتجرأ ويرمي كلمة، أو يضحك ضحكة، أو
يخرج مخرجة. فيه اللي أمنيته بمسك إيد واحدة تانية غير مراته وفيه اللي
راح وجهه وفيه اللي سافر واللي اتهجوز وفيه وفيه..

الرجل فعلاً حاسس إنه عنده حاجات يديها لأكثر من واحدة، لكن
ما يسألش نفسه إذا كانت الحاجات دي هي اللي الست محتاجها ولا لا.
الست فعلاً لما (بتنقي) بتوجه نفسها لشخص واحد وما تبصش
لغيره. لكن الشخص ده، يا ترى هيطلع يبص لغيرها؟

الأنثى فعلاً كائن انتقائي، لكن يا ترى الست اللي (بتخون) بيعاقبوها
عشان تخالفن الفطرة ولا عشان سرقن دور الذكر (الانتشاري)؟

فضلت سرحانة في أفكار غريبة وكل فكرة بتسلمني للتانية لحد ما
لنبت نفسي وصلت قدام الشركة، ركنت ودخلت صبحت على أمين
وعادل، رجال الأمن الشرفاء، وقبل ما أوصل مكنتي، قابلته: «Buenos
Dias!!»

- Buenos Dias يا محمود

- بتعرفي تكلمي (Spanish) كمان؟

- باعرف شوية، لكن مش عارفة آخرة برنامج (نافذة على العالم) ده
ليه؟

- أنا كنت باصح عليك مش أكثر. اتضايقتني مني؟

- هو النهارده التلات؟

- لا النهارده الأربع.

- غريبة.. مش عارفة ليه يا محمود كل ماشوفك بتفكر لي يوم التلات!

طلعت المكتب، صبحت على مایسة من بعيد لبعيد عشان ما فتوش على نفسي (فاتوحة) تضيعلني ٣ ساعات من اليوم. قعدت على المكتب، فتحت الألاب توب وشربت الكايتشينو وعملت كل طقوس (أرض الميا قدام الدكائة) وقيل ما أقرأ إيميل واحد، دخلت عليا حسين بعماس شديد وواضح إنه جاي وعاوز حاجة: «صباح الأنوار والخيرات و...» ماستنيتش بخلص كلامه وقتلته: «عاوز إيه يا حسين؟ انجز!»

- بصراحة كده ويدون مقدمات أنا عاوزك في استشارة مستعجلة!

- تدفع كام؟

- مش باهزر! أنا استخرت ربنا ونويت اتجوز. حلو؟

- حلو.

- فيه قدامي دلوقتي بتتين مايتخيروش عن بعض. حلو؟

- حلو.

- الاتنين متعلمين ومثقفين وحلوين من برا ومن جوا وتقريبا نفس السن.

- وطبعاً مش عارف تختار.

- بصراحة آه! الفرق الوحيد إن واحدة مصرية والثانية روسية.

- اتجوز الروسية طبعاً.

بصلي حسين نظرة كلها ذهول وعلى وشه ١٠٠ علامة استفهام وقال لي: «بجد؟؟»، قتلتله: «طبعاً بجد»

سكت شوية وهو لسه مذهول وقال لي: «غريبة»

- أمال كنت فاكرني ما قول لك إيه؟

- ائمم مش عارف. كنت فاكرك هتكلميني عن الوطنية وتشجيع المنتج

المحلي أو تترددي وتفكري شوية قبل ما تجاربي.

- لا لا، منتج محلي إيه يا راجل إنت داخل جمعية استهلاكية؟ صدقني

مش من مصلحتي إني أغشك أو أخدعك، أنا عاوزاك تبقى سعيد وعشان

كده هاقول لك وأنا في كامل قوايا العقلية، حسين يا ابني، بلاها المصرية
 ونغد الروسية!
 سكت خالص وفضل باصصلي ومضيق عينيه وبعدين قام واقح
 حاجب ومزول التالي وقال لي بنحيت: «طلب ليه؟»
 - مممم قتلني ليه. بص يا سحسوه الروسية شكلها حلو خلقة ريتا وده
 موضوع مفروغ منه واحنا كينات مصرجات عارفينه ومتصالحين معاه جدا.
 هما شقر وعينيهم خضرا وإحنا شمر وعينينا بني وشعرنا اسود وميل
 بستين ليلة، يعني الروسية هتوفرلك تمن العدسات اللاصقة والصيغة
 والكوالير وغيره.
 - وإيه تاني؟

- الروسية غالبا ما بتعخنش. هما جيناتهم كده وده معناه إنها هتوفرلك
 مصاريف (دكاترة الدايت) و(شورتات التخسيس) و(بذل الساونا)
 و(اشتراكات الجيم) و(عمليات الشد) و(النحت) و(التدبيس). ناهيك
 عن مشاكل السمنة اللي انت في غنى عنها. الروسية مش معرضة للإصابة
 بخشونة الركبة، الكوليسترول، تصلب الشرايين. مش هتشتكي من
 ضهرها ولا وجع الفقرات بعد الحمل والولادة.
 - ممم.. لسه ماقتنعش برضو.

- هاقول لك الثقيلة بقى، الروس من كتر ما راحوا وجُم، اكتشفوا
 إن السعادة في البساطة والدليل على كده رُوح أي فندق في شرم الشيخ
 ولا الغردقة وانفروج عليهم. هتلاقي يومهم عبارة عن فطار متين، بحر
 وشمس، رقص وغنا وضحك ومشى، وفي الآخر عشا خفيف ده لو
 اتعشوا. ما تكرر إن فيه روسية عمرها قالت لجوزها: «هتغديني فين
 النهارده يا حبيبي؟» أو «نفسى في حاجة حلوة هاتلي (سينابون) وانت
 راجع». الأكل عندهم بنزين للجسم مش أكثر.
 - مممم.. وإيه كمان؟

- نظرا للأزمة الاقتصادية في بلادهم، هتلاقيها راضية بأي حاجة
 حتى لو قليلة ومنبهة بيها كمان. لو عندك عفش خير وبركة لو قديم
 مش هتتعرض، لو ما عندكش عفش خالص هتبقى مبسوطه إن فيه أصلا

شقة، لو الشقة إيجار هتكون مبسوطة إن معاك فلوس تدفع إيجارها كل شهر، لو مافيش شقة ولا فلوس متبقى مبسوطة برضو إنك متمسك بيها وماطلقتهاش. في بلدهم الرجاله مش عاوزة التزام خالص، بلا جواز بلا بطيخ!

- وياه كمان؟

- كل ده ولسه عاوز تسمع؟ هاقول لك، الروسية مش هيفرق معاها بتاتاً لو نسيت عيد ميلادها أو عيد ميلاد مامتها أو حتى عيد جوازكم. مش متنتي منك هدية في عيد الحب ولا هتقول لك: «هات لامي عليه كحك من لابوار في العيد» أو «حلاوة من العبد في مولد النبي». أمها غالباً ماتعرفش عنها حاجة من وهي ١٦ سنة أساساً ومش فارق معاها جوز بتتها اذاها عيادية ولا لا. ولو أهلها طَرف مؤثر في حياتها، مستحيل يطلبوا منك تكتب قائمة بالعفش ولا مؤخر ١٠٠ ألف جنيه. هما غالباً مش عارفين يعني إيه قائمة ومؤخر. ويكده أبقى ريحت ضميري وقتلك كل حاجة.

سكت حسين يبجي ٣ دقائق وهو باصص ومركز في ورقة صغيرة على المكتب لدرجة إني شكيت إنه نام وعينيه مفتوحة، وبعدين رفع راسه فجأة وحط إيديه الاتنين على المكتب وقال لي: «بس أنا بصراحة عاجباني المصرية! حاسس إنها فاهماني وشبهي رده اللي مخليني مش عارف اختار!» ابتسم وقتلته: «طب ما أنا عارفة»

اتفاجئ بإجابتي جدا وعينيه وسعت وقاللي باستغراب: «عارفة؟!»
- أيوه عارفة. أنت من جواك واخذ قرارك وعارف إنك في الآخر هتختار المصرية بس مستخسر الاختيار الثاني. جيتلي على أمل إني أبيعلك فكرة إنك تتجوز مصرية وأقنعك بيها، تقوم انت تاخذ كرمي وكييل النيابة وتطلع فيها القطط الفاطسة، لكن بعينك يا سحسو، بعينك!
- يا بنت الإيه!

- هاحكيلك قصة وأتمنى تفهم مغزاها. ليا صديق قاللي في مرة: «أنا مستحيل أتجوز أجنبية. أحبها آه، أخرج معاها شوية ماشي، لكن جواز وبيت وأسرة مستحيل. ماقدرش أتجوز واحدة غريبة عني. حتى لو اتعلمت عربي، المشكلة مش في اللغة. مستحيل أتجوز واحدة مانعرفش

فوازير نيللي وشريهان، ماتعرفش ماما نجوى وبقلظ وكوتشي (أميجو) اللي بيطلع نور، ماقدرش أتجوز واحدة ما عاشتش طفولتها وهي فاكرة إن صفاء أبو السعود بتغني (العيد فرحة) لواحد اسمه (سعد نبيهة) ومصدفة إن بوجي القرد وطمطم الأرنبة اخوات. ماقدرش أتجوز واحدة من حاظفة فيلم (إشاعة حب) ومسرحية (العيال كبرت) صم ولسه يرضو بتفرج عليهم. ماقدرش أتجوز واحدة ما فيش بيني وبينها حاجات مهمة كتير وحاجات تافهة أكثر. والنهارده الصبح كمان يا حسين، قابلت شخص ثاني كان متجوز أجنبية وأكدي نفس المعلومة. يلا يا سحس اتكل انت على الله. وانا شغل!

- حاضر. أنا بس عاوز أقول لك شكراً، شكراً جداً.

- عفوا يا حسين، عفوا جداً.

ربين الاجتماعات والإيميلات والمشاكل عدى اليوم بصعوبة. قفلت اللاب توب ولميت حاجتي ونزلت جري على السلم ماستيتش الأسانسير. رصلت ستارباكس قبل الساعة ٧ لقيت سميحة وكاميليا مستنين، سميحة بتلعب في الموبايل وكاميليا بتاكل. طلبت كراميل مكياتو وقعدت جنبهم أتفرج على اللي رايح واللي جاي لحد ما سميحة بدأت تحكي، سمعتها لغاية ما خلصت كل اللي عندها وبعدين قتلها: «يعني بعد ما استتيتيه ٣ سنين يحل مشاكله مع طليقتة ويقف على رجليه رجعلها ثاني يا سميحة؟»

- بيقول رجعلها شكلاً بس، لكن عمليا لسه منفصلين.

- ده نصب رسمي.. اسمه (متجوز)

- بيقول إن هي اللي كلمت أهله وضغطت عليه وعليهم عشان البنت الصغيرة، مسألة وقت وهيسيبها ثاني بس بعد ما يكون خد موافقة أهله.
- أيا كانت الظروف والحدوتة والرواية، إجابتي ليكي هتكون دايبا واحدة. بصي يا سميحة، ساعيني في الكلمتين اللي هاقولهم دول لكن الحقيقة إن ما فيش غير نوعين بس من الرجالة. يا إما الراجل Single وب(طوله)، سواء مانجوزش قبل كده أو فاسخ خطوبة أو مطلق أو أرمل، المهم إنه (فاضي). حالته الاجتماعية إيه؟

Single -

- اسم الله عليكى يا ميمى، يا إما الراجل Taken يعني (محموز)، مش فاضى، اللي أنا أعرفه إن اللي بيحب محجوز، واللي قادي فاتحة محجوز، واللي مخاطب محجوز، وطبعاً طبعاً اللي متجوز محجوز. لكن أنصاف الحالات من نوعية «أصله منفصل لكن له ما يطلقش»، «أصله بيبطلق»، «أصله المرثلة دي ملخصها إنه راجل (متزوج). نقطة ومن أول السطر. سكتت سميحة شوية وشربت حبة من الكابتشينو اللي قدامها وقائلش «هو بيقول على نفسه منفصل».

- منفصل دي يعني له متجوز يعني مش بتاعك، بتاع غيرك. حتى يا سنى لو هو واللي معاه بينهم (ما صنع الحداد)، اسمه في بطاقتها، في العبارة اسمها مدام فلان، وأم العيال. لو مات دلوقتي حالاً هي مراته رهتلى أرملة اللي هتقف تاخذ عزاها. انتي بقى مين؟

- طيب ما فيه ستات كتيرة بتتجوز رجالة متجوزة.

- أنا معاكى.. لكن بيبقى الموضوع واضح من الأول إنه عنده يت وزوجة أولانية ومستقر لكن ما عندوش مشكلة يزود واحدة كمان، والرجالة دي نادرة وقليلة وغالباً بيبقى معرف أهله وأحياناً مراته الأولانية كمان بيبقى على علم إنه ناوي يتجوز تاني. والنوع ده لما بيدور بيبقى عنده سبب أو مقتدر ماديا وشايف إن ده حلال وعشان كده بيدور على واحدة ظروفها شبه ظروفه يعني مطلقة أو أرملة ويمكن تكون أول مرة تتجوز، لكن في كل الأحوال بيبقى موضوع موقفه من الأول لأنه عاوز يعمل يت تاني. مايفضلش سارح بيها في الكافيهات ومفهمها إنه هيسبب مراته وزي ما قلنا الرجالة دي نادرة وقليلة.

- طيب ما هو ممكن يطلع كده.

- لا.. ده بالذات من النوع التاني.. النوع اللي منتشر جداً حالياً، اللي بيتشن على واحدة من ذوات الخبرة القليلة ويبدأ سمفونية نشاز محتواها إنه تعبنا في جوازه ومراته مش فاهماها، مش حاساه، إلخ إلخ. وفي اللحظة دي كانت كاميليا خلصت التشيز كيك والهوت تشوكليت

وقررت تنضم للنقاش بتاعنا، «تعرفوا، واحدة صاحبتني حكيتلي عن واحدة تعرفها كانت مرتبطة بواحد وقعد سنة ونص مفهمها إنه بيحبها ويمتجوزها أول ما مراته (المشلولة) تتعالج وتقدر تمشي على رجلها عشان مايقاش اتخل عنها في ظروف زي دي. وفي يوم صاحبتني كانت في عيد ميلاد ريبالصدفة شافت بسلامته داخل المكان ولافتح على دراعه واحدة زي القمر لابسة فستان وجزمة بكعب ١٢ سم ولما راحت سلمت عليه طلعت دي مراته (المشلولة)!

ماصدقتش إن الكلام الموزون ده يطلع من كاميليا.. حضنتها وبُست رأسها وقتلتها: «الله عليك يا غالية! إيه الحلاوة دي يا كيمي، بظهر كده دماغك فيها مخ زينا مش كيكة! عارفة يا سميحة، واحدة صاحبتني اتعرفت على واحد وكان مفهمها إنه منفصل وعاش مع مامته في شقتها وطليقته قاعده بعباها في شقته اللي هي لزق في شقة مامته، واخدالي بالك؟ المهم لما صاحبتني بدأت تشك في كلامه راحت سألت بواب العمارة على شقته اللي قافلها قال لها: «قصداك شقة أستاذ فلان ومدام فلانة؟ آه هما فوق في شقتهم» وطبعاً بعدها عرفت إن مامته ساكنة في عمارة تانية أصلاً! مهبها قال لك إنه بيحبك ومهبها كانت قصته محبوكة، في النهاية اسمه راجل متجوز. والمصيبة الكبرى إن النوع ده (محترف)، هتلاقي دايا تفاصيله وحواديته جاهزة. هيدخل حياتك يفتحمها من غير لا إحم ولا دستور. هتلاقي فيه كل اللي بتتمنيه. وعشان هو (محترف) مش هيسيلك فرصة تسألني نفسك: «هي العلاقة دي رايحة فين؟»، هيجابك قبل ما تفكري ومش بعيد بعد تالت أو رابع مقابلة يعرض عليك الجواز ويحكملك كل ظروفه وإنه محتاجك تقفي جنبه وتسانديه نفسياً لحد ما يخلص ورق طلاقه من الست الوحشة اللي مش مريحاه دي. لكن الجزء من القصة اللي انتي مابنشوفهersh هو اللي فيه الحقيقة. الجزء اللي بيحصل جوا بيته ورا البيان المنفولة!

ردت كاميليا بحماس مبالغ فيه وكان عجبها دور الحكيمة اللي بتدينا من عصارة خبرتها في الحياة وقالت: «واحدة صاحبتني تانية كانت حكيتلي عن واحد كانت بتحبه وكان مفهمها إن لسانه مايبخاطبش لسان مراته

وإهم منفصلين بس في بيت واحد عشان الأولاد وإنه مالمشاهش بقاله
 ستين. يوم عيد الحب خرجت معاه وفي نص الخروج جباله تليفون ففلام
 يجري عشان مراته (اللي مالمشاهش) في المستشفى بتولدها
 ضحكك من قلبي وسميحة كمان ضحكك، بصيبتها وقلتها: «ارجع
 وأقول لك يا سميحة، المشكلة مش فيهم، المشكلة فينا احنا. البنت اللي بتقع
 في واحد زي ده بتبقى من جواها عارفة إنها بيتمثل عليها وإنها رقم اثنين
 يعد بيته ومراته وهو بيتقى عارف كويس إنه بيخون مراته معاه. بتبقى
 عارفة إن دي المنطقة المحرمة اللي مافيش حد هيوافق عليها. بتحط مكياج
 للمسيات، فالتجوز بتسميه (منفصل) أو (بيطلق) أو (مسألة وتنت) أو
 (هو ذنبه إيه؟) أنا ماعنديش أي مشكلة إن واحدة ماتجوزتش قبل كده
 تجوز شخص مطلق أو العكس، كلنا وارد إننا نفشل في أول تجربة وبتبقى
 عاوزين نبدأ حياة جديدة مع حد ثاني نجبه ويحبنا لكن المشكلة في المنطقه
 الرمادي دي، في الفصص اللي ليها ديول، في البني آدم اللي سمع لنفسه
 يربط إنسانه جنبه ٣ سنين وهو لسه فيه واحدة في حياته.
 - عندك حق..

- مهما كانت علاقتكم شريفة وحتى لو مافيش أي تجاوزات، هي علاقة
 غلط برفض. غلط عشان هي مدياله الأمان ومش عارفة إنك في حياته،
 غلط عشان أبسط الحاجات الجميلة اللي بين أي اثنين هتتحرمي منها زي
 إنه يرد على تليفونه في أي وقت، غلط عشان لو حد شافكم هيشوفك
 بشكل وحش، غلط عشان هو بيته مش هيتهد غير لو هو قرر يعمل ده
 لأنه كده كده كذاب محترف لكن انتي اللي هتخسري كل حاجة وأولهم
 احترامك لنفسك. باقول لك إيه، لو الست اللي بيقول إنه منفصل عنها
 دي شافتكم سوا هيعرفك عليها بصفتك إيه؟ فكري في كلامي كويس
 قبل ما تردي. أنا هاقوم أروح بقى، تصبخوا على خير.

مشيت وسبتهم وأنا بافكر في الكلام الكثير اللي قلته لسميحة.. يا ترى
 أنا لو مكانها كنت هابقي مقتنعة كده ولا هادافع عنه زي ما هي بتعمل؟
 أسهل حاجة الواحد يبقى يتكلم من برا، بيص من برا، بيحكم من برا.

لكن الإنسان بطبيعته يميل للحاجة الصبح. فيه جهاز (Sensor) جوا كل واحد فينا يشتغل بشكل أوتوماتيكي ويحدد ناحية الحاجة الصبح، ناحية اليمين، الجهاز ده مايعرفش دين أو عقيدة، البرمجة بتاعته مبنية على فطرة البشر الخيرة الطيبة ومهما اختلفنا في وجهات النظر والآراء لازم نرجع فوراً للـ sensor ده وهو هيوجها. «هو الـ Sensor يقول إيه؟»
وصلت البيت وأنا بافكر وهاتجنن، إزاي سمبحة الذكبة العقلانية بتصرف في حبها زي بنت طايشة في ثانوي، قعدت تحب واحد ٣ سنين وفي الآخر سابها ورجع لمراته ولسه مسالمه دماغها ومش عارفة تنساه؟
هو الحب بيعجن؟
- مش جايز بيحرر؟
- بيحرر؟

- بيحررنا من القيود الاجتماعية، من المكياج، من البدلة اللي لابسينها ليل نهار ورابطين الكرافتة قوي. مش جايز الحب بيطلع أصدق ما فينا؟
- جايز.

- طيب وحصل إيه بعد ما رجعتي البيت؟
- مافيش، غيرت هدومي وعملت كباية شاي أخضر بالنعناع وقعدت في السرير أقرا وطبعاً خلال ربع ساعة كنت نمت على نفسي لحد ما جاتلي مكالمة منتصف الليل: «إيه يا كاميليا لحتت أو حشك؟»
- مش هتصدقني مين عازمني بكرة على الغدا؟
- يا ترى مين؟ ليوناردو دي كابريو؟
ردت بحماس شديد: «لا، حسين!»
- حسين مين؟ حسين زكي اللي معايا في الشغل؟
- آه.

- وهتروحي؟
سكتت شوية وقالتلي: «أفكر آه.. غالباً هاروح، أصلي لازم أروح»
- لازم تروحي ولا (عاويزة) تروحي؟
قالتلي بصوت واطي قال يعني البت مكسوفة: «يعني، تقدرني تقولي كده، آه عاويزة أروح!»

- طيب يا حبيبي، أنا بس مستغربة إنه ما قاليش حاجة الجبان ده، ولا استني كده؟؟ ده تقريبا قاللي وأنا اللي ما فهمتش إلا احكي لي بقى بالتفصيل!
- ها حكي لك صدقيني بس الأول قوليلي أعمل إيه، ألبس إيه، أقول إيه.
انتي عارفة إني ساعديش خبرة!
- انتي كده جيني للشخص المناسب. انتوا حددتوا المكان ولا لسه؟
- له

- طب استني بقى لما أقوم وأتعديل وأنا باكلمك عشان أركز معاك
كويس. مبدئيا كده، خليه هو اللي يختار (المكان) عشان ذوقيا هو اللي
هيعزم فسييه يختار هي عزمك فين حسب ظروفه وإمكانياته. ماتسمعيش
كلام الناس اللي هي قولولك النصيحة الحايية إنك (تنتفي) ريشه من أول
مرة!

- حاضر

- النقطة الأولانية هي ترتب عليها النقطة الثانية اللي هي (اللبس).
عاوزاكي تعرفي منه هنتقابلوا فين قبل ما تلبسي، مش عيب، وده بدل ما
تلاقي نفسك لابسة فستان بالدانتيل وقاعدة جنب ملعب الاسكواش
في نادي الصيد بتاكي زلاية بخلة سنان. طبعا بلاش برانيط، بلاش
جوانتيات، بلاش أي حاجة بتلمع أو فيها الماظ، مش حفلة تنكرية هي!
- حاضر.

- تالت حاجة مهمة جدا وهي (المكياج)، اسمها مستحضرات تجميل..
تجميل.. ها.. مش تغيير، مفيش داعي تضيعي ساعتين من عمرك
بتشلفطي وشك عشان تبقي نانسي عجرم، خليكي بسيطة، المفروض
ينبهر بشخصيتك مش بمواهبك في الرسم والتلوين.
- ماشي.

- رابع نقطة (المواعيد). خليكي ملتزمة. أصل هتلكعي هتنزلي متنورة
وتكلمي لبس على السلم، ابن الجيران هيعاكسك، تقومي رازعاه قلم على
وشه، وبدل ما تكلمي حسين تقوليله: «أنا وصلت» هتكلميه عشان يبجي
يضمنك في القسم!
- تمام حاضر هانزل بدري.

- خامس حاجة (التليفون). ذوقيا بلاش تليفونات كثير وانتوا قاعدين مع بعض، أكثر من مكالمتين في ساعة واحدة يعتبر كثير، بلاش texting خالص إلا لو القعدة عملة وزهقانة وساعتها خدي بعضك وامني أكرمك. OK، مش هامسك التليفون خالص.

- سادس حاجة ودي مهمة جدا نخلي بالك، (الكلام). اتكلمي براحتك وخليكي على طبيعتك بس اوعي روح أستاذة لميس الخديدي تخضر في المكان وتسيطر عليك. اديله فرصة يتكلم، الكلام أخذ وعطا باعطا!

- عطا مين؟ باقول لك إيه، إنتي عارفة إني لخرة ومش باعرف أفتح مواضيع. اتكلم في إيه؟ أجهز مواضيع معينة مثلا؟ ساعديني!
- أنا عارفاكي أكثر منك يا كيمي، وعارفة إنك مش من الناس اللي تقدر تفتح حوارات بسهولة وترغي فيها، لكن ده مش معناه إنك تصنعني. ماتخضريش حاجة في دماغك قبل ما تروحي، ماتعمليش بروفة قبلها بيوم قدام المرايا هي مش مسرحية، مش المفروض إنك تجهزي مجموعة مواضيع تتكلمي فيها. ياما ناس نجحوا إنهم يبهروا اللي قدامهم في أول قعدتين تلاثة بشخصية مصطنعة وروح مزيفة، لكن ندموا بعد كده لما علاقتهم فشلت بعد ما الأقنعة وقعت والوقت كان كفيلا بأنه يظهر الحقيقة. صدقيني، لو بقيتي على طبيعتك وماعجبتيهوش أحسن كثير من إعجابه بحاجات مش فيكي. اتكلمي براحتك بس افتكري كلمة السر (خليكي على طبيعتك). لو هتفتحي مواضيع، اتكلمي عن حاجات مثيرة زي شغلك، أحلامك، هواياتك، بلاش تتكلمي عن الأكل كثير أو ماتكلميش عن الأكل خالص!

سكتت شوية كثير لدرجة إني شكيت إنها بتكتب كل كلمة ورايا من أول المكالمة وبعدين قالتلي: «تمام كده! أنا هادخل أنام بقى وهابقي أطمئنك بعدها»

- استني! أنا لسه ماخلصتش كلامي. الضحك من غير سبب قلة أدب، بس الابتسامة حتى لو من غير سبب حلوة كده، تنعش وتفرفش. ابتسمي، ابتسمي كثير.

- آه هابتسم حاضر.
- باقول لك إيه يا كوكي، مافيش داعي للاستعجال في أي شيء.
ماتستعجلش وانسطي يا حبيبي.
- حاضر. شكرا، شكرا جدا.



- وبعدين؟

- قفلت معاها وأنا مستغربة الموقف كله لدرجة إن دماغى ماكانتش
مستوعبة اللي حصل. كاميليا لسه من كام يوم كانت بتتكلم بكل ثقة عن
إيمانها بالحب الحقيقي والحب من أول نظرة والحب من بعيد لبعيد. جايز
(الإيمان) و(اليقين) اللي عندها هما إجابة السؤال الثالث والأهم، (إزاي
توصل للي احنا عاوزينه)؟

وجايز إجابة السؤال الثالث مجرد نتيجة طبيعية لإجابة السؤال الأول
والثاني بيأنا نعرف إحنا مين بعجد ونعرف كمان إحنا عاوزين نعمل إيه في
حياتنا. استغرقت في تفكيري كالعادة ولما ماوصلتش لحاجة.. نمت.

- وصلنا لآخر يوم في الأسبوع. يوم الخميس؟

- مضبوط. صحيت ثاني يوم الصبح بدري من غير منبه، وكالعادة
صليت وحمدت ربنا، فطرت ونظيت في حاجتين مش فاكرة دلوقتي غير
إن ماكانش لهم أي علاقة ببعض.

- اشمعنى المرة دي مش فاكرة، وانتي ازاي أصلا فاكرة لبسك في كل
يوم بتحككي عنه؟ مش غريبة شوية؟

- لا مش غريبة خالص. كل الحكاية إن الفترة الأخيرة من أكثر الفترات
المحورية في حياتي، فترة مهمة بشكل مش هتفهمه غير أما تسمع الحكاية
للآخر.

- شوقتيني أسمع الباقي. طيب كملي.

- بعد ما لبست ضربت نظارة الشمس عشان أداري آثار قلة النوم
المتراكم. سلمت على ماما وبُست راسها وخذت دعوة كل يوم:
«روحي يا بنتي ربنا يحب فيكي خلقه»

فتحت باب الشقة ونزلت، لقيت عم ناجح يمسح العربية وكالعادة
أول ما شافني قال لي: «صباح الفل يا دكتور»
بصيتله في صمت وطبعاً فهم أنا قصدي إيه من غير ما أقول ولا كلمة:
«ثواني ماطلع للدكتور إبراهيم»

وبعد حوالي عشر دقائق نزل إبراهيم ولما شافني قال لي: «صباح الخير»
بصيتله ومارديتش والغريبة إنه برضو فهم أنا قصدي إيه، قال لي
«طيب أنا ماحرك العربية عشان تطلعي، عموماً أتمنالك يوم سعيد»
مشيت من غير ما أرد عليه. ماكتتش عاوزة أستهلك طاقتي القليلة
اللي فاضلة آخر الأسبوع في أي حاجة مش مهمة. يوم الخميس هو أكثر
يوم بتصيبني فيه أعراض قلة النوم والإرهاق. إحساس (قلة النوم) وإنك
تشتغل بنص دماغ ونص روح من أسخف الأحاسيس اللي باعيشها زي
ملايين الناس اللي بتجري وبتشتغل طول الأسبوع اللي أيامه بتمشي كالتالي:
يوم الحد هو يوم (ماحدش يكلمني أنا مش نايمة كويس) ويتميز
بضيق الخلق والعصبية ويكون الإحساس المسيطر هو إني عاوزة أعور
حد أو أنزل بوشي على أي سطح مستوي - مكتب، كنية، دكة في الشارع -
وأنام عليه.

يوم الاثنين ده يوم (أنا مانمتش بقالي يومين ومش طايقه حد) ويتميز
بتناول كميات كبيرة من الكافيين وشره عام نجاه السكريات، المشويات،
المقليات، المشويات، أي كلب في رغيغ، والشعور المسيطر هو إني عاوزة
أنام في أي وضع وفي أي مكان حتى لو هائبت رقبتني كده وأنام وأنا واقفة
زي الحصان.

يوم الثلاثاء بقى، وما أدراك ما يوم الثلاثاء، ده يوم (أنا مين؟ أنا فين؟
أنا إزاي؟)، تحس بصحوة عامة بسبب جرعات الكافيين من اليوم السابق
تأبتج عنه العديد من الأسئلة الوجودية زي مثلاً، (هو احنا عايشين
ليه؟)، (هو أنا تخنت ولا إيه؟)، (هي البنطلونات الشارلستون رجعت
موضة بجد؟)

يوم الأربعاء بقى يوم (مش ده جدو الله يرحمه؟)، وده اليوم اللي بابدأ
أعاني فيه من هلاوس سمعية وبصرية زي رؤية بعض الكائنات الخيالية
بنعدي بسرعة قدام العربية أو في صالون بيتنا واختلاط الواقع بالخيال.

وعادة بابتداء يوم الخميس أبتهج نسبيا إني قربت أنام من غير ما اضبط
المه مع وجود دلدنة في العينين أو في الجسم كله وفقدان القدرة على التعبير
بالوش اللي بيقتل على شكل ثابت وكل ردود الأفعال شكل واحد (شكل
العضة)!

- تعرفي.. أنا مرة قربت مقال بعنوان (العظما.. لا ينامون)

- والمقال ده بيتكلم عن إيه؟

- يتكلم عن شخصيات تاريخية مشهورة عمرهم ما ناموا ٧ أو ٨
ساعات على بعض، زي (ليوناردو دافينشي) و(نيوتن) و(توماس إديسون)
وغيرهم. عندك مثلا (نابليون بوناپرت) كان بينام من ١٢ بالليل لحد ٢
صباحا ويصحى يشتغل لغاية خمسة ويعددين ينام لسبعة صباحا وماينامش
تاني. يعني كان بينام ٤ ساعات بس في اليوم كله.

- تقصد إن أنا بانام كثير ومع ذلك باشتكي ولا إيه؟!!

- لا خالص، أنا أقصد إن معظمنا ماينامش كويس ومعظمنا بيقتضي
نص وقته في الشغل تعبان، لكن في الأوقات اللي زي دي (الإنتاجية) بتزيد
جدا. أنا عمري ما أنجزت حاجات كبيرة غير وأنا تحت ضغط وحاسس
إن الوقت بييجري.

لكن فيه أوقات تانية بترجع ننام ٧ و ٨ ساعات، زي (نابليون) ما كان
يعمل أوقات السلام، كان بينام من ١٢ ل ٧ زي أي إنسان عادي.

- الشغل بيغير فينا كل حاجة، حتى ساعات نومنا. أنا مش فاكرة أنا
كنت بانام كام ساعة وأنا صغيرة. أنا باشتغل من أول سنة في الجامعة. تقدر
تعتبرني نموذج للمواطن الصالح. جيت ٩٩٪ في ثانوية عامة. دخلت كلية
(قمة) واتخرجت بتقدير (امتياز) مع مرتبة الشرف. كنت طالبة مجتهدة
حسنة السمعة والسير والسلوك. والحمد لله ربنا لم يبتليني بأي عادة سيئة
زي تدخين السجاير أو الشيشة. أكثر حاجة غلط باعملها هي استهلاك
كميات غير منطقية من القهوة والشوكولاتة وطبعا الحبوب اللي بتطلع في
وشي تاني يوم بتفضحني مها حاولت أخبي. بانام قليل وباصحى بدري،
باتعشى خفيف وباغسل سناني ورجلي قبل ما أنام، مواطن صالح بيعبد
ربه ويحب أسرته ويشتغل بإخلاص عشان يخدم وطنه.

لكن ساعات كثير باسال نفسي نفس السؤال اللي سألته (Meg Ryan)
لنفسها في فيلم You've Got Mail لما قالت:

Sometimes I wonder about my life, do I do it because I like
it, or because I haven't been brave?

هو أنا عابشة الحياة دي عشان أنا حباها ولا عشان عمري ما كنت
شجاعة كفاية إني أحلم بغيرها؟

أنا إمتي اتغيرت قوي كده؟ إمتي بقيت باستنى آخر الأسبوع عشان
أنام وآخر الشهر عشان أقبض وآخر السنة عشان آخذ أجازة؟
وأنا صغيرة خالص كان نفسي لما أكبر أطلع رائدة فضاء، قرئت كتب
كثير عن الكواكب والنجوم والنيازك والشهب.

ولما كبرت شوية وانتهاى للبلد زاد، حيت أدرس تاريخ الفراعنة ولما
أكبر أبقى من أشهر علماء الآثار في العالم ومش بعيد آخذ جايزة (نوبل)
كمان. قعدت سنين باقرا كتب عن الأسر الفرعونية والملوك وعلوم قدماء
المصريين وفتونهم.

لما دخلت كلية الإعلام حيت التمثيل وانضميت لفريق المسرح
الجامعي وأخذت جوايز كثير وساعتها حسيت إني نجمة وقررت إني
ماسافر أول ما أخرج وأمثل في هوليوود وآخذ جايزة الـ (أوسكار) وأبقى
أول ممثلة عربية تحصل على الجائزة.

كان دايبا عندي إحساس إن فيا حاجة مختلفة، حاجة بتحركني عشان
عاوزة أحققها، دايبا كنت مستنية، دايبا كنت باقول (لما).

كل واحد فينا دايبا عنده حاجة مأجلها (لما) حاجة تانية تحصل
وضميره مرتاح ومش شايل همها، حاجة حاططها على (قائمة الانتظار)
بشكل شرعي..

لما أخلص اللي ورايا، هاعمل كذا وكذا.. لما هاروح هناك هاعمل
وهاسوي.. لما يبقوا يكلموني هابقى أقول واحد اتنين ثلاثة..

لو هي حاجة صح وعاوزينها بجد ليه مانعملهاش دلوقتي؟ لو حاجة
فعلا تستاهل، ليه بناجلها؟ ليه بنستنى وضميرنا مرتاح؟ ليه دايبا الظروف
سه مش سايحة؟ يا ترى إمتي هتسمح؟ يا ترى هتسمح أصلاً؟

(لما) دي ممكن تتأخر قوي، ويمكن ماتجيش خالص، ويمكن تبجي
وانت مش واخذ بالك.

كل واحد فينا عنده حاجة.. حاجة واحدة صغيرة أو كبيرة، حاجة
واحدة عارف إنه لو حققها هتغير حياته كلها. كلنا عندنا الحاجة دي،
حاجة بنحلم بيها واحنا صاحيين، بنفكر فيها طول الوقت، حاجة بنحبها،
حافظين تفاصيلها، والسبب ما مش عارفين نحققها، خايفين أو فاكرين إننا
نخايفين، مزددين، ضعفاء، أو فاكرين نفسنا ضعفاء، حاسين إنه مش وقته أو
إنه فات وقته، حاولنا كثير وما نفعش، أو لسه ما حاولناش أصلا. تعددت
الأسباب والحاجة واحدة.

ساعتها سألت نفسي: «أنا إيه الحاجة الكبيرة اللي عايشة عشان أحققها؟
إيه الهدف؟ إيه الشيء اللي عاوزه أو صل له؟ أنا عاوزه أعمل إيه بحياتي؟»
في اللحظة دي اكتشفت إن حياتي بقت عبارة عن سلسلة حلقات
زي بعضها بالضبط مربوطة من دماغني إلى ما لانهاية، أيام فاضية بتتكرر
بتفاصيلها بمشاعرها بمشاكلها بهمومها.

ياصحى كل يوم أنزل أقابل نفس الناس، وأروح نفس الأماكن، أقول
نفس الكلام، وأحس بنفس الملل والروتين اللي بسرعة باحاول أطردهم
من دماغني وأقول لنفسي: «كلها كام يوم وأفضى، وساعتها هاعمل اللي
باحبه»

لكن كل يوم باعمل نفس الحاجة..

وكان اليوم بيتكرر..

وكان حياتي بقت عبارة عن دائرة مقفولة بالف فيها بشكل ميكانيكي،
مكرر، أجوف، نمطي وخالي من أي استمتاع.

في اللحظة دي عرفت إنني من غير ما أحس تحولت للنموذج اللي كنت
باترياق عليه وأنا صغيرة.. في اللحظة دي عرفت إنني بقيت الأستاذ عبد
السميع.. أو الأستاذة إحسان.. النموذج المعروف للشخص المحترم
صاحب الوظيفة المرموقة.. الشخص الروتيني.. الشخص الملل..
الشخص الحزين.

وصلت عند الشركة وركنت في أقرب حطة فاضية لقيتها. ركنت في حنة

شمس جدا، بطلت العربية وقلقت الشبابيك وسحبت المفتاح ومسكت
دراع شنتظتي وأنا قاعدة في مكاني ومافتحش الباب. في اللحظة دي
سمعت أشرب صوت سمعته في حياتي..
- سمعتي إيه؟

- الولا حاجة، عمرك سمعت صوت الفراغ في دماغك؟ كان الأفكار
كلها دايت في بعض وكونت خط واحد متصل من جوا نحك لآخر نقطة
في السما، واصل للفراغ، لل (ولا حاجة)، صوت كأنك كنت بتجري في
ماراثون بقالك سنين وفجأة وقفت خالص. أهو ده صوت الولا حاجة..
حاولت أمسك فكرة واحدة، أي فكرة، ولا حاجة، مابقيش عارفة أنزل
من العربية ولا أدور وأمشي وأفضل سايقة إلى ما لا نهاية، مابقيش عارفة
أفكر أو أقرر أي حاجة..
- وبعدين.

- الشمس طبعا كانت أقوى مني، واحتياجي الفسيولوجي إني أشرب
ميا بسبب الحر سيطر عليا وخلاني أنزل بالعافية بعد ١٠ دقائق لوحدي في
عربية مقفولة ومركونة في الشمس وأشبهه بالساونا.
دخلت الشركة، وجات عيني في عين أمين وعادل اللي فضلوا باصيني
بابتسامة كل يوم ومستنيين أصبح عليهم، بصيتلهم باستسلام وماتكلمتش
وساعتها حسيت إني خذلتهم وفشلت حتى إني أصبح عليهم زي كل يوم.
رجلي كانت ثقيلة على الأرض، نفسي بس أوصل مكتبي حتى لو بقوة
الدفع. طلبت الأسانسير ووقفت أستناه وأنا باتمنى اليوم بعدي بسرعة
من غير ما أحتك بأي كائنات حية، في اللحظة دي كان نفسي يكون فيه
خاصية Offline أو Hidden في الحياة الواقعية زي ما هي موجودة في الحياة
الافتراضية لكن على رأي أبو الطيب المتنبي: «تجري الرياح بها لا تشتهي
السفن».

وقبل ما أوصل مكتبي قابلت محمود المشد:

Good morning, Princess..

كل اللي كان في بالي ساعتها هو مركز في وشي كده ليه؟ هو وشي فيه
حاجة غلط؟

You are not okay, are you? -

بدأت أفكار كثيرة ومهمة تدور في دماغي والفكرة تهر الثانية: «هو أنا زهقانة؟ لا أنا جعانة»

قال لي: «طيب أنا كنت عاوز أتكلم معاكمي في حاجة كده»
سألت نفسي: «هو أنا كان فيه حاجة ورايا النهارده ونسيتهما؟»
- أنا عارف إنك بتدوري على Superman وإنتي تستاهلي لكن أنا..
فضل محمود يتكلم وأنا باحاول أفكر كان ورايا إيه بالليل، تقريبا ورايا ميعاد دكتور؟

قال لي: «على فكرة أنا اترقيت الشهر اللي فات وخلصت أنساط شقتي..»

وبعد تفكير اكتشفت إني رحيت للدكتور من أسبوع.. يمكن محتاجة أودي حاجة للمغسلة؟

قال لي: «على فكرة، I think you need to know me، جايز لما تعرفيني أكثر تف..»

وبعد تفكير عميق جدا ماوصلتش لحاجة وبدأت أتساءل: «هو أنا معايا كام؟ هو النهارده كام في الشهر؟»

- بس احنا مش بنعرف نتكلم في الشركة.. So.. Are you Okay؟؟
مشيت من غير ما أرد على محمود المشد وأنا حاسة إني عشت نفس اليوم ده قبل كده، نفس التفاصيل نفس اللحظات نفس المشاعر أو نفس (اللامشاعر). ركبت الأسانسير وكل اللي مسيطر على دماغي التكرار اللامنطقي للأحداث، نفس الناس، نفس الكلام، أنا متأكدة إني عشت نفس اليوم ده إمبراح أو يمكن أسبوع، لا، أكثر، جايز شهر، جايز سنة أو اتنين، جايز تسعة.

وقفت الأسانسير وفتحت بابه وجريت منه طلعت على السلم في محاولة بائسة إني أغير أي تفصيلة في اليوم، أي تفصيلة ولو صغيرة. وصلت مكتبي وقعدت على الكرسي، بصيت حواليا على وشوش زمالي المهمومين، المركزين منهم والسرحانيين. مافتحش اللاب توب وندمت على عم كامل: «تشربي حاجة يا أستاذة؟ أعمل لك واحد كابتشينو؟»

- بالمقول لك إيه يا راجل يا طيب، إنت عندك أحلام؟ قصدي يعني

بتحلم؟

- يا احلم يا أستاذة. لو بظننا تحلم نموت. مش فيه غنوة بتقول كده؟

- أبوه. طيب بتحلم بإيه؟

- يا احلم بالستر، بالصحة، بعيثة كويسة. يا احلم إني أنظمن على العيال

وأكلهم هما وأمهم.

بصيتله وهو بيتكلم وعينيه بدأت تلمع لمجرد إنه يقول جملة فيها كلمة

(يا احلم) اكتشفت في اللحظة دي إن عم (كامل) الإنسان البسيط محظوظ

أكثر مني بكثير. على الأقل عارف أحلامه وماحتاجش أكثر من نواني

عشان يرد على سؤال جوهرى لو كنت أنا اتسألته ماكتش هاعرف أرد بعد

ساعات أو أيام. كنت فاكرة إن عندي أحلام ومستنية (لما)، لكن طلعت

مش عارفة أصلا (لما) إيه، مش عارفة حتى (لما) دي لو جات هاعمل إيه.

أنا ليه بطلت أجري ورا أحلامي؟ هو أنا ناقصني إيه؟

بأيدي أقرر أغير كل حاجة وأتمرد عليها لكن جبانة. بالنسبالي ما فيش

عذاب أسوأ من اتخاذ القرارات المصيرية، ارموني في البحر، ارموني من

الدور العشرين، من طيارة، احكموا عليا أنفرج كل يوم على مسلسلات

تركي بس ما حدش يطلب مني آخذ قرار مصيري، بافقد فجأة القدرة

على التركيز - وأحيانا الذاكرة - وما باعرفش أعمل أي حاجة أو أختار

أي حاجة. القرارات المصيرية دايا أسهل على الصغيرين قوي اللي لسه

الدنيا ما ورتهمش وشها التاني لكن الكبار اللي بيقررروا ويغيروا حياتهم

١٨٠ درجة دول أصحاب قدرات خارقة، قدرات مش عندي وبتوترني

ويتنعص عليا حياتي.

كلمت إيهاب أستشيريه عشان آخذ قرارات سليمة أو على الأقل أستبعد

القرارات المنيلة من قائمة الاختيارات. سكت شوية وقال لي بصوت واثق

وعميق:

- قبل ما تاخدي أي قرار (غَيْرِي).

- نعم؟

- غَيْرِي. غَيْرِي أي حاجة، المهم تَغَيَّرِي والسلام.

- يعني إيه يا إيهاب؟

- يعني لو قاعده في البيت وعاوزه تاخدي قرار، قومي (تغيري) هدمك، البسي أي حاجة غير الهجامة وارجعي فكري في نفس القرار تاني وشوقي، لسه شايفة القرار صح؟

سرحت في كلامه وقلته: «ولو لسه؟»

- يبقى تغيري النشاط اللي إنتي بتعملينه واعملي أي نشاط غيره، افحصي التليفزيون، افحصي التلاجة واضربيلك ساندوتش جبنه، العبي بلاي ستيشن، رازي في أي حد في البيت، المهم تغيري النشاط وتفكري تاني.

- ولو لسه؟

- لو هو هو نفس القرار في دماغك، غيري المكان. انزلي من البيت، اقعدي في حته وفكري تاني، روجي جبنه، روجي سينما، روجي مشوار.

غيري المكان وفكري تاني.

- ولو لسه؟

- غيري وشوش، روجي لعمتك، انزلي مع حد ماشفتيهوش من زمان، قلبي في دفاترك القديمه، غيري الوشوش الأول وارجعي فكري تاني.

- ولو لسه؟

- يبقى مافاضلش غير إنك تغيري أي حاجة عندك. اشترى جزمه جديدة والبسها، اشترى ساعة، غيري موبايلك.

- ولو لسه؟

- لو لسه، يبقى ما فيش قدامك غير إنك تتكلي على الله.

- أنا باقول كده برضو يا إيهاب. أصل بعد المرات اللي فاتت ده كله أكيد هيطلع ده القرار المضبوط. أنا غيرت هدومي ومكاني والناس والنشاط والساعة والموبايل والعيشة واللي عايشينها، ده أنا كده تقريبا غيرت كل حاجة ماعدا اسمي!

- بالضبط

- بس باقول لك إيه، لو بعد كل ده طلع قرار مش سليم هاجي أمسك فيك أنت، أمان؟

- أمان يا لمضة ياللي تعبانني معاكي!

فقلت مع إيهاب ودخلت لمديري المكتب، فعدت معاه ربع ساعة
وما خرجتش غير بعد ما أقتنعته بوافق على طلب أجهزة مفتوحة بدون مرتب
مش هارجع منها غير وأنا واحدة (قرارات). لميت حاجتي وخرجت من
باب المكتب وطلبت الأسانسير.. وكالعادة: «ماشية بلدي؟»
- آه يا محمود فيه حاجة؟

No -

حط إيدته في جييبه وبعض بعيد ويعدين بعض في الأرض وفي السقف زي
اللي متردد يتكلم ويفكر، وبعد ١٠ ثواني لف وشه ثاني وقال لي:
- تعرف في إني عمري ما فهمتلك؟
- أزاى؟

- أنا عرفت بنات بعدد شعر راسي، ومع الوقت اقتنعت إن البنات
عموما ٥ أو ٦ أنواع، بقيت لما باشوف أي بنت بسهولة باعرف هي أي
نوع، بتحب إيه، ودخلتها إزاى، إلا واحدة بس.. إنتي. انتي فعلا مميزة
جدا.

- شكرا. هاعتبرها مجاملة لطيفة.

- It's a fact.. دي حقيقة.. مش مجاملة، إنتي متاهة.. You are a maze.

- سلام يا محمود.

مشيت وطول الطريق بافكر في كلام إيهاب ونصيحته: «لازم أغير
عشان أتغير».

وصلت عند البيت وأنا مقررة إني هاغير هدومي وهاخذ ورقة وقلم
وأنزل أغير المكان والوشوش وأقعد أفكر أحلامي وأكتبها بالتفاصيل
المملة.

دخلت العمارة، قابلت الحاج أنور جارنا قدام الأسانسير. سألته:

- أزي حضرتك يا أنكل عامل إيه؟

والغريبة إنه يومها قال لي: «والله مش كويس قوي» وحكالي في إيجاز
عن المشاكل الصحية اللي بيعاني منها والوحدة اللي عايش فيها وولاده اللي
مايبسألوش عليه، سلمت عليه وطلعت البيت. فقلت باب الشقة ودخلت
أوضتي، ووقفت قدام المرايا، واستغربت جدا أول ما شفت وشي!!

اكتشفت اني من ساعة ما قابلت الحاج أنور لغاية ما دخلت أوضتي وان
مبسة الابتسامه البلاستيكية بتاعة "أزي حضرتك يا أنكل عامل إيه؟"
زي اللي حافظ مش قامم، مع إن رد الفعل الطبيعي إن وشي كان يقفل
ساعتها شوية، أو أصطنع الاهتمام والتأثر، أو على الأقل أمسح الابتسامه
المجمدة المحفوظة دي.

زي ما يكون فيه شوية كلام معاد بنقله لبعض كده وخلاص، بنقله
في شكل سؤال لكن في الحقيقة عميرنا ما بنبقى مستنيين إجابة، أو مستعدين
نسمعها، أيا كان اللي هيتقال هيعدي على وداننا مرور الكرام زيه زي باقي
أسرة (السلامات) و(التحيات) و(التهاني) و(المعايدات)، شوية كلام
مكرر بيتعاد ويتقال بنفس الأداء ده..

أزيك؟ عامل إيه؟ إيه الكلام؟ الكلام على إيه؟ إيه النظام؟ إيه
الأخبار؟ كله تمام؟ أزي الصحة؟ أزي الأولاد؟ طب المدام؟ ماما عاملة
إيه؟ سلمتي عليها؟ بابا عامل إيه؟ سلمتي عليه؟ انت عامل إيه؟ سلمتي
عليك؟ فينك؟ عاش من شافك انت فين يا راجل؟ لما افتكرت؟ بتكلم
جد؟ قول والله؟ هو فيه كده؟ مين يقول كده؟ مين قال كده؟ أنا قلت كده؟
مين فين؟ خلاص كده؟ طب هنشوفكوا تاني؟ هنتقابل إمتي؟ نظبطها
ونتكلم طيب؟ ماتنساش تسلمتي عليه ماشي؟ ماتنساش تسلمتي عليها،
تسلمتي عليهم، تسلمتي علينا؟ ماشي؟ ماشي؟ يلا سلام سلام سلام.
دخلت أوضتي وبدل ما أغير هدومي وأنزل تاني، غيرت، ونمت.

* * *

- فهميني بقى، دلوقتي إنتي أخذتي أجازة عشان تحققي أحلامك،
صح؟

- لا خالص. خدت أجازة عشان أتعرف على أحلامي أصلا، أفكرها
وأتعرف عليها من أول وجديد.

- حلو قوي! دي خطوة شجاعة منك جدا. وعمليتي إيه؟

- صحبت تاني يوم متأخر طبعا، كنت فعلا مرهقة وحاسة إن تعب
السنين اتجمع كله في ليلة واحدة. قمت صليت وحمدت ربنا إنه اداني يوم

جديد أعيشه وفتحت الموبائل لقيت آخر مكالمه عملتها كانت مع (إيهاب)
وافكرت إني لازم أعمل بالنصيحة و(أغير) وأول تغيير هاعمله هو إني
أغير هدومي لكن السؤال بقى، ألبس إيه؟

ألبس casual عادي ولا أغير شوية؟ طيب ألبس فستان؟

لو هاللبس فستان، ألبس الفستان الفوشيا ولا الكحلي؟

قعدت أفكر وأقول لنفسى، الكحلي لبسته في عيد ميلاد مايسة ومش

هيبسني بالتغيير اللي أنا محتاجاه، ألبس الفستان الأخضر في أبيض؟

خلاص خلاص! مش هاقعد اليوم كله في فقرة اللبس يعني!! هاللبس

الفستان الاسود أبو حزام؟ إيه ده!! ده قصير قوي!! هو صغر عليا ولا أنا

تخنت؟

شكلي زي الحيزبونة! هو يعني إيه (حيزبونة) أصلا؟ هو أنا تخنانه؟

تخنت أناها؟

وبعد عناء مريب، ولبس وقلع يبجي ٢٠ مرة استقرت هاللبس إيه

ومارتحتش غير لما نزلت من البيت متشبكة وعلى (سنجة) ١٠. هو يعني

إيه سنجة، صحيح؟

- ماعرفش، لكن عندي سؤال، انتي كل يوم كتي بتلبسي في خمس

دقايق أي حاجة وتنزلي.. إيه اللي اتغير؟

- اللي اتغير إني ركزت في كل تفصيلة باعملها في يومي، قبل كده كنت

عايشة الحياة بتفاصيلها لكن بشكل أوتوماتيكي محفوظ، باصحى من النوم

عشان لازم أصحى في الميعاد، بافطر أي حاجة وباللبس أي حاجة عشان

لازم أفطر وألبس وأنزل أروح الشغل. فيه حاجات صغيرة لو ركزنا فيها

هنكتشف إن فيها متعة كبيرة قوي لكن إحنا بنضيعها بالروتين، بنضيعها

عشان بنعملها من غير روح، عشان حافظين، منها اللبس، والأكل، إمتى

آخر مرة فطرت فيها حاجة معينة عشان نفسك تفطر الحاجة دي مش

عشان لازم تاكل قبل ما تنزل؟

- من كثير قوي. تصدقي عندك حق!

- شفت بقى! المهم، سلمت على ماما وبُست راسها وخذت دعوة كل

يوم:

«روحي يا بتي رينا بحب فيكي خلقه»

فتحت باب الشقة وأنا مقررة إني مبدئيا ومن باب التغيير هاتمشي عمل
رجلي وهاحاول أروح أي مكان أو أعمل أي نشاط ما يكونش أبعد من
كيلومتر مربع عن البيت.

من أول يوم اشتغلت فيه، بانزل يوميا في نفس الميعاد وياقابل نفس
الناس تقريبا. دايا كانت بتشغلني فكرة إننا بنقابل كل يوم ناس من غير
ما نشوقها.. إمتى آخر مرة ركزنا في وشوش بعض وحطينا نفسنا مكان
الناس اللي قدامنا؟

أول واحد شفته كان (الحاج أنور). بالرغم من كبر سنه وعكازه اللي
مايفارقش إيدته، لكن كل يوم كان بينزل، تقريبا كل يوم باشوقه وأنا نازلة
الصبح، نفس اللبس دايا، جلاية بيضا وشبشب جلد.. ساعات يضيف
طاقة بيضا. الحاج أنور عليه علامات استفهام كثير.. كلام من الجيران اللي
عزلوا والي لسه قاعدين.. يا ترى إيه قصتك يا عم أنور.

بعد الحاج أنور لمحت عم ناجح، الغفير النوبي اللي بيحرس العمارة..
عمري ما عرفت عنده كام سنة، لكن بناته الثلاثه أكبرهم في خامسة
ابتدائي يعني حوالي ١١ سنة، يعني (ناجح) في أواخر الثلاثينات، لكن
سنانه اللي وقعت وصوت كريمة الكحة اللي بتجيله مخلصين شكله أكبر..
غلبان يا (ناجح)، النوبة جنة والقاهرة قاهرة بجد. أكل العيش يا ولدي.
من العلامات المميزة في منطقتنا الراجل بياع الفوط الصفراء. من يوم
ما وعيت وأنا باشوق الراجل ده في نفس المكان، عجوز بس كله طاقة.
لو بتعدي من إشارة ميدان الروضة يبقى أكيد بتشوقه، شايل شوية فوط
صفراء، وساعات علب مناديل ورق، غلبان بس راجل، في الشارع بيحجب
القرش، وخطوط وشه بتحكي حكايات الحزن فيها أكثر من الفرح، بيرد
دايا بنفس الجملة: «عايشين والحمد لله»

صحيح.. كل واحد فينا له دنيا.. كل واحد فينا في دنيا.

فضلت أتمشى في شوارع جزيرة النيل الجميلة بلا هدف وفي دماغني
أسئلة وجودية كثير زي الإنسان بيعيش فيه؟ ليه الناس بترمي زباله في

الشارع؟ هو الحب الحقيقي يعيش يا حبيبي بجد زي ما الأستاذ (محمد فؤاد) قال لنا ولا لآلا ١٩٩١

شوية ورجليا جابني عند المكتبة الصغيرة اللي كنت باجيب منها الأقلام والكشاكيل أيام المدرسة. أنا فاكرة وأنا صغيرة كنت باحب قوي اليوم اللي باروح فيه (مكتبة هندي)، فاكرة ريحة اليوم ده وجو الخريف، ثاني أو ثالث يوم حد في شهر سبتمبر.. أول يوم في الدراسة يعني.

مكتبة هندي مكتبة صغيرة في شارع النيل، أنا مش عارفة ليه اسمها كده بس غالباً ده اسم صاحبها، الراجل العجوز أبو شعر أبيض اللي كان يقعد على كرسي في وسط المكتبة ياخذ الفلوس يحطها في درج صغير ويكتب حاجة في دفتر قدامه. كان دايماً بيقتى معاه راجل ثاني في بداية الأربعينات يساعده.. كان شبهه شوية.

المكتبة دي رغم صغرها إلا إن كان فيها البدع، كل حاجة حرفياً، من أدوات مكتبية لكتب خارجية وحلويات.. وكان المدرسين في النيل عارفينها وطبيعي تسمع المدرس أثناء الحصّة بيقول: «روحوا اشترؤا كتاب كذا من (مكتبة هندي)»، وأصحاب المكتبة كمان عارقين الطلبة وأولياء الأمور كلهم.

كمية ذكريات مرت في دماغني أول ما شفت الراجل اللي كان زمان في الأربعينات وبقي دلوقتي في الستينات وشعره أبيض زي صاحب المكتبة: - مساء الخير. عاوزة دفتر شكله حلو، ويكون صغير. حاجة ينفع أكتب فيها خواطر يومية.

بصلي بصة طويلة وبعدين لف ووقف قدام مجموعة رفوف عليها كشاكيل ودفاتر ومشي بصباحه عليها لحد ما وقف عند دفتر وشاور عليه وقال لي: «ده ينفع؟»

وقعت في غرام الدفتر من أول لحظة، ابتسمت وقلته: «أيوه. جميل قوي. أنا أكثر لون باحبه الأزرق»

- فاكرك وفاكرك كويس، بس الدنيا اتغيرت قوي.

- وانتوا ماتنسوش. إزي الحاج الكبير؟

نزل الدفتر من فوق الرف وسحب فوطه صفراً قديمة من جنب درج

الفلوس وبدأ ينضفه وقال لي: «بخير الحمد لله بس ادعيله»

ربنا يديه الصمحة ..

خدت الدفتر واشترت كسان شو كولالة ولبان وأفلام رصاص
وبصيت على بالمطلة المكتبة المتربة اللي لوها الأصلي كان ليبي ومشيت وأنا
مبسوطة قوي زي زمان.

حسيت بالشفقة تجاه بنتي اللي لسه ماخلفتهاش وذكريات طفولتها اللي
لسه متعشها ومرتبط - في الأغلب - بقسم الأدوات المكتبية في واحد
من ال(Hyper Markets) أو غيرها من الغابات التجارية العملاقة، آلاف
الأمطار المربعة فيها آلاف المنتجات على رفوف باردة مرصومة في صفوف
متوازية، ناخذ اللي هتشره وتدفع في ماكينة إيداع بشرية حزينة مكشرفة في
صورة موظف كاشير، مافيش ذكريات.. مافيش حاجة شخصية.. ولا في
أي حاجة خالص.

كملت مشي في شارع النيل أتفرج على المحلات أو زي ما يحب
أسميها (دكاكين) اللي هي جمع (دكان). فضلت ماشية لحد ما وصلت عند
(ستوديو داود) وشفيت صورة عملاقة ليا عطوبة على باب الاستوديو
كنت اتصورتها عندهم من ٣ سنين وأنا مستعجلة عشان ألحق أرجع
السجل المدني أجدد الباسبور. صاحب المكان بيحبني قوي لأنه بيصورني
من يوم ما اتولدت ولما باتصور عندهم مرة كل فين وفين بيروز الصورة
ويعلقها في الاستوديو.

رجعت البيت خدت عربيتي واتجهت للمهندسين. وقفت في إشارة
جنينة الحيوانات وجات عربية نص نقل محملة عمال غلابة وقفت جنبي
وطبعا صوتهم كان داخل عندي جوا العربية.. قام واحد قال للثاني:
- الحق ياله يا عوض بص الحتة دي!

عوض قال له: «أهو أنا نفسي لو ربنا كرمني، أتجوز واحدة شكلها في
البيت زي كده»

كان نفسي أقول له: «شوف يا أخ عوض، الطموح جميل، لكن برضو
خليك واقعي، إذا كنت أنا شخصيا شكلي في البيت مايبقاش زي كده!»
وصلت ستار بكس وقعدت على ترايزة فاضية عليها كرسيين. مسكت
القلم وفتحت الدفتر وبدأت أشخبط. عارف افكرت إيه؟

- افكرت في إيه؟
 - افكرت زمان واحنا عيال لما في مرة كنت متضايقه وابتديت أعيط..
 - أيوه طبعاً فافكر اليوم ده!
 - يومها انت سكت خالص وفضلت مركز معايا وقلتلي: «تعرفي إن شكلك حلوقوي وانتي بتعيطي»
 - آه فافكر كويس اليوم ده كأنه كان امبارح.. حتى ساعتها بطلتني عياط وسكتي خالص..
 - ومن يومها ما عيطتش قدام حد خالص، مش بس عشان الموقف ده لكن كمان بقيت مقتنعة إن مش المفروض نسيب حد يشاركك لحظات ضعفك غير لو عمل مجهود حقيقي يخليه يستحق ده، يشاركك لحظات الفرحة ماشي، الغضب، الحماس، لكن لحظة الضعف أمانة كبيرة مش أي حد قدها.
 - أنا آسف إني ما عرفتش أكون قدها وآسف كمان إننا ما كناش قريبين من بعض الفترة اللي فاتت..
 - أنا مش باتكلم عليك، أنا باتكلم عموماً. وأنا في تالته جامعة، كنت صغيرة ومتحمسة جداً، جاتلي فرصة شغل في شركة كبيرة، رحت وكلي أمل وتفاؤل، قابلت مدير مسؤول هناك، وبعد المقابلة اعتذرلي بشدة لأنهم كانوا عاوزين خريجين وقاللي: «انخرجي وقدمي تاني» ولما خد باله من نظرة الإحباط اللي على وشي قال لي: «ما تقلقيش يا بنتي.. اللي عنده ابتسامه زي ابتسامتك دي هيشغل في أي وقت وفي المكان اللي هو عاوزه»
 بصيت على الشخبطة اللي كتبتها في الدفتر لقيتني كتبت الجملة دي، وكتبت كمان جملتك.. وابتسمت..
 - قللتك، ما تغيرتيش، ولا ابتسامتك اتغيرت.
 - بالعكس، أكيد أنا اتغيرت كثير بين أول وتاني موقف وبين اللحظة اللي احنا فيها دلوقتي لكن فيه حاجة مشتركة بين التلاتة، إن كل لحظة حقيقية.. الضحكة والدموع كانت حلوة عشان حقيقية.
 - ربنا يجعلنا ناس حقيقية في فرحها وفي حزنها وفي أحلامها. طيب، وكتبي إيه تاني؟

- ماكتبش، افكرت كلام إيهاب ليا فمكتك تليفوني واتصلت به
وقلتله: «إيهاب! ممكن تنزل تقعد معايا. أنا نسيت أنا باحب إيه!».
بعدها بساعة وصل إيهاب وقعدنا في المطعم اللي جنب ستاريكس
تفغدا: «يعني إنت يا إيهاب سبت البنت بعد ٦ شهور عشان (زهقت) من
الروتين؟ إنت سامع نفسك بتقول إيه؟؟»

- مش بس الروتين.. لكن ملل في كل حاجة.. مابقاش فيها أي جديد..
وفي آخر شهرين بقيت مش عارف أتكلم معاها خالص.. حاسس
إنها غريبة عني، كأني حيت واحدة وفي شهور قليلة اتحولت لنموذج
الزوجة المصرية التقليدية مع إننا لسه حتى ماتخطبناش.. غيرة سخيفة..
مش عاوزة نخرج مع حد ولا نشوف حد، حوارات على طول، مشاكل
بسبب وبدون، طاقة سلبية وإحباط رهيب. عارفة التحول اللي بيحصل في
شخصية البنت المصرية لما بتتجوز ده؟

- لا مش عارفاه! بس عارفة إنكم رجالة مقترية يا إيهاب مش أكثر.
- إيه علاقة ده بإنها تتحول فجأة للمادة الخام للنكد؟! هي الناس بترتبط
عشان حياتها تبقى أهذا وأبسط ولا عشان تبقى أعقد؟
فضلت باصاله وسأكته مش عشان مضايقتني كلامه زي مانا محسسه
ولا عشان أرخم عليه، بس عشان كنت بافكر في السؤال السهل الممتع
اللي هو سألته بكل عفوية.. هي الناس بترتبط عشان حياتها تبقى أهذا
وأبسط ولا عشان تبقى أعقد؟

ابتسم إيهاب ابتسامته المعتادة وسند على الترابيزة ومال بجسمه شوية
ناحيتي وقال: «المهم أنا مش جايبك مطعم غالي وهادف دم قلبي عشان
نتكلم عني، أنا جاي عشان أسمعك إنتي»
- يا عم هتذلني عشان صدر فرخة!

- صدر فرخة مشوية وسوتيه وسلطة كلها خس أهوا! إيه اللي انتي
طالباه ده صحيح؟ هو إنتي عيانة؟

- عشان ماتخنش! السوتيه أحسن من طشط البطاطس اللي قدامك ده.
- الأكل نعمة من نعم ربنا! أنا بصراحة ما بافهمش موضوع ال(دابت)
ده، ويعدين البنات على طول بياكلوا خس وما يبخشوش أبدا وعلى طول
بيدفعوا قد كده عند الكوافير وبرضو شكلهم هو هو!

- مش مهمة أشرحلك أصلا.. ولا مهمة أتناقش معاك!
 - طب باقول لك إيه.. مش عاوزة تشتغلي معايا؟
 - أشتغل إيه.. سكرتيرة حسناء؟
 - ارحمي نفسك من الهزار و(القلش)، باتكلم جد، انتي هتشتغلي
 (عيني).

- ويرجعوا يزعلوا من القلش!
 - استني بس هافهمك.. أولا أنا واحد بس مش ناس كثير، ثانيا أنا
 فعلا أقصد تشتغلي (عيني).. بصي يا ستي.. أنا مدمن شغل وانتي عارفاني،
 ولما بابدأ تصوير ممكن أنسى نفسي وتقع مني حاجات كثير.. فدأنا عاوزك
 تقومي بدور (مشرف عام على الإنتاج) تبصي على الشغل من برا.. انتي
 خريجة إعلام يعني ده مجالك.. عاوزك تيجي من وقت للثاني تشوفي
 المشاهد المتصورة، تقولي رأيك في السيناريو، التمثيل حلو ولا قلش يا
 (قالشة)!

- هو انت ناسي إني عندي شغل بجد وواحدة منه أجازة عشان أعمل
 بنصيححتك؟؟!!

- ما ده مش هيتعارض مع شغلك معايا، أنا هاحتاك معايا ساعة أو
 ساعتين كل يوم بالليل مش أكثر يعني مش هياثر على شغلك لما ترجعي
 بعد ما تاخدي قرارك.

- ماشي يا إيهاب.. هافكر.

- أنا محتاجك بجد..

- حاضر صدقني.

- ماشي.. مالك بقى؟ منزلاي على ملا وشي ليه؟

- أنا نزلتك ولا جيت جنبك!

- لا أبدا، أنا اللي كلمتني وقلتلي: «ممكن تنزل تقعد معايا عشان أنا

نسيت أنا باحب إيه!»

- خلاص خلاص من غير بستفة، كل الحكاية إن بقالي كثير

مباحلمش.. بقالي كثير يقوم بادور (الترس اللي في المكنة) بكل براعة،
 فاهم حاجة؟

- هو فيه حد فاهمك قدي..

- إيهاب.. تعرف أنا نفسي في إيه؟
- عم.. طيب ما تخيلينا نفكر سوا.. تحبني نبدأ بالجامعة ولا بشانوي ولا بإعدادي؟
- إعدادي إيه بلاش فضايح!
- خلاص خيلينا نبدأ بدلوقتي.. حاجات متنوعة.. وبما إني مخرج.. أول حاجة جات في بالي الأفلام.. مش إنتي بتحبي فيلم You've Got mail؟
- جدا..
- وأنا كمان.. وادي حاجة ممكن تبقي نفسك فيها وتبسطي وانتي بتعملها أهو.
- صح.. أتفرج على الأفلام اللي باحبها كثير.. أتفرج عليها كثير قوي.. بص من شبك المطعم وبعدين بصلي وقال لي: «ونسمع فيروز وفرانك سيناترا كل يوم»
- وأقرا كتب كثير.
- وأكيد نفسك تكتبي كتب زي اللي بتقريها. هو إنتي بتعرفي تنطبخي؟
- لا بس باعرف أكل كويس جدا! نفسي كمان أكل وما تخش.
- رد عليا بحماس شديد: «فول وكشري وسينابون وباستا»
- نفسي الأقي وقت أكبر أعمل فيه الحاجات الصغيرة اللي باحبها..
- نقعد على البحر من غير جزم أو أي حاجة تقيدنا لمدة شهر كامل..
- نفسي أسافر.. عاوزة أروح اليابان والهند وكينيا.. نفسي أكون راضية عن نفسي.. عن كل حاجة باعملها..
- انتي مش راضية عن نفسك؟
- مش بالضبط.. بس ساعات باخاف أقعد معاها لا توديني حتت غريبة وتفكرني بذكريات ما بقيتش قادرة أعيش فاكرها..
- ومين فينا ما فيش جواه حتة ضلمة هو نفسه بيخاف يدخلها..
- عارف إيه كمان؟ نفسي أكون راضية عن شكلي..
- انتي جميلة و..
- نفسي أضحك من قلبي لحد ما بطني توجعني..
- طب استني، ها حكيك حكاية هتعجبك قوي.. مرة واحد كان..

- نفسي أتكلم في أي كلام فارغ مع حد باحبه.. نفسي الأقي الأول حد
 احبه.. وأتكلم معاه.. أتكلم كثير.. أسمع وأتسمع..
 - أنا مبسوط إنك بدأتي تفتكري أحلامك.
 - أنا متشكرة يا إيهاب.. متشكرة إنك دايبا موجود..
 - روح البيت غيرت هدومي وعملت كباية شاي أخضر بالنعناع
 وقعدت في السرير، فتحت الدفتر ومسكت القلم وكتبت:
 الحقيقة رقم ١

الأحلام كنز.. واللي عنده هدف أحسن من اللي عنده فلوس

والساعة ١ بالليل صحيت على تليفونها: «ألو؟ الحقيني!»

-.. الهاتف الذي تحاول الاتصال به ربنا يكون ناظما.

- ماباهز رش.. فوقى كده وصحصحى معايا. اخلصي محتاجاكي!

- حادثة يا مايسة؟؟

- لا خالص.

- رجعتي لمعتز بتاع فيسبوك ومكلماني عشان تشليني؟؟

- لا لا مفاجأة!

قمت من على السرير ولعت النور وقتلتها: «استر ياللي بتستر.. خير يا

مايسة.. خير يا حبيبتى!!»

- بصي يا ستي.. باختصار كده، خالتو جايبالي عريس.. أمور وغني

ومناسب.. جواز صالونات.. أنا عارفة إنك ضد الحكاية دي بس خليكى

محايدة وقوليلي أعمل إيه؟

- تعملي إيه؟؟ حد قال لك إني برنامج (أنا والنجوم وهووك)؟ أنا مالي

ما تختاري!

- ما إنتي بتفهمي شوية وآرائك بتعجبني.. أنا عاوزة أنجز.. انصحيني.

- (تنجزى)؟؟ مم.. لا استني بقى لما أقوم وأعدل لك.

بصي يا مايسة.. انتي بنت لطيفة وجميلة وأنا باحبك وعشان كده

أجيب معاكي من الآخر..

- ياريت.

- حل مشكلتك يا ستي يتلخص في أربع أسئلة لو عندك إجاباتهم بيغفر
اتكلي على الله.. جاهزة للسؤال؟

- إيه؟

- واحد: هل عندك استعداد تقضي معاه من ٩ لـ ١٢ ساعة يوميا خلال
الأربعين سنة الحماية من حياتك؟

- اعمم.. هو شكله ظريف وبيقولوا إنه..

- اتنين: عندك استعداد تخلفي أطفال شبيهه في كل حاجة.. نسخة منه..

مش بس عشان التربية لكن نتيجة لتفاعلات بيولوجية معقدة في الخلايا
الجينية؟

- جينية؟ بصي أصل دول هيقوا ولادي وبعدين ال..

- ثلاثة: هل هستحملي جميع الروايح البشرية اللي ممكن تطلع منه في

البيت مش لأنه مقرف لكن لأنه (إنسان)، وتشميها وتتعملي معاه بعدها
عادي؟

- روايح إيه؟ أنا باقول لك ال..

- هستحملي شكواه؟ حزنه؟ إحباطه؟ مخاوفه اللي مش لازم بيبيها

قدامك دلوقتي لكن قدام هتعرفي إنه زيه زينا مش سورمان.. يعني
بيشككي.. بيكتب.. بيحبط؟

- ما هو أصل..

- بصي يا مایسة يا حبيبي.. الارتباط أجمل حاجة في الدنيا.. سنة

الحياة والفترة اللي ربنا خلقنا عليها.. بندور طول الوقت على نصيبنا اللي

هیشارکنا حیاتنا.. نصنا الثاني.. السؤال دلوقتي بقى، هو ده نصك؟

.....

- أدیکی جاوبتی.. وبالمنااسبة قبل ما تدوري على عريس اتعلمي تركزني

عدل، جيتولنا الكلام.



- مش جايز هو ده اللي مایسة صاحبكك عايزاه؟ مش جايز ده بالنسبها

هدف مهم؟

- مشكلة مایسة وغيرها بنات كثير.. جايز جيل بالكامل، إنه مقسوم نصين.. نص عاوز يحب ويتحب ويهرج ويلعب لكن عاوز برضو يتجوز بسرعة أي حد بأي طريقة حتى لو من غير مشاعر عشان الضغط المجتمعي.. ده حقيقي.

- احنا مجتمع بيحب يطلق القاب، وغضب عن البنت أكيد هتاخذ لقب فيهم.. مكلكة، سايبه، معقدة، مأفورة، واللقب الأشهر ذو الحروف الأربعة: (ع)-(ا)-(ن)-(س).

أيام زمان، كانت الصورة النمطية للبنت اللي ماتجوزتش، زي ما صورتها لنا السينا المصرية، صورة بنت وحشة جدا لابسة فضارة كعب كباية وشكلها غريب أو وزنها زايد وغيره. لكن دلوقتي العنوسة بقت لقب الجميلات اللي لسه في الحاجة وعشرين.. العنوسة بقت إحساس.. عباية الكل لابسها.. مع الوقت اتغيرت تماما الصورة اللي اتعودنا عليها. اللي أنا مش فاهماه، ليه نعمل تصنيف لأي بنت لمجرد إنها لسه ماتجوزتش؟ ليه نحكم عليها بناء على حاجة قدرية بحتة، حاجة البنت هي أقل طرف له يد فيها؟ الولد لما بيعتهد في شغله بيتقال عليه (طموح)، أما البنت لو اجتهدت في شغلها فيبتقال عليها (خايبه وسايبه عمرها بضيع).

- مش كل الناس بتفكر كده، ولو ده رأي شريحة كبيرة من المجتمع اللي لسه شايف دور الست جوا البيت وبيس، فيه شريحة أكبر مؤمنة بقوة المرأة ودورها في إنها تكون نص المجتمع وتربي النص الثاني. أنا عن نفسي مقتنع بده. وعملي إيه بعد ما قفلت مع مایسة؟

- ما عملتش أي حاجة لأنني ببساطة دخلت نمت.

- وتاني يوم نزلت برضو؟

- طبعا. صحيت تاني يوم وكل اللي في دماغني إني (لازم) آخذ القرار

المصري اللي هيغير حياتي كلها.

افتكرت كلمة إيهاب وإني قبل ما آخذ القرار لازم أغير.. والنهارده قررت أغير النشاط.. مش هاروح أقعد في حته.. مش هاشرب قهوة.. هاروح العب..

- تلعبني؟
- آه اللعب، إيه اللي فيها يعني هما اللي بيلعبوا أحسن مني؟
- لا طبعا.

- لبت جينز واسع وتي شيرت وجزمة رياضة و ١٨ حفاظة في إيدي..
حاجة Funky خالص.. لقيت ماما عاملة الفطار ومستنياني: «سمعتك لما
صحيتي قلت نفطر سوا.. إنتي لابسة رايحة فين؟»
- رايحة اللعب.. رايحة الملاهي.

- لوحدك؟

- آه.. عاوزة حاجة من برا أجيبها وأنا راجعة يا أمي؟
- عاوزاكي بخير.. وخلي بالك على نفسك.. روعي يا بنتي ربنا ينجب
فيكي خلقه.

نزلت من البيت.. الشمس يومها كانت حامية والجو حر بطريقة مبالغ
فيها لكن مش مهم، كنت حاسة إن كلي حيوية ونشاط. وقبل ما أوصل
عند عربيتي لقيته واقف لوحده، قتلته: «صباح الخير يا إبراهيم»
- صباح الخير. خير؟ رايحة الشغل متأخر يعني.
- لا أنا واخدة أجازة ورايحة اللعب.

- نعم؟

- اللعب.. رايحة اللعب. ماعلش هو انت إيه اللي موقفك في الشارع..
انت مش بترجع تنام؟

- لا ما أنا أصل.. عندي مشوار.. آآ.. تحبي أوصلك في حنة؟
- لا شكرا.

- بجد؟

- شكرا.

ركبت العربية وقعدت أسمع أغاني ومزيكا من تترات مسلسلات
السهانينات والتسعينات الجميلة عشان أستحضر ذكريات الطفولة من أول
اليوم. بعد حوالي ساعة، وصلت (دريم بارك) وركنت وقبل ما ادخل
وقفت أبص على اللي داخلين معايا. كل الناس جاية عشان عيالها تلعب
إلا أنا. ماعندناش في مصر ثقافة اللعب للكبار لكن برضو مش مهم، أنا

جاية عشان العيل اللي جوايا يلعب. إيه المشكلة؟ ما حدش له عندي حاجة واللي بيديني حاجة ياخذها!

وقفت عند شباك التذاكر وسط كم رهيب من العيال المزعجة المبربرة الرذلة بتجري بشكل هستيري حوالين أهاليهم اللي هما عبارة عن رجالة بكروش وستات شايلة زمزميات وشنط.

قبل ما أوصل شباك التذاكر كان فيه قدامي ست في أول الثلاثينات ومعها بنت صغيرة. أول ما شفتهم افتكرت نفسي. الست فضلت ترعق في البنت وتقول لها: «افردي ظهرك.. مالك ماشية زي الهبله كده ليه.. كفاية (لغ)، انتي ناقصة تخن!»

قلبي وجعني وعقبال ما قطعت التذكرة ودخلت كان شريط حياتي كله كر قدام عيني.

طبعاً زي ما إنت عارف، وأنا صغيرة كنت طفلة وزنها فوق المتوسط، (تخينة)، وياقول تخينة لأنني ماباحش الكلمات المايعة اللي من نوعية (مليانة شوية)، (كلبوطة)، (تختوخة). أي شخص وزنه فوق المتوسط أو وزنه زائد يعتبر (تخين).

وغير إن وزني كان فوق المتوسط، طولي كمان كان فوق المتوسط لو تفتكر، وكنت دايماً من (طوال) الفصل.

والنتيجة كانت طبعاً طفل على شكل (دولاب) صغير. والطفل الدولاب ده بيتفرض عليه يتعامل مع جمل زي: (الطويل يقف في آخر الطابور)، (الطويل يقعد في آخر صف)، و(انت يا طويل انت تعالي اقف على الفصل)!

كنت باحب التمثيل والغنا قوي لكن كانت مشكلتي في ميس (سمر). ميس سمر دي كانت مدرسة التربية الرياضية في مدرستي الابتدائية. مش بس كده، دي كمان كانت المسؤولة عن النشاط الفني زي العروض المدرسية والحفلات وكانت بتختار اللي بيشارك في العروض من فريق كرة اليد والسلة والكرة الطائرة وأنا طبعاً ماكتش منهم وكل علاقتي بالرياضة كانت تمرين الفروسية اللي ماما كانت بتوديهولي بالعافية مرة كل أسبوع. أما النشاط في المدرسة بالنسبالي كان يقتصر على عضوية أسرة المكتبة.

كنت كل يوم باقعد أبص على البنات اللي مشتركين في العروض لما كانت ميس سمر تيجي تستأذن من المدرسين في الحصّة الرابعة وتاخذهم عشان البروفة. كنت مبهورة بيهم وبشكلهم وأجسامهم وطريقة حفظهم للعروض الفنية اللي بيقدموها. وفي يوم لميت شعجاعتني كلها ورحت قتلها:

- ميس سمر أنا عاوزة أشارك في العرض معاهم.
بصتلي وقالتلي:

- مش هينفع.. أصل انتي تخينة.

أحببت جدا وكرهت الكلمة دي وكمان كرهت ميس سمر وحاولت أشارك في أي أنشطة ثانية. طول عمري باحب الأنشطة الفنية والأدبية. أنا فاكرة إني مرة شاركت في عرض كان بيتقدم قدام المدرسين والإدارة التعليمية بمناسبة عيد الطفولة وخذوني عشان أغني لكن كالعادة ادوني غنوة ماباحبهاش وعشان طولي ووزني فرضوا عليا أقوم بدور (الأم)، تصور، لعبت دور الأم في وسط زمائلي اللي قدي في السن عشان كانوا أصغر مني في (الحجم). كانت بتقول إيه الغنوة دي؟
- إيه؟

- آه افكرت.. كانت بتقول «كل سنة وانتي.. طيبة يا مامتي.. وبعودة

الأيام»

وأنا كنت بارد وأقول لهم: «يا حبايبي يا حلويين.. يا حبايبي يا طعمين.. كل سنة وانتم.. دايمًا طيبين»

لما كبرت شوية وخلصت ثانوية عامة فردت طول وخسيت، ولما دخلت الجامعة ناس ولاد حلال دلوني على فريق المسرح وطلعت موهوبة شوية وفعلا وقفت على خشبة المسرح فوق الـ ٢٠ مرة، ومثلت، وغنيت وخذت جوايز.. لكن عمري مانسيت كلمة ميس (سمر).

كلنا عندنا في حياتنا ميس سمر..

ميس سمر المدير اللي شايف إن الترقية محتاجة راجل مش ست، أو الزوج اللي منكده على مراته عيشتها عشان مش شبه (أنجلينا جولي).. أو الأهل اللي بيقتنعوا بنتهم إن عمرها ما هتتجاوز عشان تخينة أو معصصة أو شعرها قصير زي الولاد.

ميس سمر ساعات بتبقى البياعة اللي بتقنع البنت تاخد كريم تفتيح البشرة عشان البياض أحلى من السمار.

ميس سمر وغيرها من المجرمين.. المجرمين اللي في وسطنا، اللي ماشيين وعاشين عادي، مجرمي الحب، صاندي الأحلام، هادمي الطموح.. مجرمين مايتقبضش عليهم ومايبحسوش بالذنب..

- وساعات ميس سمر بتبقى (إحنا).. عايشة جوانا، جوادماغنا..

- إزاي؟ فهمني أكثر.

- ساعات بنسيب نفسنا نفرق في هواجس وأفكار زيها زي ميس سمر بالضبط، لما ينسمع للأصوات اللي في دماغنا وهي بتقول لنا (مش هاقدر)، (أكيد هافشل)، (هما صح)، (أنا مانفعلش)، لما بنسيب العالم يختار لنا أحلامنا، لما بنسيبهم يحددوا مصيرنا.

- أنا مش مصدقة إنك بتقول كده، دي جملتي!

- جايز فيه بيننا حاجات مشتركة وانتي مش واخدة بالك؟

- جايز! أنا يومها كتبت كمان حاجة شبه كده، الحقيقة رقم اتنين اللي

هاحكيلك عنها كمان شوية.

- طيب كملني..

- مافيش، حاولت أتغلب على فيض الأفكار اللي هاجتني فجأة بسبب

الموقف العبيط ده وأكمل يومي عادي. أنا مش جاية أبكي على الأطلال

أنا جاية ألعب وأتنطط ويس. وبعد ما ركبت قطار الظلام ودوامة القيصر

اشترت فشار وغزل البنات وبالونة وركبت العربية. وفي نفس موود

العودة للطفولة، شغلت أغنية الكوكي كا.. كنت باحبها قوي وأنا طفلة..

كنت طفلة هادية. عمري ما كنت من الأطفال الشقية اللي بيجرؤوا أهاليهم

وراهم مكان ما يروحوا.. ماما كانت بتتباهي بيا عشان هادية ومكان ما

تقعدي باقعد ساكنة لحد ما نمشي.. كنت باتكسف جدًا لما أروح عيد ميلاد

ولا فرح وحد يمسكني من إيدي بالعافية عشان يرقصني. صحيح، هو

إحنا ليه بنمسك العيال من إيدها بالعافية ونخليهم يرقصوا؟ على فكرة

المنظر بيتبقى مرعب.. ناس (طوال) ملمومين حوالين الطفل وبيصوله

من فوق وبيضحكوا ويتكلموا عليه ومستنيينه يرقصلهم في أول محاولة

مجتمعية لانتهاك حقوق الطفل!

- دي مكتسبات مجتمع، حاجات بنعملها من غير منطلق، من غير تفسير، ويمكن تتغير مع الوقت. واحنا نقدر نغيرها.

- ممكن. وأنا صغيرة كنت بافكر كثير قوي.. بافكر في كل حاجة.. كان عندي مدرس في إعدادي، كان اسمه / عاطف ربنا يمسيه بالخير.. كان مسيني (سقراط) عشان كنت بأسأل في كل حاجة من أول (إحنا اتخلقنا ليه) لغاية (دورة حياة الكائنات أحادية الخلية وليه بتنفصم مابتجوزش وتختلف زينا)

ماكتش فاهمة يعني إيه (بتفلسفي) وكنت شايفة إنه من حقي أعرف الحقيقة.. أفهم كل حاجة بتحصل ليه وإمتى وإزاي.

لما كبرت شوية.. عرفت معلومات كثيرة.. فضلت أفكر وأسأل وأعرف إجابات.. عرفت حاجات كثيرة لدرجة إن دماغي قفلت.. الذاكرة بقت (كومبيه)، كاملة العدد.. مابقيتش عايزة أفكر.. مابقيتش عايزة أعرف أي حاجة كمان، مش عايزة أسمع تفاصيل.. بقى نفسي دماغي تقف ولو ساعة واحدة، دقيقة واحدة حتى.. نفسي أنسى إجابات أسئلة كثيرة سألتها، نفسي أنسى تفاصيل ناس كانوا زي الملائكة والقديسين، ولما ما صدقتش إنهم كويسين فضلت أدور وأدعبس لغاية ما طلعت الوحش اللي جواهم وارتحت لما عرفت إن مافيش ملايكة على الأرض وإن كلنا رمادي مافيش أبيض أو إسود سادة.

لما كبرت بقيت عايزة أرقص..

دايمًا نفسي أرقص..

في عقلي.. في خيالي بارقص.

بارقص لما أضحك في المواقف اللي مستنيني أعيط فيها..

بارقص لما أعرف إن فيه مشكلة ماهاش حل..

بارقص عشان الدنيا تعرف إنني مش محتاجها..

بارقص عشان أكيد بكرة مختلف.. حلو أو وحش لكن أكيد فيه شيء

جديد.

- برافو عليك.. ارقصي واضحكي دايمًا. إحنا مجتمع بيعذب الأطفال

لما يبجبرهم يرقصوا بالعافية وما يتكلموش في حاجة جد.. ويبعذب الكبار

لما يبجبرهم ما يرقصوش وياخدوا كل حاجة بجد..

- عندك حق.
- وياه اللي حصل بعد ما رجعتي من دريم يارك؟
- طلعت البيت، غيرت هدمومي وعملت كباية شاي أخضر بالنعناع
وقعدت في السرير، فتحت الدفتر ومسكت القلم وكتبت:
الحقيقة رقم ٢

ماينفعش حد يمسك القلم ويكتبلك قصة حياتك.. ماينفعش العالم
بحدد مصيرك.

- مش ده نفس اللي انت كنت بتقوله عن ميس سمر وغيرها من
المجرمين؟
- بالضبط. مش كل المجرمين في السجون.. الحبيب اللي ساب مجرم
وذكرياته سجن.. الصديق اللي خان مجرم وذكرياته سجن..
- الذكريات في حد ذاتها سجن، انعدام الثقة بالنفس والمقارنة الظالة
بيننا وبين حلم عمرنا ما هنوصل له سجن، البحث عن الكمال سجن.
- هي ماها ضلعت كده ليه؟ ده أنا وانتي قلنا كلمة (سجن) يبجي ٢٠
مرة! ما تحكيلنا عن مكالمة من مكالمات مايسة ولا حاجة خيلنا نضحك
شوية.

- كان نفسي، بس بصراحة مايسة ماكلمتيش ساعتها، أنا اللي مسكت
التليفون واتصلت باللي كانت محتاجة مكالمتي، كان لازم أنظمن عليها
يومها وأعرف عملت إيه مع حسين. ردت من أول رنة زي ما تكون كانت
مستياني.

- الو.. كاميليا عملتي إيه في أول مقابلة.. طمنيني؟

- كله تمام.. مية مية.

- يعني حسين تمام.. ماخدش دبله في سنانه وهرب من وشك؟

- لا خالص بالعكس.

- وانتي مرتاحة؟ حاسة إنه مناسب؟

- أنا مرتاحة ومبسوطة، ميسوطة قوي.. ده كهان لمحلي إنه عاوزنا ناخد

خطوة رسمي.

- بس استنى يا عم حزمبل !!

- إيه؟

- قبل ما تتهورى يا ست البنات وتحلى خيالك يسحلك فى التفكير فى بكرة وتسي النهارده.. انتى لسه فى الأول وأول فترة فى العلاقة دي أهم فترة.. حجر الأساس اللي هيتبنى عليه المبنى بالكامل.. وعشان كده، أحب ألفت انتباهك لمجموعة من الأخطاء الكلاسيكية الشائعة اللي ممكن تقعي فيها فى أول الارتباط.

- قوليلي بسرعة أرجوكي !!

- مبدئيا كده يا كاميليا.. لازم يبقى ليكي شخصية وكيان مستقل، ماتحاوليش تبقي هو.. طالما عجبتيه زي ما انتى والدنيا مشيت تمام، او عي تحاولي تبقي النسخة الحريمي منه.. افتكري إن اسمك كاميليا محمود مش حسين زكي.. أنتى مصرية مش (ذكر مصري أعزب). ماشي؟

- ماشي تمام.

- تاني حاجة اقشني فى هواياتك وأي أنشطة تانية بتعملها.. حتى لو هي مجرد قعدة فى ستاربيكس، حتى لو حاجات بسيطة اقشني فيها.. ماتخلش فرحتك بالبرنس ده وبوجوده فى حياتك يسحلوكي وتسيي كل حاجة وتبدئي تمرني على دور الزوجة اللي بتجري ورا عياها بعلبة الأكل فى نادي الصيد. ماتستعجلش ياختي!

- حاضر حاضر.

- ثالث حاجة ماتبقيش ممل. دوري على مواضيع مثيرة تتكلموا فيها ويستحسن بلاش نميمة.. افتكسي مواضيع تبين إن حياتك مش فاضية.. خليكي متجددة كده.. هو آه الجذع أمور وجاي بعد شوقه بس هو برضو مش محور الكون.

Okay -

- رابع حاجة (Don't jump your horses!)

- اللي هو يعني إيه؟

- يعني ماتشطهيش بالخيال قوي، بلاش نبدأ من دلوقتي ندور على أماكن شهر العسل وأسعار تذاكر الطيران ورحلات السفاري وركوب الفيل فى تايلاند، إنتوا لسه بتعرفوا على بعض ياختي!

- ماشي ماشي .. هو مش جوز خالتك .. فبلاش تتعاملي بعشم قوري
 - بخامس حاجة .. له مافيش ليكي رصيد عنده .. اتكلمي بذوق، روجي قابليه
 في الأول .. ما تلطعيهوش، اسمعيه باهتمام .. مزقتا بس وهنقى نقول له
 في ميعادك ما تلطعيهوش، اسمعيه باهتمام .. مزقتا بس وهنقى نقول له
 بعدين إنك مجنونة ما تقلقيش ..
 - كده برضو! طيب خلاص كده؟
 - آه خلاص .. والله ما عارفة هتودي جمالي دي كلها فين .. يلا أهو كله
 بشوابه وربنا بدي كل واحد على قد نيته.

* * *

- بس كاميليا صاحبك محظوظة .. فيه ولاد كثير مش بيبنوا نيتهم
 بالسرعة دي.
 - مش محتاجين بيبنوها .. كل حاجة بتبان لوحدها.
 - يعني انتي عايزة تفهميني إنك تقدري تعرفي نية أي حد من مقابلة
 واحدة؟
 - مش فكرة مقابلة واحدة .. فكرة المقابلة (الأولى)، أول لقاء ده
 حكاية .. يتكتب فيه كتب .. أصل ده أكثر يوم المقروض كل واحد مركز
 فيه إنه يطلع أحسن ما فيه .. يعني لو اللي بان في أول مقابلة نص نص، يبقى
 اللي جاي أسوأ.
 وعموما كده .. الولاد في أول مقابلة أنواع.
 - أنواع؟ زي إيه؟
 - يعني مثلا فيه النوع (الحويط) .. تلاقية بيسمع أكثر ومركز، الكلمة
 ورد غطاها. وفيه (الاستعراضى) المبهز، الـ Showman، اللي بيتكلم كثير
 ويحرك إيديه ويقول نكت ومش بعيد يتشقلب على الحيط، وفيه كمان
 (الغامض) اللي لو جاله تليفون يبعد اتنين كيلومتر قبل ما يرد، وفيه
 (البحبوح) اللي بيعزم .. وفيه (الانجليزى) اللي بيقسم الحساب عليكم
 انتوا الاتنين، وفيه (المستعجل) اللي بيتصل بالبنت أول ما تمشي، و(الواد
 الثقيل) اللي بيستنى أسبوع قبل ما يظهر تاني. وكل نوع وله طريقته وأسلوبه

ولازم نحترمه طالما زي (حسين زكي)، جد وعاوز يرتبط بواحدة مناسبة
لشخصيته وظروفه مش عابر سبيل ضال.
- مش إيه؟

- عابر سبيل .. ضال!

- لا استني! فهميني أكثر، إيه موضوع عابر سبيل (ضال) ده بقى؟
- بص يا سيدي، فيه نماذج من الرجالة بيعدوا على أي بنت في رحلة
البحث عن الفارس المتظر، أنواع لا منها رجا ولا فيها أمل، عابر سبيل
(ضال) كمان!
- بمعنى؟

- يعني عندك مثلا (السبب) .. النوع ده أقدر أوصفه بيانه (أنوع)
(معجباني)، ممكن يكون براسين وشكله مشلفط بس مسبب شوية
الشعر اللي نجيوا من الحادثة ولسبب ما - يجهله الناس ويعلمه الله - مقتنع
إن جاذبيته في سحر عينيه أو في الوجة اللي فوق حاجبه اليمين. النوع ده
أنا بانصح البنت تجري منه بسرعة .. إلا لو نفسها حلوة، ده موضوع ثاني!
- ومين كمان؟

- فيه كمان (كابتن مصر)! غالبا البنت بتقابلو وهو في نص العقد الرابع
من عمره .. حاجة كده ٣٦ سنة ومقتنع إن له مستقبل كبير في الرياضة ..
يعتبر الكورة كل حياته أو حلمه يشارك في كأس العالم في (الكروكيه).
مايشتغلش أي حاجة عشان خايف على طاقاته الرياضية.
طبعا النوع ده لو البنت ناوية تكمل، يبقى ربنا يدينا ويديها طولة العمر
وإنا لله وإنا إليه راجعون.
- والتالت؟

- التالت ده بقى أنا باسميه (روح أمه ياناس)! مش عارفة ليه بيفكرني
ب(بودي) ابن أبله فاهيتا .. هتلاقي ماما دايا لها بصمة في الموضوع ..
«ماعلش اتأخرت أصل ماما أصرت أتغدى قبل ما أتزل»، «ممكن
تلغي ميعاد النهارده؟ أصلهم جايبين مدرسة المشاغيبين وماما عاوزاني
أتفرج معاها»، «أمي بتقول الفستان متخنك وإنك محتاجة تحسي شوية».
والنوع الأبله فاهيتا ده لو عندها فراغ بيتقى لو اتجوزتي ابنها قابلي بقى

- أبوه، فرج بتاع فيلم (الكرونك)، شخصية متحرشة ٢٤ ساعة ٢ أيام في الأسبوع، ما يهدش، كل تعليقاته، كلامه، إنيهاته في اتجاه واحد. «على فكرة الحنة اللي فوق شفتك دي حلوة قوي»، «البنطلون اللي إنتي لابسه هيجتني» النوع ده مدمن تحرش مش فكرة جواز أو غيره.. هتلاقي عنده على الفيسوك ١٥٠ روسية في سن الأربعين وطالع، ده غير الأسماء اللي زي (المطلقة الحائرة) و(ساهرة الليل) أو (عذراء الشاعر)!

- ها... اللي بعده؟

- اللي بعده بقى اللي مالوش حل! ده نوع اسمه (يا ريتني قابلتك من زمان) وطبعاً باين من الاسم إنها هتقابلته متأخر.
- إزاي؟

- يعني بعد ما يكون اتجوز أو خلف لكن ده ما يمتعش إنه يفضل ورا البنت يحاول معاها تحت شعار: «إنه أول مره يحس الإحساس ده مع حد» وطبعاً هيحاول يبهرها بكل الطرق بدون هدف.. بدون منطق.. هو محشور في مرحلة (ياريته قابلها من زمان). طيب أوامر؟ خير ياباشنا؟ نساعدك إزاي؟ طبعاً اللي تقابل النوع ده تديله كلمتين في عضمه وتفترقه وبعدين تقطع معاه فوراً. ده خراب بيوت مش هزار!

- طيب وفيه نوع تامن؟

- طبعاً! نوع ممل، تنح، كلج، ساكت، صامت وقامط، مستح، مصدغ، ما ينطقش.. يجيب الضغط ويعلي السكر!
- ياساترا!

- وفيه النوع بتاع (أصل أنا متعقد من الجواز).

- هو ده نوع؟؟

- أيوه طبعاً.. أنا دايا أقورها كلمة، اتنين ما حدش بشق فيهم، اللي بيقول (أصل أنا متعقد من الجواز، كل صحابي بيتطلقوا) عشان ده نصب رسمي وخلال شهرين هيخطب بيريهان بنت خالته أو واحدة قابلها في (الجيم)، والتاني اللي يسيب البنت اللي معاه بحجة إن أهله جايبينله عروسة! آخر نوع بقى هو (حجاج عبد العظيم).

- المثل؟

النوع ده ممثل فعلاً، وده نوع مسلي جدا ودايما عنده حجة قوية يهرب
بها. ممكن يبقى هو والبنت بيخرجوا وكله تمام والمسكينة سهرانة الليالي يا
بنتي ومتعلقة به وهوب يحتفى ايا عم إنت فين؟ يا حاج؟ إنت عايش؟؟
بس دايما عنده حجة قوية: «ماقدرش أنزل معاكمي يوم السبت (أختي
بنولد)، (خالتي بتغسل)»!

- انتي كوميدية جدا على فكرة.. بس عميقة برضو.
- المهم إن كل النماذج والأمثلة اللي فاتت تندرج تحت مسمى (عابر
سبيل ضال)، ولا واحد فيهم بيكمل للنهاية، ولا واحد فيهم هو «بطل
الحدوتة».

- يااه.. خيلنا نرجع لليوم تاني، عملتي إيه مع كاميليا؟
- أبدا، قفلت معاها بعد ما خيلتها تحفظ النصايح صم ونمت. صحيت
تاني يوم والفكرة الوحيدة اللي مسيطرة عليا هي إني لسه ماوصلتش للقرار
المصري اللي هيغير حياتي كلها.
ويومها قررت أغير النشاط وأعمل اللي إيها طلبه مني بإني أبقى
«عبته».. لبست بنطلون باجي وتي شيرت عليه ميكي ماوس وسلمت على
ماما وبت راسها وخذت دعوة كل يوم:

«روحي يا بنتي ربنا يحب فيكي خلقه»
قفلت باب الشقة ورايا ونزلت من العمارة، ويومها استغربت عشان
مالقيتش إبراهيم. طلعت من الجراج في طريقي لشركة إيها. مشيت
أدقني في الوشوش.. أتفرج على كل واحد ماشي في دنيته.
وفي شارع الدقي، لقيت راجل كبير في السن لابس جلابية متواضعة
وبابن من هيئته وخوفه الشديد من العربيات إنه مش من القاهرة ومش
متعود على المولد اللي في الشوارع، ماسك إيد مراته وبيحاولوا يعدوا
الشارع في حرص شديد.. منظر مسكة أيديهم مالفتش انتباهي غير لما
عدوا الشارع بسلام وطلعوا على الرصيف ومع ذلك فضلوا ماسكين
أيدين بعض. مابيتكلموش، مجرد ماسكين أيدين بعض وماشيين في
سكتهم.. ماشيين في دنيتهم.
وصلت تحت الشركة عند إيها، ركنت وطلعت لقيته قاعد مع المونتير

بيشتغلوا: «قوليلي طيب.. المشهد كده أحلى ولا نبدأ بالمشهد في الواسع خالص وندخل (Zoom in) بالراحة لغاية الـ (frame) الضيق؟»
- أنا عاجبني زي ما هو كده عشان إيقاع المشهد يبقى سريع وما يقعش فاهمني؟

- أه تمام.. أنا حاسس إن المسلسل ده هينجح قوي.. مع إني بانحارب من كل الناس عشان أفضل.. انتي مش متخيلة.
بصيتله وابتسمت وقلته: «هو غاندي قال إيه.. مش قال: في البداية يتجاهلونك، ثم يسخرون منك، ثم يجاريونك..»
- ثم تنتصر.

- ثم يتمحكوا فيك ويقولوا إيهاب ده كان صاحبنا قبل ما يشتهر!
ضحك من قلبه وقال لي: «انتى أكثر بنت دمها خفيف قابلتها في حياتي! بالمناسبة، أنا سمعت إن البنات بتحب الراجل اللي عنده عروق في إيدته.. الكلام ده صحيح؟»

- يوووه!! هو كل شوية واحد هيطلع يقول: «أصل البنات بتحب الدقن»، «أصل البنات بتحب العروق»، «أصل البنات بتحب جفن العين المتفخ»، هو ما حدش قال لكم إن الست بتحب بـ«ودنها» قبل عينيه؟ ليه مش مصدقين إننا غيركم؟ إيه الصعب في كده؟
- يا واد إنت يا خبرة! مش باقول لك إنتى صاحبي الذكر. أنا فخور بيكي والله!

- وأنا فخورة بيك وبصداقتنا.. شكرا على وجودك في الدنيا يا إيهاب. نزلت من الشركة بعد ساعة ورجعت البيت، وعلى باب العمارة قرئت ورقة مكتوب عليها اسم الحاج أنور وآية قرآنية ذات معنى.
الخبر صدمني جدًا وافتكرت آخر مرة شفته واتفنت إن الوقت يرجع بيا وأسأل عليه أكثر أو أحسسه بوحدة أقل من اللي كان حاسس بيها.
الله يرحمك يا (عم أنور).

أنا مش من الشخصيات اللي بتستمتع بالأفراح وأعياد الميلاد لكن ما بافوتش عزا.. مش عشان واجب والكلام المحفوظ ده، أنا فعلاً باحب العزوات.

أعلى درجة من درجات الحب هي إن الناس تتجمع في مكان حبا في شخص وهو مش موجود في وسطهم، يسلموا على بعض ويحضنوا بعض جامد وبعدين يقعدوا ساكتين يسمعون كلام ربنا ويفتكروه.. إيه الجمال ده كله، العزا أشبهه بـ (حفلة الوداع) بس بشكل مختلف.. وداع مادي لشخص بقى ذكرى معنوية.. والشخص ده بيشفو فهم وبيفرح بيهم أصل الجسم مات لكن الروح عايشة وموجودة في وسطنا.. العزا مش بيشكل لي أزمة تماما عشان حقيقي جدا عكس المجاملات السخيفة والتجمعات المصطنعة.

وصلت العزا مع ماما اللي سلمت على الجيران وقعدت جنب طنط زي زي وبعد شوية سبتهم وطلعت أرد على التليفون.. خلصت المكالمة ولقيت عشان أرجع العزا لقيته واقف ورايا زي اللي مستنني أخلص: «أنا آسف! خضيتك؟؟»

- إبراهيم! ما علش ما عرفش إن فيه حد ورايا، إزيك؟
- ده فيه ناس كتيرة وراكي وجنبك، إنتي بس اللي مش واخدة بالك.
كتي تعرفي الحاج أنور كويس؟

- كنت باشوفه كل يوم وأنا نازلة. الله يرحمه..
بص بعيد وسكت شوية وقال لي: «الله يرحمه.. لسه زعلانة مني عشان بافقل على عربيتك؟»، قتلته: «لا أبدا ولا يهملك»

ابتسم وقال لي: «أكل العيش مر»، ابتسمت أنا كمان وقلته: «ما هو ما حدش يسهر ل 6 الصبح ويصحى الساعة 4 العصر وعاوز ياكل عيش..»

العيش بيتوزع الصبح في نور ربنا يا إبراهيم»
- نور ربنا باشوفه وأنا راجع كل يوم من النباطشية الصبح قبل ما أنام

وطبعا حضرتك بتصحيني ثاني الساعة 8 عشان أفتحلك السكة. عموما أنا آسف بس فعلا ما بالاقيش أماكن فاضية في الجراج وباقى مش شايف قدامي.

- نباطشية؟ انت ضابط؟

- تصدقي عيب لما تبقى ماما كل يوم عندكم بالساعات وماتعرفيش

باشغل إيه!

- يعني، ماجاتش فرصة أسألها وبعدين مانت بقالك يجي ١٠ مشين برا
مصر بتدرس.. ده أنا آخر مرة شفقتك كنت بشورت وحمالات!
- طيب وطالما عارفة إني كنت بادرس برا مصر، مش ده أدعى إنك
تخمني إني أكيد مش ضابط؟ مستوى الذكاء بعافية شوية؟
اتعرفت جدًا من أسلوبه وحسيت إنه بيتريق عليا فقلته: «قصده إن
أنا غبية؟»، قال لي: «لا ياستي ماقصدهش.. قصدي إني دكتور»
- ممم.. ربنا يوفقك يا د/ إبراهيم.. بس ابقى اركن بعيد واقفل على حد
تاني. أنا هادخل بقى.
- طيب ثانية واحدة بس.. ماما قالتلي إنك بتحبي مشروب اسمه زي
الدوا.

- دوا إيه؟ الـ(كراميل مكياتو)؟

- جايز. ماما طيبة وماتعرفش الحاجات بتاعة جيلنا دي.. طيب أنا
كنت عاوز أعرف لو ممكن يوم أعزم..
قلته: «زمان قهوتي بردت جوا.. هادخل بقى.. البقاء لله يا إبراهيم
وشد حيلك» لفيت ويسبته واقف لوحده، سمعته بيقول لي: «وانتي كمان.
شدي حيلك»

* * *

- (شدي حيلك) دي كان يقصد بها حالة الوفاة ولا بيقولها على طريقة
طنط زيزي والدته؟ عندي فضول أسمع رأيك فيه كمان لو ما يضايقيش.
- رأيي في مين؟ إبراهيم ابن طنط زي زي؟ إبراهيم كويس.. ماتقدرش
تقول عليه أي حاجة غير إنه كويس، دكتور، متعلم، بيحب شغله، شكله
كويس.

- وواضح إنه معجب بيكي.

- قصدك واضح إنه بيدور على (عروسة).

- تفرق؟

- تفرق كثير، وهتفهم بعدين. لكن دلوقتي خليني أكمل لك اللي

حصل بعد ما رجعت من العزا وفيه شريط ذكريات شغال في دماغى..

تكررت كل الناس التي كنت باحبهم وسابوا حياتنا ادي... (زي جدتي والدة
لونها...)

جدتي كانت بتحكي لي إن في الستينات والسبعينات كان عيب جدا إن
الست تبعت حد بجييلها الطلبات عكس اللي فهجناه من الأفلام، وإن حتى
الستات المدللين من سكان الزمالك والمعادي كانوا ينزلوا بالقسطن ينقوا
الحضار واللحمة ومافيش مانع تبقى معاها البنت اللي بتساعدنا في البيت.
لغاية آخر التسعينات كانت جدتي رافضة تماما تنساق ورا موضة
ال(ديبلغري) وعشان صحتها كانت على قدها وما بتقدرش تنزل لو حدها
كل يوم زي زمان، كانت بتحوش طلبات الأسبوع كله وتشتريها مرة
واحدة. وكان لها ناس معينة بتشتري منهم الطلبات زي عم (شندي) بناع
البطيخ. عم شندي راجل طيب له ملامح مصرية ووش يفكر بك بطيبة
(محمود رضا) وخفة دم (عبدالفتاح القصري). جدتي كانت عارفة عم
شندي كويس جدا، عارفة اسم أبوه وأمه ومراته وولاده الثلاثة. علاقة
عم شندي بجدتي بعد سنين ما بتقتش علاقة زبون ببيع لكن بقت عشرة
عمر وذكريات مشتركة وبقي كافي جدا إن أي زبون يقول إنه من طرف
الحاجة فاطمة عشان ياخذ بطيخة يخلف إن ما داق زيها في حياته.

جدتي اتوفت من ١٥ سنة وفي آخر سنة في حياتها صحتها كانت تعبت
جدا وكان لازم تعتمد أكثر على التليفون عشان تطلب ١٠ بيضات أو
علبة دوا. كانت دايا جدتي حرفيا بتطلع القطة الفاطمة في المتجات
اللي بتجيلنا لحد البيت. يعني البيض (ممشش)، البرتقان ما فيهوش (ربحة)
السكر، البطيخة (مليفة)، والدوا (مايجيش نتيجة).

العلاقة الإنسانية اللي كانت بين جدتي وعم شندي حاجة بقت نادرة
وقريت تنقرض. ما فتكرش إن حد فينا اهتم يعرف اسم الشخص اللي
جاييله الطلبات أو المكواة، ما فتكرش إنه اهتم حتى يمس في وشه وهو
بيديله الفلوس ويقول له شكرا، كتر خيرك - ده لو قالها -، بقينا عايشين
في كهوف جوا كهوف. كهف العربية والبيت، وكهف الأوضة جوا البيت،
وكهف الموبايلات اللي جواه كهف القيسوك والواتساب وغيره. كهوف
جوا كهوف جوا كهوف.

بقبنا في عصر الـ (ديليفرى)، حتى الحب والمشاعر بقت (ديليفرى).
 البنت مستنية فتى الأحلام يظهر من وسط الجموع ياخذها على
 حصانه ويغير حياتها كلها للأحسن، مش عاوزة تركز وتعرف هي عاوزة
 (إيه) قبل عاوزة (مين). والولد مستني البنت تاخذ الخطوة الأولى، ويعلمها
 تمسك فيه وتجه حب غير مشروط، تشوفه من جوا وترضى بعيوبه. كله
 عاوز العلاقة جاهزة، مستوية، سخنة، مغلفة، ويستلمها من شخص من
 غير ما يبص في وشه ولا يقول له «شكرا وكتر خيرك». مافيش مجهود،
 مافيش حاجة إنسانية، مافيش عم شندي.

رجعت أنا وماما من العزا وقلت لعم ناجح: «أستاذك تغسل العربية
 الصبح بدري قبل ما أنزل. خد المفتاح أهو». طلعتنا البيت وغيرت هدومي
 وعملت كباية شاي أخضر بالتناع وقعدت في السرير، فتحت الدفتر
 ومسكت القلم وكتبت:

الحقيقة رقم ٣

لازم نستمتع أكثر بالناس اللي حوالينا، نستمتع بوجودهم..
 ساعات ما بييقاش فيه مرة جاية.

وبعد شوية جاتلي المكالمة المعهودة: «استر يا اللي بتستر! دخلتي في عربية
 مين تاني يا مایسة؟»

- مادخلتش في عربيات.

- هي الساعة كام؟

- هتفرق في إيه.. انتي مش في أجازة؟؟ اصحى بقى واسمعيني.

- فيه إيه يا مایسة!

- فيه إن واجبك كصديقة تساعديني أختار واحد من الثلاثة.

- ثلاثة مين؟

- فيه قدامي دلوقتى ٣ شبان لو ركزت مع واحد فيهم واهتميت ممكن
 يتقلب عريس.

- يا بتي انتي مجنونة؟؟ هما ٣ شرابات ولا ٣ صنادل؟ أنا مش موافقة

على مبدأ (كتالوج العرسان) ده من أساسه.

- ماليش دعوة.. أنا قررت السنة دي ماتفوتش غير وأنا غخطوبة.
 - طب مانتي حلوة أهو وبتقرري وبتخططي، اختاري بقى!
 - لا مانتي لازم تفكري معايا ونقارن بينهم.
 - نقارن تاني!!! انتي سامعة نفسك؟ يعني إيه تقارني؟ ما هو يا بتحبي
 واحد فيهم يا مابتحبيش!
 - خديني على قد عقلي يا ستي.
 - طيب.. أمري لله.. هافكر معاكي.. قولي يا ست مايسة.
 - بصي.. أول واحد اسمه (سامح) عنده ٣٠ سنة وييلعب تا يكونندو.
 - أبوه أبوه.. حكييتلي عنه.. ده اللي شغال في شركة بترول وساكن في

المعادي.

- لا! الثاني (وليد).. سامح شغال مع باباه وساكن في الشيخ زايد.
 - أبوه صح اللي جابلك شريط عذاب القبر وإسدال عليه اسمك
 بالصيني باين.

- لا يا بستي!! ده (محمود مجدي) اللي شغال في فودافون.
 - ماعلش ماعلش أنا بس اتلخبطت.. هو مين اللي جه فعد معانا يوم
 سبتي ستارز؟

- سامح.

- ده اللي رحتي معاه فرح صاحبه؟

- لا، ده محمود مجدي.

- ساعة لما اتخانقتوا عشان الفستان اللي كتي لابساه صح؟

- لا ده وليد يا بستي.. يوم عيد ميلاد نانا.

- أبوه تمام.. أنا كده افتكرت.. مين بقى اللي غيرلك العجلة لما نامت؟

- يوم الدائري؟ ولا المحور؟ ولا على طريق السريس؟

- هي العجلة على طول نايمة ولا إيه؟ مش عارفة.. أي مرة فيهم.

- كلهم جم غيروا العجل قبل كده وكذا مرة.

- طيب مين اللي راح معاكي القسم لما عملتي الحادثة؟

- ساعة لما دخلت في مقطورة ولا لما كسرت للراجل المرابا؟

- سكتت شوية وكنت اتوترت فعلا وقتلتها: (أمم، مش متأكدة..

- مجدي جالي يوم المقطورة وسامح جالي يوم المراية.. ولاده كان وليد؟
ياربي؟ مش فاكرة.. فكّريني كده؟

- أشتمك ولا أقفل السكة في وشك بس؟

- طب أعمل إيه.. مش فاكرة! فكّرني معايا!

- مش محتاجة تفكير.. بصي يا مایسة يا حبيبي.. مافيش جواز ناجح

من غير حب والحب عموماً عامل زي حادثة العربية.. تبقي ماشية كده لا

بيكي ولا عليكى وتلاقى اللي نزل عليكى فجأة.. مش هتلتحقى تقاومي..

قدر بقى نصيب.. أيا كان المسمى.. لا محتاجة تختاري ولا هتلتحقى

تختاري. هتشوفي حد، عقلك وقلبك هيوافقوا عليه وهتحييه، هتبقرا

عاوزين تاخدوا علاقتكوا لمستوى أعلى وهكذا. عمرك شفتي واحد

مستي في وسط الشارع عشان عربية تخبطه؟ قابلتي حد بيفكر هيتخبط

من عربية كيا سيراتو نيتي ولا مرسيدس فضي؟ تعرفي حد ناوي يتخبط في

الزمالك مثلاً بدل مصر الجديدة؟

- لا طبعاً.

- عرفتي دلوقتي هتختاري ازاي؟

- أيوه!! هاحاول أفكر مين اللي جالي يوم حادثة العربية وأتجوزه!

- حسبي الله ونعم الوكيل!

* سيداتي وسادتي، تمر الطائرة الآن بين مطبات هوائية.. فيرجى من
حضراتكم الجلوس في مقاعدكم وربط أحزامتكم.. وشكراً*

- متأكد إنك مش عاوز حنة من الـ Chocolate Cake؟

- لا شكراً.

- حنة صغيرة؟

- لا تمام، باحاول أحافظ على وزني. جايز أنا عمري ما تحت قوي لكن

عندي هاجس إني لو مرحت هاتخن.. فباخد بالي. المهم كمليلي..

- صحيت تاني يوم بعد ليلة مش قد كده.. صليت وحمدت ربنا على

لنعم اللي موجودة وعلى الأحلام اللي لسه ماتحققتش. فتحت الدولاب

أشوف هاليس إيه. بصيت في المراية حسيت إني متغيرة. بصيت كده
ورجعت بصيت جامد وركزت، اترعبت! هو أنا تخنت؟ يا لهوي أنا
تخنت؟ يا جزني أنا تخنت؟ يا دهوتي أنا تخنت؟ يا فضيحتي أنا تخنت!
سحبت فستان إسود طويل من الدولاب ورجعت بظهوري بالراحة
وأنا مبرقة ومشيئة بؤبؤ عينا بأداء دراماتيكي مفتعل أشبه بأداء منة شلبي
في فيلم (ويجا) أما قطعيت شرايينها. المهم، سلمت على ماما وبُست رأسها
وخذت دعوة كل يوم:

«روحي يا بنتي رينا يجيب فيكي خلقه»

نزلت من البيت لقيت إبراهيم شايل شنطة هدايا وواقف لوحده قدام
باب العمارة وأول ما شافني جه ناحيتي وقال لي: «تهارك سعيد. امسكي،
افتحيها»، قلت له: «إيه ده؟»، قال لي: «هدية»

- بمناسبة إيه؟

- افتحي بس وهتعرفي.

- ده حزام تخسيس.

- وجايهولي ليه؟ انت شايف إني تخينة؟

- أنا توقعت إنه هيعجبك.. أصل أنا كل ما أسافر حد من صحابي

يقول لي هاتلي منه.

- مش هاقدر أقبله!

- لا هتاخديه!

- نعم؟

- قصدي.. أرجوكي تقبله، دي هدية واحنا جيران.

- طيب يا سيدي. شكرا.

- رايحة فين؟

- نعم؟

- مش اتبي أجازة من الشغل؟

- آه.. رايحة في حتة.. فيه مشكلة؟

- لا أبدا.. تحبي أوصلك؟

- لا أنا هاروح لوحدي.

شفقت بطني وأنا باركب العربية قدام إبراهيم.. لكن اللي زود الطين
 بلة وخلافي أتخشر في النص هو عم ناجح وهو ابنته في (تحضين) العربيات
 جنب الحيطه. دخلت العربية بطريقة (التدريك) وطلعت من الجراج من
 غير ما أبص ثاني ناحية إبراهيم. وصلت ستاريكس وطلبت (كراميل
 مكياتو) عليه كراميل زيادة ومعا كيكه جزر وقعدت آكلها في بؤس
 شديد. طلعت كتاب وقعدت أقرأ، ومن غير ما أقصد سمعت محادثة
 طريقة بين شلة شباب وبنات صغيرين، واحدة فيهم كانت بتقول بحماس
 «عارفين أنا نفسي في إيه؟ نفسي بخرعوا أكل في صورة (pills) كده». قامت
 صاحبها ردت عليها وقالتلها: «إيه ده يا منه!! حلوة قوي الفكرة دي!!
 بس ده يعني إيه بقى؟»، البنت الأولانية قالتلها: «يا بتي (Pills) كده..
 الأكل كله يبقى زي الأقراص كده يعني مثلاً Sushi pill وChocolate pill
 حاجات كده»

وهنا اتدخل واحد صاحبهم ورد بعنف: «(Pills) إيه منك ليها؟؟ انتوا
 مجانين؟»

- أيوه يا بني عشان أكل براحتي وما تخش!

- طيب ما انتي مش هستمتعي بالأكل؟

-... مش مهم.. المهم مانت تخش.

- طيب ما دام الاستمتاع مش مهم.. مانتاكلش وخلص؟

عدت لحظة صمت غريب زي ما يكون الولد ثبتهم بكلامه وبصراحة
 عنده حق. منطلق البنتين دول غير مفهوم بالنسبة لزميلهم لكن الصراع
 المستمر بين الأكل والسمنة وموضة اللبس اللي عمالة تصغر كل سنة كانت
 بالنسبالي حاجات مفهومة تماما.

- أنا لاحظت إنك موسوسة في موضوع السمنة ده؟ بالرغم إنني شايفك

بتاكلي اللي نفسك فيه لكن كل شوية تحكي لي عن لحظات كان عندك فيها
 هاجس إنك تخشي. هو إيه الحكاية؟

- دي حكاية طويلة قوي.. ماعتقدش إنك عاوز تسمعها.

- بالعكس، عاوز أسمعها. احكي لي.

- اسمع يا سيدي، بعد ما خلصت ثانوية عامة ودخلت الجامعة

كنت باأكل كل حاجة وكان وزني عادي جدا لو تفتكر. لكن من كام سنة مرت بظروف نفسية صعبة جدا أثرت على عاداتي الغذائية واكتشفت إني (Emotional eater) أو اللي بيسموه (الشرة العاطفي).

كنت حرقيا باطلع همي في الأكل. فتلاقي إن الشيبسي العائلي ده والنسبالي عبوة فردية والكومبو الكبيرة من ماكدونالدز تعتبر نص وجبة إني عمالة بانحن أكل أكثر وأكثر.. كنت كارهة نفسي وكارهة أكثر ضعفها.. فضل وزني يزيد وخلال ٣ شهور زاد حوالي ٣٠ كيلو.

عشت سنة كاملة بالوزن الجديد ده، كنت باعيط تقريبا كل يوم قبل ما أنام.. كنت مركزة في شغلي لكن ماكتتش باحب حد يركز معايا وبالذات باكل إيه. كان نفسي أبقي غير مرتية وبالرغم من إن ناس كثير كانت بتقول لي إن شكلي كويس إلا إن ثقتي بنفسني انعدمت وبقيت بابصر في المراية مش عارفة دي مين، لحد ماجاتلي لحظة وكان لازم أغير كل حاجة..

يمكن أنا دلوقتي خسيت بس لسه جوايا البنوتة اللي بتلبس 3XL. فيه بنات كثير جميلة من برا وأجمل كمان من جوا لكن مش شايفين ده، عايشين في الصراع النفسي بتاع السمنة ومحاولات التخسيس والامها المعنوية وخصوصا اللي مروا بالتجربة كذا مرة وفشلوا.. زهقوا أو ماكملوش.

بالنسبالي دي من أهم تجارب حياتي لأنها زودت معلوماتي في مجالات كثير زي التغذية والطب النفسي واضطرابات الطعام وغيره.. لو ماكتتش مرت بالتجربة دي ماكتتش عرفت أي حاجة عن الشيء الغامض اللي اسمه (السمنة)، السجن المعنوي ده.

التخين هو أكثر انسان فاهم تغذية على فكرة وبيقرا عنها أكثر من أي حد وبيتضايق قوي لما حد يعيش فيه دور الخبير الاستراتيجي ويبدأ تنظير والجمل اللي من نوعية «عارف انت حلك إيه؟ تعمل رياضة!»، لا يا شيخ!

قول والله؟ الرياضة بتخسس! أكثر حاجة كانت بتضايقني وأنا تخينة لما واحدة صاحبتني تمسك دراعي وهاتك يا تفعيص.. كلمات زي لظاليط بمشتقاتها: ملظظ، لظلظة، لظلوظ، بيلظ، لظاليطو.. باكرهم!!

التخين أكثر إنسان حساس في الوجود.. كنت باكره تعليقات الناس على أي حاجة أطلبها أو أشتريها، باكره جمل: «إيه ده متجيبني شوكلاتة؟»، «طلبتني مكرونة ليه؟»

التخين عارف إيه اللي بيتخن كويس وييقرا في التغذية والسعرات الحرارية أكثر مما تتخيل.

بعد ما وزني زاد جدا وبدأت أحس إني حرفيا (محبوسة) في الجسم ده، جسم مش عارفاه، غريب عني، لا باحبه ولا بيعجني لكن مضطربين نعيش مع بعض.. أو ده اللي كنت فأكره ساعتها.. كانت إرادتي ضعيفة وشايقة قدامي مشوار طويل ومتعب.

السمنة سجن نفسي مش أكثر.. السمنة عمرها ما كانت عائق إن الواحد يعيش حياته بالطول وبالعرض ويتشقلب ويتنطط.

لكن السجن النفسي عائق.. عدم حب الذات عائق.

المقارنة اللي بنعملها بين جسمنا وجسم غيرنا عائق.

الموضوع كله نسبي كمان.. جسمك اللي مش عاجبك ممكن يكون حلم لحد غيرك.. أرفع منك ونفسه يتخن أو أتخن منك بكثير وبيحلم بيقى زيك.. ماحدث عاجبه حاله.

يعني أيا كان وزنك، مش نهاية العالم والموضوع بسيط، أهم حاجة تكون راضي عنه.

- عندك حق، الرضا فعلا مهم جدا.

- عارف، ماكرهتش حاجة في حياتي وأنا تخينة قد (لغدي)، التخين دايا

فيه تفصيله معينة مش حاببها في جسمه، تفصيلة شاغلة باله دايا ومضايقه

وبيشوفها أوحش من كتر ما بيركز عليها. كل واحد فينا عنده حاجة مش

راضي عنها في نفسه.. جايز جسمه، وشه، نبرة صوته. كل واحد فينا

شايق عنده حاجة مش عاجباه شايق العالم من خلالها. يمكن لو كنت

حييت نفسي من أول المشوار كان الموضوع مختلف تماما.. كنت هاعمل

اللي أقدر عليه عشان أحس برضو، لكن عدد الليالي اللي نمت فيها معيطة

كان هيبقى أقل بكثير.

- المهم كملي، عملتي إيه بعد ما قعدت لو حدك تقري؟

- رجعت البيت، وأول ما وصلت لقيت عم ناجح قاعد مع بناته قدام

العمارة.
- حمد الله على السلامة يا ست الكل.

- الله يسلمك يا عم ناجح.

- تحبي أجييب لحضرتك حاجة م السوبرماركو؟
- لا شكراً.

- طيب أغسل لك العربية؟

- لا أكثر خيرك يا عم ناجح.

- ليه بس؟

- العربية نظيفة ما حقتش تت..

- أنا عارف إن حضرتك زعلانة مني عشان ركنت العربية في الحنة

(الضبيجة) امبارح وحضرتها جوي جنب الحيط.

- لا خالص أنا مش..

- أكيد ما عرفتيش تركبي العربية الصبح، صح؟

- لا عادي ع..

- والله وأنا باركنها (أم بوسي) جالتلي الأنسة مش هتعرف تركب،

جليلها مانا نزلت عادي أهو، جالتلي إيش چاب عودك انت لعود الأنسة..

- نعم؟

- آآآ.. جصدها إني رفيع.

-؟؟.....؟

- تُجصد يعني إن حضرتك أتخن شوية.. حاجة بسيطة يعني.

-؟؟؟.....؟

- هي تُجصد ان حضرتك رفيعة. لكن أنا بجي.. رفيع جوي.

-!.....!

- رُفيع جوي.. جوي.. خالص.

-!!.....!!

- آآ.. تحبي أجييب لحضرتك حاجة م السوبرماركو؟؟

كتمت غيظي، وطلعت البيت.. غيرت هدومي وعملت كباية شاي
أخضر بالنعناع وقعدت في السرير، فتحت الدفتر ومسكت القلم وكتبت:
الحقيقة،

الجمال جمال الروح.. والروح ماهاش وزن.. الجمال عمره ما كان
رقم.

وعلى الساعة ١٢ بالليل جالي التليفون طبعاً: «ألو.. إنتي صاحبة؟»
- لا يا مایسة أنا نایمة.

- أمال إزاي بتردي؟ وبعدين حد ينام الساعة ١٢ وهو في أجازة؟

- أدبكي قلتي يا مایسة! أجازة! أجازة من كل حاجة يعني نهذا شوية..

نهذا شوية!!

سكتت شوية وخذت نفس عميق سمعت صوته وقالت بصوت واثق

وجاد جداً: «أنا خدت قرار»

- استر ياللي بتستر.

- أنا خلاص هاركز مع (عمود مجدي) اللي حكيتلك عليه!

- لا يا شبيخة؟

- إيه؟

- أصلك كلمتيني قبل كده أساعدك تختاري بينه وبين اتنين تانيين..

تفتكري ده عادي؟

- أيوه ما أنا اخترت أهو..

- طيب..

قالتلي باستغراب: «خلاص كده؟»، قتلها «آه خلاص كده»

- مش هتزعقيلي؟ مش هتنصحيني؟

- لا يا مایسة.. اعلمي اللي انتي عايزاه.. أهم حاجة تكوني نفسك..

وتكوني مبسوفة لكن أنا عندي كلمتين عاوزاكي تسمعهم ونحاولي

تفهمهم.. أنا عندي إيمان قوي إن الواحد لو اتمنى حاجة بعينها، اتناها

بجد من قلبه واقتنع إنها بتاعته، القوى الكونية كلها هتتحد عشان تحققه

أمنية.. سميها الحفظ، القدر، القسمة، النصيب، سميها زي ما تسميها..
كل المطلوب إنك تكوني (محددة) جدًا وانتي بتمني الامنية.. أنا عاوزة
كذا.. وكذا ده لازم يكون حاجة بعينها عارفها وحافظها وعاوزها جدًا
جدًا، حاجة كده زي مسألة حياة أو موت.. يا دي يا بلاش.. لو عموده
هو اللي إنتي عايزاه، عايزاه بجد من قلبك وبعقلك، صدقيني لا انا ولا
غيري رأيهم هيفرق.. تصبحي على خير يا ميسوا
- ويعدين؟

- أبدا. قفلت مع مايسة وأنا ضميري مرتاح، ونمت.

- وإنني فعلا مؤمنة بالكلام اللي قلتيه لمايسة ده؟

- أنا عمري ما قلت حاجة أنا مش مقتنعة بيها.

- يعني إنني لما بتمني حاجة بتعاملي معاها على إنها مسألة حياة أو
موت لحد ما تحصل؟

- مش معنى إني مقتنعة بالمبدأ إني باعرف أعمله، دي أصعب حاجة في
الدنيا، فكرة (اليقين). ساعات كتير بتمني حاجات، فيه منها اللي بيتحقق
مناخر بعد ما نكون فقدنا اهتمامنا وإحساسنا بيه أو مايتحققش خالص
فبنعرف إن ماكانش فيه الخير لنا وفيه برضو أحلام بتتحقق بتفاصيلها
وسرعة. رأيي الشخصي، إن عدم اليقين واستسلامنا للإحباط واليأس
أثناء البحث والتدوير من أكثر الحاجات اللي بتأخر أحلامنا وتعتلها.

- عموما أتمالك حياة فيها أحلام بتتحقق بتفاصيلها، وتتحقق بسرعة.

- بالمناسبة، هتعملي إيه لما نوصل؟ عندك خطط؟

- أول حاجة هاعملها إني هاكلم أمي.. مش قادرة أتخيل حالتها إيه

دلوقتي.. هي بتقلق عليا قوي.

- تعرفي.. بالرغم انكم مش شبه بعض بس فيكي منها.. حركاتك،

وانتي بتكلمي، مش عارف.

- أيوه عارفة. دايبا لما حد يبشوفني مع ماما بيقول إننا مش شبه بعض

بس فينا حاجة. تعرف إني بحس إن أي حد بنحبه بنبقى مع الوقت شبيهه،

بنضحك....

فعلا. أنا بأحسن أي الذين مرتبطين وبيحبوا بعض ببقوا بعد فترة شبه
بعض وجايز كمان مع الوقت الفروق الشخصية اللي بينهم بتدوب ويقتري
عندهم نفس الاهتمامات والدوق. المهم إن انتي ومامتك روحكم واحدة.
- ماما دي توأم روحي، أقرب صاحبة ليا وكائمة أسراري الوحيدة.
فيه بينا لغة حوار مشتركة ما حدش يفهمها غيرنا. بتعرف تفاهم معانا
وتكلمني بالعقل والمنطق، بتناقش معانا على إني واحدة عاقلة ونافذة
من وأنا عندي ستين ثلاثة.

أنا فاكرة وأنا في خامسة ابتدائي أعجبت بطفل زميلي وكنت منبهرة
ببيه جدًا، كانت أول مرة أحس يعني إيه حد يُعجب بشخص من الجنس
الأخر.. رُحت وحكيت لأمي وقلتها «لما أكبر عاوزة أتجوز زميلي ده
يا أمي»، قالتلي «مش هينفع»، سألتها ليه قالتلي «عشان أصغر منك يا
حبيبتى» واقتنعت.

ولما كبرت شوية ودخلت تالته إعدادي أعجبت بزميل تاني لكن ماما
قالتلي «مش هينفع» المرة دي كمان، سألتها ليه قالتلي «عشان أقصر منك
بكتير قوي يا حبيبتى» وبصراحة كان عندها حق واقتنعت.

في ثانوي كنت قاعدة باذاكر طول الوقت ومش فاضية أركز مع حد
أساسًا.. وفي أولى جامعة أعجبت بشخص محترم جدًا لكن ماما قالتلي
كالمعتاد «مش هينفع» سألتها ليه قالتلي «عشان مافيش تكافؤ علمي وكل
شوية يسقط يا حبيبتى» وزى كل مرة اقتنعت.

في تانية جامعة أعجبت بشخص مختلف تمامًا، أطول مني وخريج نفس
الكلية اللي كنت فيها لكن ماما رفضت وقالتلي «مش هينفع» سألتها ليه
من باب العلم بالشيء مش أكثر قالتلي: «عشان أكبر منك بكتير قوي يا
حبيبتى» وأقنعتني.

في تالته جامعة قُلت أعمل محاولة فاشلة وأجرب لكن ماما قالتلي
«مش هينفع» كالعادة، سألتها ليه قالتلي «عشان هو مش شبهنا خالص يا
حبيبتى».. والمرة دي بقي اقتنعت.

في رابعة جامعة بقي كنت فقدت الأمل لكن بالصدفة أعجبت بواحد
ولما عرفت من ماما إنه مش هينفع - وده العادي يعني - سألت ليه قالتلي

اعشان النبي آدم ده من جوا مش زيك يا حبيبي، واقنعنتي جدا جدا.
بعد ما اتخرجت واشتغلت ورحت وجيت واحتكيت بالناس وبالدينا،
اكتشفت ان ماما في كل مرة كان رأيها هو الصبح.. واكتشفت ان الاختبارات
كانت اكثر بكثير قوي في خامسة ابتدائي!
اقول لك على حاجة وماتري قيش عليا؟
- احاول.

- تعرفي انك كتتي فتاة احلامي زمان؟ سكتي ليه؟ فاجتتك؟ انتي
فعلا كتتي فتاة احلامي.. بس ساعتها كنت نحجول قوي وماكانش عندي
الجراة اقول لك حاجة زي دي.. تعرفي اننا كنا بتراهن مين الولد اللي انتي
فتحيه؟ كان كل الناس واثقة انك هتخطبي بمجرد ما ندخل الجامعة
وتحوزي بعد التخرج على طول.
- للاسف خسرتم الرهان.
- ممكن اسالك سؤال؟
- اتفضل.

- كان ايه انطباعك عني اول مرة قابلتيني؟
- انت متخيل ايني هافتكر حاجة من سنين؟ انا لا سني ولا لياقتي
بسحولي بكده!

- شهد من فيلم (الطريق الى ايلات)؟
- كويس انك عارف!! وعموما انا فعلا مش فاكرة قوي انطباعي
الاول عنك كان ايه ولو فاكرة ماعتقدش انه مهم قوي لانه غالبا انطباع
كزته بعقلية اتغيرت مع السنين..

- طيب كملي، ايه اللي حصل بعد كده؟
- مافيش.. عدت ايام مافيه مش أي أحداث مثيرة ولا مهمة.. لحد يوم
خطوبة كاميليا وحسين..

يومها صحبت الصبح بدري من غير منبه، صليت وحمدت ربنا انه
الذي يوم جديد اعيشه، وأم زي ماما دي.. أبويا الله يرحمه كان دايبا يقول
لي: "لو كان عندي أم زي أمك دي، كنت خدت جايزة نوبل"

- فررتي هتلبسي ايه بالليل يا ماما؟

- هالبس الفستان الأزرق، وانتي؟

- مش عارفة يا ماما.. أي حاجة.
- يا بتي افردى رشك أنا مش عارفة إيه اللي بيخليكي ماتشتمعش في الأفراح والخطوبات.
- استمع إزاي؟ إذا كان العريس والحروسة نفسهم مايستمتعوش بيها، المعازيم متستع!

وصلت أنا وماما خطوبة حسين على كاميليا في فندق جميل في الزمالك، وصلنا تقريبا أول ناس عشان كالعادة مكتوب في الدعوة ٨ احتياطي عشان المعازيم تلم بعضها قبل ما العرسان يخلصوا (سوار). طبعا ماما زي القمر بدون ما تعمل أي مجهود وأنا عشان مازعلهاش لبت اللي على الحبل كله وجبت معايا (الحبل) احتياطي جايز أشتق نفسي ييه بعد ما أسمع السبعة وتسعين (عقبالك) والتمانية وخمسين (عاوزين نفرح) والعشرين (له ماقيش حاجة في السكة؟).

خدت نفس عميق وأنا داخلة القاعة وبافكر إن اللي هتقول لي: «مش هتفرح بيكي؟» هاقول لها: «ماتفرحي حد حاشك؟»، اللي هتقول لي: «شدي حيلك» هاقول لها: «الشدة على الله»، اللي هتقول لي: «عقبالك» هاقول لها: «خليكي في حالك»، اللي هتقول لي: «عقبال ما نشرب شرباتك»، هاقول لها: «عقبال ما نشرب قهوتك»!

مش هاكذب عليك، أنا باكره الأفراح المصرية بالمبالغة اللي فيها بالعادات والتقاليد المحفوظة بالـ(كليشيات) بقايمة الأغاني اللي لازم تكون فيها زي (دقوا المزهريلا)، (بسم الله الرحمن الرحيم وهنبدأ الليلة) بصوت فرقة حزينة معذبة بينظلونات بيضا وصديري أحمر أو دهبي لميع، (مبروك يا حياة قلبي مبروك) بصوت رامي عياش وطبعا (أسماء الله الحسنى) بصوت هشام عباس.

بالمناسبة، عمرك فكرت مين ممكن يكون أول واحد شغل أسماء الله الحسنى في الفرح وأقنع الناس إن ده الصح؟ طب كانوا بيعملوا إيه قبل ما هشام عباس يعيد توزيعها؟ كانوا بيشغلوها برضو بصوت (صباح فخري) ولا إيه؟ أنا باحبها جدا والموسيقى جميلة وأداء هشام مميز وكل حاجة لكن فقرة التسقيف اللي بتبدأ مع «اللهم صلي أفضل صلاة على

أسعد مخلوقاتك» فعلا مزعجة وبتفقد الأغنية معانيها!! يعني لو مثلا
بنسمع الغنوة دي بوقار في أول الفرحة كنوع من البركة إننا نبدأ حدث زي
كده بأسماء رينا كنت هاقول ماشي، لكن نشغلها والسات تقف ترقص
لا!!!

ده طبعا غير فقرة التوراة السبعين دور والراجل الرخم اللي بيدي
العريس حته بأكلها للعروسة، وبعدين يدي العروسة حته تأكلها للعريس،
وبعدين يمسلهم حته ويصلهم بصة خبيثة بأداء مبالغ فيه وهما يتكسفا
والعريس يشاورله ويقول له: «لا دي خطوبة بس» قال يعني الراجل مش
عارف!

ومش عايزين طبعا ننسى مجهودات عمو المصور اللي اتطور مع الوقت
ويبقى اسمه (فوتوجرافر) ولو قلت عليه مصور يبقى عيب قوي. أغرب
لحظة لما تبقى قاعد في فرح لا بيك ولا عليك وتلاقي كاميرا الفيديو معدية
بتصور الناس على التراييزات عشان الكل يمضي حضور، ومن غير سابق
إنذار تلاقي اللي ضارب الكشاف في عينيك وإنت بتقرب العصير أو
بترقص في دبوس فرحة أو بتزلط حته جاتوه فتلاقي نفسك - لا إراديا -
بببت التهمة اللي في إيدك وبصيت للكاميرا وعلى وشك ابتسامة بلهاء
وبعدها تبص على (الشاشة) بسرعة قوي جايز تلحق تشوف نفسك
فينتهي الأمر إن عمو المصور واقف يصور قفاك!

خلصت فقرة الشبكة، وبدأ حسين وكاميليا يرقصوا وحواليهم
صحابنا.. وقتت معاهم شوية ورجعت قعدت على التراييزة مع مايسة اللي
مصرة تحكي لي حاجات مش مهمة خالص وتزعق جوا ودني عشان أسمعها
في الدوشة دي. بصيت على الناس اللي بترقص لمحت حته Cheesecake
بترقص في وسطهم! مش تشيز كيك بترقص بالمعنى الحرفي لأن ده كان
هييتي منظر مرعب جدا بصراحة، لكن شفت (كريم سامي)، وكريم هو
مثال حي لشخصية فارس الأحلام اللي بيطلع في كرتون ديزني.

* * *

- مين كريم سامي ده؟
 - كريم ده حكايته حكاية. أنا وكريم كنا بنشتغل في شركة واحدة من حوالي ٣ سنين لكن كل واحد كان في فرع. كريم أيامها ماكانش بالوسامة دي الحقيقة لكن بعد ما ربي دقته شكله اتغير خالص، أصل اللدقن دي سلاح ذو حدين، فيه ناس تحليها وناس بتقلب معاها Look اكتاب وتقول. فضلت متنحة لحد ما مايسة حسست إني مش سامعة ومش مركزة معاها أصلا..

- مين اللي بتبصي عليه ده؟

- (هح).. ده كريم.

- (هح) ده كريم مين؟

- هستظرفي يا مايسة؟

- مش شايفة نفسك!

- كريم اللي كان معايا في الشركة القديمة.

- طب وإيه ما تقومي تسلمي عليه.

- لأ طبعا!

- هو أنا باقول لك كعبلية في الأرض وهو ماشي؟ أنا باقول لك قومي

سلمي طالما (هح) وكده.

- مش هينفع أقوم وأسيب ماما قاعدة لوحدها يا مايسة.

- أنا قاعدة معاها ياختي!

اتوترت جدا من زنها اللي مالوش داعي ويصيتها وقلتها:

- مايسة! انتي عايزاني أقوم ليه؟ عشان أقول له «هاي كريم. فاكرني؟»

فيقول لي «طبعا فاكرك»، ونتكلم ونضحك ويقول لي «هي نمرتك زي

ما هي؟ طب هابقي أكلمك»، ويخلص الفرح ويكلمني بعدها بكام يوم

ونتقابل ونتكلم وننزل تاني وعاشر وفي الآخر نسيب بعض!

- إيه التشاؤم ده؟

- مش تشاؤم دي الحقيقة.. مايسة يا حبيبتني، القاعدة هي إن العلاقات

بتفشل.. إنتي دخلتي كام علاقة؟

- مم.. أنا التخطبت مرتين وارتبطت مرة وماكملتش.

ببقي ٣ مرات فشل قصاد المرة اللي هتنجح، وده على افتراض إن
النجاة هي الأخيرة اللي هتنجح. يعني ٢٥٪ نجاح إذا ده الاستثناء والقاعدة
هي الفشل!
ولأول مرة يبجي في وقته عشان ينقذني من زن مايسة.. «Hello Ladies»

- أهلا إزيك يا محمود؟ عاش من شافك.. إيه الأخبار؟
- Good Good، إنتي عاملة إيه في الأجازة؟

- تمام.. كله تمام.

- تحبي ترقصي؟

- أحب طبعا بس أنا تعبانة شوية.. مايسة ممكن ترقص معاك.. صح

يا مايسة؟

- إيه؟ لا!!

- Come Come، قومي يلا يا مايسة!!

تخلصت من زن مايسة واختصرت العشر دقائق اللي كنت هاركز فيهم
عشان أسمع محمود في وسط الدوشة. خدت ماما وسلمنا على كاميليا
وحسين واتصورنا صورة الكوشة المعتادة ومشينا عشان ناخذ الأسانسير..
ونبل ما الأسانسير يوصل، وصل كريم:

- مش ممكن!! ده إنتي بجد؟

- أبوه ده أنا.. يا كريم.. إزيك؟ أعرفك بوالدتي.. كريم كان زميلي في

الشركة القديمة يا أمي.

- أهلا إزيك يا كريم؟

بصر كريم لأمي بانبهار وقال لها بود شديد:

- إزي حضرتك يا طنط؟ مش عارف أقول لك طنط إزاي بس..

ماشاء الله، شكلك صغير جدا وزني القمير.

ردت عليه ماما بأداء فيه الأطة بكيزة الدرمل «Merci.. ده من ذوقك»

ابتسملها وبصلي وقال: «إنتوا ماشيين بدري كده ليه؟»

حاولت أفكر في أي حجة أقولها لكن مخي زي ما يكون اتشل وماعرفتش

أرد.. بصيتله وبصبت لأمي اللي أنقذتني وردت عليه «أصلي سقعت!»

ابنسم كريم وقال لي: «أنا شايفك من بدري وعمال أقول هي ولا مش هي. نخيتي قوي، بقيتي قمر!»
 ماما ماستتوش يكمل الجملة وقالتله بكل إعجاب وفخر بيا: «فرصة سعيدة يا ابني!»

- الأسانسير جه يا ماما.. بعد إذتك يا كريم.

- استني بس!! هو رقمك لسه زي ما..

لكن الحمد لله اتقفل باب الأسانسير قبل ما أسمع بقية السؤال اللي كنت متوقعا ومش عاوزة أسمع.

روح البيت وكل اللي في دماغي هو الجزء اللي ما قدرتش أحكيه لمايسة من قصة كريم لكن ماما هي اللي عارفاه كويس..
 - إيه حكاية كريم بقي؟

- الحكاية ابتدت لما شفتنا بعض في تدريب كان معمول للموظفين في الفرع الرئيسي أيام ما كنا شغالين في نفس الشركة. أنا وكريم كان فيه بيننا (كيميا) كل الناس كانوا ملاحظينها. كنا بنسأل نفس الأسئلة وبنقول نفس الكلام في نفس الوقت. زاد اهتمامه بيا وكان بيكلمني تقريبا كل يوم، نتكلم شوية في الشغل وشوية في أي حاجة غير الشغل وخلال كام شهر كنت اتعلقت بكريم وبقيت بافكر فيه كثير.

في يوم كلمني يعزمني على عيد ميلاد بنت أخته ودي كانت هتبقى أول مرة أشوف كريم برا الشركة. يومها قفلت معاه وطلعت على الميزان.. بصبت في المراية وقعدت أعيط بحرقه. كان قدامي ٦ أيام لغاية عيد الميلاد، جربت كل الهدوم اللي عندي، ما حبيتش حاجة وعرفت إني لازم أحس عشان يبقى شكلي حلو. بس أنا قدامي ٦ أيام هاخس إزاي؟

وبعد كام ساعة قررت إني مش هاخس ومش هاعمل أي حاجة! أنا جميلة كده، أنا حلوة كده، وزى ما أنا مايفرقش معايا غير شخصيته أكيد هو هيعجب بشخصيتي.

وبعد ٦ أيام لبست جينز بسيط وبلوزة بيضا وشال بني ورحت عيد الميلاد، قضيت ساعتين أو ثلاثة باتفرج على كريم وهو بيبيض على كل البنات اللي في المكان ما عدا.. بنت واحدة بس.

- بينهالي إنك واثقة في نفسك جدا، مش مصدق إن اللي قدامي دي
هي البنت اللي شخص هز ثقتها بنفسها لمجرد إنها ما عجبتهوش.
- مش فكرة شخص.. فكرة إحساس بالنفس.. فكرة نصارة سودا
اسمها (الوزن)، لابسينها وبنشوف من خلالها الدنيا. البنت التخينة
جواها بنت تانية رفيعة ضاحكة عليها ومفهاها إن عمرها ما هتبقى جميلة
غير لو خست.

- جميلة.. جميلة إنتي..

- يا سيدي من ذوقك.

- أنا مش باهزر.. الحكاية كلها في المنظور. أي واحد ممكن يلاقي فيكي
على الأقل حاجة واحدة تعجبه ويحبها مش عشان ملكة جمال الكون لكن
عشان ربنا اداكي حاجات صغيرة كتير حلوة بتخلي مستحيل ما يجبكيش
أجدع راجل في الدنيا.

- متشكرة جدا.. مجاملة لطيفة ق..

- عايز جدعنة هيلاقى، عايز طفلة مجنونة وشقية هيلاقى، عاوز بنت
واعية وراسية ونحها يوزن بلد هيلاقى برضو.

- اااا.. أنا مش..

- عارفة إيه اللي عاجبني جدا كمان؟ طنط.. واقفة في شهرك
ومصاحبكي.

- أمي دي دنيتي كلها.. ماما هي صديقتي الوحيدة.. أمي هي أكثر
كائن عاش معايا. ماما عاشت معايا أكثر ما أنا شخصيا عشت معايا، فيه
دايا ٩ شهور فرق. ساعات كتير باحس إن ماما بتعيش حياتها من أول
وجديد فيا وعشان كده عاوزاني دايا ال(بريمو) في كل حاجة.

- أنا كمان.. ماما هي الأمل في حياتي.. وأبويا الأمان.. وأخواني
الستيل.

- ربنا بخليك.. ويخليهم.

- أظن يومك خلص على كده؟ مش فاضل غير مكاملة مايسة.
- تقريبا خلص. بالرغم من موقف كريم ودمي اللي اتحرق لكن طول
الخطيرة كنت فرحانة.. كنت شايفة كاميليا من بعيد وحاسة إن (بنتي)

كبرت ويستجوز.. المهتم رجعت البيت، غيرت هدومي وعملت كباية شاي
أنحضر بالنعناع وقعدت في السرير، فتحت الدفتر ومسكت القلم وكتبت:
الحقيقة رقم ٥

ما ينفعش تدور على شخص تحبه وانت لسه مش عارف تحب
الشخص اللي إنت شايفه في المرآة.

وبعد شوية جالي تليفون وطبعاً افكرت زيك إنه من مائة لكن
ماكانش منها: «أنا قلت إنتي لسه في الخطوبة يا سميحة»
- لا روح بعد مائتي مشيتي بشوية.. عندك إيه بكرة؟
- ما عنديش.. عاوزة نتقابل؟
- ماشي.. نفس المكان.

صحيت تاني يوم بدري بسبب صداع نصفي رهيب في راسي.. الواحد
كبر وما بقاش بيحب السهر والدوشة زي زمان. ضربت تفاحة وشربت
كباية لبن وليست، سلمت على ماما ويُست راسها وخذت دعوة كل يوم:
«روحي يا بنتي رينا يجيب فيكي خلقه»

نزلت جري عشان ماتأخرش على سميحة وفي الجراح كان واقف
مستي زي كل يوم لسبب أنا مش عارفاه: «على فين على الصبح؟
ما بتقعديش في البيت إنتي خالص»
- نعم؟

- مشاوير برضو؟

- لا.. رايحة أقابل واحدة صاحبتني.

- في ستاريكس؟

- في ستاريكس آه!! فيه مشكلة يا إبراهيم؟

- لا أبدا.. أنا بس..

- إيه التركيز ده؟ وإيه الأسئلة دي؟ فيه إيه؟؟ صباح الخير!!

سبته ومشيت وتوجهت لستاريكس. وصلت قبل سميحة اللي كلمتني

وقالتلي إنها هتأخر شوية عشان المحور زحمة. دخلت، وكان إسلام

الباريسا صديقتي أجازة وفيه بداله (سلمى). خدت منها المكياتو وقعدت
 لهن ما قعد فين، لقيت كل اللي قاعدين بنات.. جوا وبروا كله بنات.
 سرحت شوية وتخيلت لو صحينا في يوم لقينا الرجالة اختفت. نوع كامل
 من الجنس البشري اتبخر، ندور في سلقط في ملقط، بيخ راح خلاص!
 وسرحت أكثر بخيالي وتوقعت إن أول يوم هتصينا حالة من الصدمة
 واللعول والدهولة والدروخة وتاني يوم شبكات الموبايل كلها هتقع
 عشان كلنا هنكلم بعض في نفس الوقت و (conference calls) و (video
 conferences) ده غير (Skype) و (viber) ومش بعيد توقع المصرية
 للاتصالات وسترال الماظة!!

نالت يوم أتخيل إننا هننزل كلنا نقابل بعض.. كله ملط طبعا أو
 بالبكيني ما هو ما فيش متحرشين ولا ضابط ولا رباط. رابع يوم خطط
 استراتيجية لمواجهة نقص العمالة في الوظائف اللي كان مسيطر عليها
 الرجالة: (مطلوب ضابطة مباحث)، (مطلوب عسكرية مرور)، (مطلوب
 سائقة منطورة)، (مطلوب سائقة تاكسي).
 - ده خيال علمي؟

- لا ده فيلم رعب. أعتقد مش هيبقى فيه أي حاجة في العالم في أقل من
 أسبوع.. مش عشان مش هنقدر لكن عشان هنترهق..
 - ريتا خلقنا اتنين مختلفين جدا عشان نكمل بعض جدا.

- أكيد. المهم، وصلت سميحة وفوقتي من الفيلم اللي كنت فيه،
 نعدت جنبتي ومن غير ما تشرب حاجة بدأت تحكي لي.. سميحة جميلة
 وجدعة ومحترمة ومتعلمة أحسن تعليم لكن موكوسة زي كل المراكيس
 اللي الدنيا مرمطتهم كثير في رحلة البحث عن الفارس المنتظر والمجتمع
 يشاور عقله يديها اللقب إياه أبو أربع حروف ولا يستنى شوية.

- عارفة أنا كانت إيه مشكلتي معاه؟ مشكلتي كانت إني ماليش أي
 طلبات.. يعني مش عاوزة أي حاجة من الإنسان اللي بارتبط بيه غير إنه
 يجني ويهتم بيا، لا عاوزة حفلة خطوبة ولا مهر ولا فرح حتى.. مش
 عاوزة حاجة غير بس يقول لي ازيك واحشاني.. نخرج مرة كل أسبوعين..
 كل شهر حتى.. هو أنا كده طالبة كثير؟

في اللحظة دي قلبي وجعني. مش بس عشان كلامها اللي بيعكس نظرتها السلبية لنفسها.. وإن غالبا النوع ده من التفكير بيعكس قلة ثقة في النفس أو إنها ماتساهلش وجايز تكون راضية بعجد وقنوعة فعلا.. لكن قلبي وجعني عشان افنكرت قصة واحد زميلي.. كان معايا في شغل قديم وكان بيحكيلي على حبيته - اللي دلوقتي بقت مراته - وقد إيه كانت (قائمة) وسطه حرفيا لدرجة إنه كان بيديها مصروف شهري في إيديها ويجييلها لبس صيف وشتا وعيدين وكان ساعتها له عاطل وبيأخذ مصروفه.. كان يزق منها مهيا يزق ويقول لي خلاص هاسيها ومايقدرش وأهم كملوا.. أهم كملوا..

- القصتين عكس بعض.

- والتقيضين وجع قلب وبعطن بصراحة. الدم ضرب في دماغي ولقيت نفسي بارد عليها بصوت عالي وياقول: «لا مش كثير يا مسيحة.. مش كثير خالص!»

- هو أنا ماتساهلش؟

- تتاهل يا مسيحة.. تتاهل الدنيا كلها.

حاولت أغير الموضوع وأرغي معاها في أي كلام فارغ وأعيد لها (إيهات) الأفلام اللي ضحكنا عليها ١٠٠ مرة لحد ماراقت وهديت خالص. سلمت عليها وسبتها ومشيت وأنا لسه بافكر في كلامها.. «هو أنا كده طالبة كثير؟»...

لو طلبت حد يصلي بحب.. هو أنا كده طالبة كثير؟

لو طلبت مكالمة تليفون من اللي فيها «أنا بس باتظمن عليك» ومافيهاش خالص «ياقول لك إيه كنت عاوزك في حاجة» هو أنا كده طالبة كثير؟

لو طلبت واحد يشوف عقلي قبل شكلي ويجبني عشان جوا قبل برا.. هو أنا كده طالبة كثير؟

لو طلبت أسمع وحشتيني قوي وبحبك.. «هو أنا كده طالبة كثير؟» وصلت الشركة عند إيهاب حوالي الساعة ٦ وكان مستمتع جدا وهو بيفرجني على المشاهد اللي خلصت: «يعني كده كثير ولا تمام؟» - إيه؟؟

- المزيكا اللي مترتبة على المشهد.. أشيلها في المونتاج ولا حلوة؟
 - لا حلوة يا إيهاب.. حلوة خليها، أو أقول لك شيلها أحسن.
 - انتي مش مركزة معايا على فكرة.
 - باقول لك إيه.. أنا عاوزة أروح حفلة ع..
 - باقول لك إيه انتي.. ممكن تبعتي للمنتج والمؤلف وتأجلي الاجتماع
 بتاع بكرة.. أنا غالبا مش جاي الشركة، وانتي كمان ماتجيش لو عاوزة.
 - لا أنا كنت هاجي عادي.. عموما هابعملهم يا إيهاب حاضر.
 رجعت البيت الساعة ٩، غيرت هدومي وعملت كباية شاي أخضر
 بالنعناع، مسكت الدفتر وكتبت:

الحقيقة رقم ٦

مافيش حد مانفسوش في الحب، بس فيه حد اتمود يستغنى..

ويعد شوية صغيرين، جالي تليفون مفاجئ.. مفاجئ جدا: «آلو مين؟»
 - مسحتي نمروني ولا إيه؟
 - مين معايا؟ انت كريم؟؟ كريم سامي؟؟
 - عاملة إيه؟
 - إيه اللي فكرت بيا؟
 - باسأل عليك، مش إحنا صحاب وكنا زمايل قبل كده ولا إيه؟
 - آه طبعا، أنا بس استغربت إنك بتكلمني.. احنا آخر مرة اتقابلنا كان
 في عيد ميلاد صوفي بنت ليلي.
 - واتقابلنا في الخطوبة امبارح، وكان شكلك زي القمر..
 - عاوز إيه يا كريم؟
 - إيه الوش ده؟ قلتك باسأل عليك.
 - أنا كويسة. عاوز إيه بقى؟
 - مش عاوز حاجة.. هو انتي ارتبطني، مخطوبة؟
 - لا..
 - طيب، أنا كنت عاوز أتكلم معاكي خمس دقائق، أنا جابز كنت تايه

ومش مركز وما عرفش إنتي شايفاني إزاي دلوقتي بس أنا اتغيرت وأعتقد
عقلت ونظرتي للدنيا ولكل حاجة اتغيرت. الكلام مش هينفع في التليفون،
خلينا نتقابل أحسن وتكلم. ليكي في القهوة؟
- مش عارفة يا كريم، أصلي مش فاضية خالص.
- بتحبي تقعدني فين طيب؟
- بأقول لك مش.. فاضية.
- طيب، لو في أي يوم فضيتي ولو ساعة واحدة بس كلميني أجيلك في
الحنة اللي إنتي فيها. أهم حاجة إني اتظمنت عليك. سلام.

- وشك اتغير خالص وانت بتحككي؟
- افكرت كريم والفترة اللي كان موجود فيها.. افكرت إحساس
البنات التخينة اللي طول الوقت حاسة إنها مش كفاية وإن لازم تبقى أحسن
عشان الولد اللي هي بتحبه يشوفها.. بيبقى كل حلمها إنه (يشوفها) بس،
يشوفها زي ما هي مش أكثر.
- ضابقتك؟

- حسني إني قليلة، وأنا مستحيل أحب واحد حسني بمشاعر
سلبية تجاه نفسي. عارف، فيه نوعين من العلاقات القائلة السامة..
- اللي هما إيه بقي؟

النوع الأول لما بتحس إن إنت الطرف الأقوى، وساعتها بيبقى شفقة
مش حب.. والنوع الثاني لما بتحس إن إنت الطرف الأضعف، وساعتها
بيبقى ابتزاز.. بتبقى علاقة قايمة على (الاستنزاف).
- استنزاف المشاعر؟

- استنزاف المشاعر والوقت والتفكير والمجهود وكل حاجة.. استنزاف
الروح.. الحب عامل زي الأرض.. اللي بيحب شخص غير مناسب عامل
زي اللي كل يوم بيرمي ميا على شوية رمل.. لا عمره هيشوف زرعة ولا
الأرض هتطرح ورد.. أما اللي بيحب شخص مناسب، بيحبه برضو
في نفس الوقت وبنفس القوة عامل زي اللي بيسقي أرض بكر.. أرض

خصية، بشوية مجهود صغيرين تبقى جنينة جميلة ومبهجة. بغض النظر

عن التشبيه يعني بس فاهم حاجة؟

- فاهم جدا.. وإيه اللي حصل ثاني يوم؟

- ثاني يوم بقي صحيت الصبح من غير منبه، كلمت إيهاب، حكيتله

عل موضوع كريم واديتيه كلمتين في عضمه فحواهم إن واجبه كصديق

يقف جنبى أكثر من كده وإن علاقتنا مش شغل بس.. اتفقنا هتقابل في

ستاريكس بعد ساعة. لبست جينز وقي شيرت، سلمت على ماما وبُست

راسها وخذت دعوة كل يوم:

«روحى يا بنتى ربنا يحب فيكى خلقه»

وصلت ستاريكس في ميعادي.. طلبت مكياتو وشربته كله وإيهاب

لسه ماوصلش. قمت أغسل إيدي وفي الحمام كان فيه بتتين واقفين

يتكلموا وأنا ماكانش قصدي أتجسس عليهم لكن صوتهم كان أعلى من

إي ماسمعوش. واحدة منهم كانت بتعيط والتانية بتحاول تهديها. البنت

اللي بتعيط قالت لصاحببتها: «أنا مش صعبان عليا إلا العيش والملح، ده

يقول لي أنا مريض نفسيًا لا أنفعك ولا أنفع غيرك. المشكلة مش فيكى،

المشكلة نيا».

خرجت من الحمام قبل ما يجيلي جلطة وماحدث هينفعني ساعتها لكن

السؤال هنا بقى.. هو لسه فيه بنات بتاكل من الكلمتين دول؟

والسؤال الأهم.. هو لسه فيه ولاد (بتخلع) بالطريقة الكلاسيكية

دي؟ بلدي قوي يا حسين!

- «حسين».. فيلم إشاعة حب؟

- مش قلتك ثقافتك السينمائية ممتازة! المهم، وصل إيهاب بعد ما كنت

شربت ٢ مكياتو بعد المكياتو الأولاني وخلصت نص الرواية اللي كنت

باقراها.. طلب فرابنشينو وولع سيجارة وسمع الحكاية وسألني: «رخمتي

على الواد ليه بقى يا لمضة؟ طيب ما تديله فرصة وتسمعيه.. ده حتى

(كريم) اسم عاطفي وستيمتال وتحسي إنه عاوز ياخذ بوكس في وشه».

- لا يا سيدي.. أنا لا عاوزة أديله فرصة ولا أسمعه.

- مش عاوزة تديله فرصة.. ولا بتحبي حد ثاني؟

- انت اللي بتسال السؤال ده يا إيهاب؟؟ ما انت عارف إني مابحبش حد.

- اللي يسمع نصايحك لأصحابك يقول البنت عايشة ١٠٠ قصة حب في وقت واحد.

- مش كل اللي بيضحك مبسوط ومش كل اللي عنده حكايات عاشها.. معظم الوقت بنضحك عشان مانتألش مالنا، معظم الوقت بنضحك عشان بنخاف نزهق اللي حوالينا من الوش الحزين، معظم الوقت بنستهل الضحكة عن الدموع، معظم الوقت بنتصعب نشكوي ونقول اللي جواتنا.

- أستاذة (عبلة كامل).. إيه الحزن ده كله؟ ها عيط!

- بافضفض يا أخي!

- سيبك انتي.. إيه القمر ده كله؟ طب والله (كريم) عنده حق!

- متشكرين يا سي إيهاب.

- وما سألكيش خسيتي إزاي؟

- لا..

- هممم.. هو انتي أصلا خسيتي إزاي؟

- عملت دايت.

- لا بجد.. خسيتي إزاي؟

- أيوه.. عملت دايت.

- قولي بس قولي.. خسيتي إزاي؟

- دايت!

- مش هتقوليلي طيب خسيتي إزاي؟

- معاكي للصبح.. ها.. خسيتي إزاي بقي؟

- هممم.. ما فيش.. قعدت ٦ شهور باكل لحم بني آدمين بس، طعمهم

لذيذ والسعرات الحرارية اللي فيهم قليلة. إيه ده أنا جعانة!

- وأنا افتكرت مشوارين مهمين كنت ناسيهم!!!!

طبعا أنا سمعت جملة دي مع نظرة الرعب اللي اترسمت على وشه وفضلت أضحك بصوت عالي: «ما فيش راجل في الدنيا بيعرف يضحكني من قلبي غيرك يا إيهاب»

- من شكر يا ستي . هتعملي إيه دلوقتي ؟
 - هارجع البيت
 - طيب ضر ري جدا تكلميني لما توصلي .
 - نعم ؟ إيه جو حب ثانوية عامة ده ؟ شوية شوية هتقول لي الا إله إلا الله وانت ماشي .
 - بطل لماضة أبوس إيدك ! ممكن تكلميني أول ما توصلي وانتي ساكتة ؟
 - أكلمك وأنا ساكتة ازاي ؟
 - آه هتقلني ! ! طب أنا ماشي !
 - خلاص خلاص .. حاضر حاضر هاكلمك .
 سلمت على إيهاب وخذت بعضي ورجعت البيت . ركنت العربية
 رقبل ما أطلع الشقة مسكت الموبايل وكلمت إيهاب اللي رد بعد أول رنة ..
 - وصلتي ؟
 - آه وصلت .
 - طب أستاذة (عبلة كامل) ، أنا كنت ماشي وراكي ودلوقتي داخل
 عل شارع بيتكم أهو .. اطلعي بسرعة نطيلك في فستان ولا عفريت أزرق
 من حاجات البنات دي وانزلي .. إنتي معزومة على حفلة في الأوبرا هتبدأ
 بعد نص ساعة .
 - الأوبرا ؟
 - هتمثلي ؟ مانتى اللي قلتي نفسك تروحي حفلة ! بلا اطلعي .. إنتي
 لسه ما طلعتيش ؟

* * *

* حضرات السادة الركاب ، لسلامتكم يرجى العلم أن .. *

- وحضرتوا حفلة إيه ؟

- عمر خيرت .

- حفلة لعمر خيرت في الأوبرا هي الاختيار الأمثل لأي ولد عاوز
 يسط أي بنت .

- بسبة كبيرة أه، بس إيهاب كان عارف إني عاوزة أروح الحفلة دي بالذات وفي التوقيت ده. إيهاب بيركز في تفاصيلي، إيهاب فاكر حاجات عني أنا نفسي مش فاكرها.

- أنا باحد إيهاب عل مكائه عندك. اتبسطي في الحفلة؟
- جدا وبعد ما خلصت وخرجنا من القاعة، ادبت لإيهاب الشنطة في إيدته وقلعت الجزمة أم كعب ١٢ سم ومشيت في جراج الأوبرا الطاهر حافية القدمين.. إيهاب طبعا استلمني: «كان ماله الزحافي؟ لازم تعمل فيها بنونة يعني! قتلتك، مالكوش في الحاجات الأنثوية بتلبسوها ليه؟؟»
- طب اسكت! أصل اللي إيدته في الميا مش زي اللي رجله في (الكعب)!
يا عيني على البنات.. إحنا عشان ننزل ويبقى شكلنا حلو كده زي ما بتشرفونا لازم نلبس ٤٠٠ قطعة وإكسوارات بفلوس قد كده ونروح لكوافير وإشي باديكير وإشي مانيكير.. ده غير الروج والأبي لاينر والكونتور.. وفي الآخر مش عاجب.. قهر أقسم بالله.

- يعني عشان (المقادير) اللي أنا مش فاهم منها كلمة دي تبقوا مقهورين؟

- هو فيه ظلم أكثر من كده!

- طيب اركبي يا لمضة.. اركبي.

فتحلي الباب وقفله بعد ما ركبت ولف ركب العربية، شغل سعاد ماسي وانحرك..

- طيب اديني فرصة أثبتلك إننا كرجالة برضو مقهورين.
- ماتحاولش.

- اسمعي بس، إنتي لو مانمتيش كويس وقبل ما تنامي افتكرتي حاجات نكدت عليك ورحتي الشغل عينيكي وارمة وشكلك يقرف، زميلتك لما تشوفك هتقول لك إيه؟

- شكلي يقرف؟؟؟

- ردي عليا بس.

- هتقول لي مثلا «إيه يا بنتي.. مالك.. إنتي معيطة ولا إيه؟»

- بالضبط!

- بالضبط إيه؟

- انتي متخيلة لو نفس الموقف حصل بس مع اثنين ولاد ليه اللي ممكن يحصل؟
- هو غالبا مافيش ولد عنده الشجاعة يقول لصاحبه: «انت معيط ولا ليه؟»

- بالضبط.. ممكن يعوره فيها.
- وما فيش ولد (معيط) عنده الجرأة يقول إنه معيط برضو.
- قهرده ولا مش قهره؟

- يعني إنتوا عاوزين تتأخروا في الشارع براحتكم واحنا لا.. وتسافروا وتركبوا عجل وتبرطعوا في الدنيا يمين وشمال وكمان تعبروا عن مشاعركم بكل أريحية؟ ما كل حاجة ليها ضريبة يا رجالة!

وصلنا تحت بيتي، ركن إيهاب ووطى صوت المزيككا خالص وقال لي:
«تبسطي النهارده؟»
- قوي..

- أنا أهم حاجة عندي أشوفك مبسوطه والابتسامه دي.. أيوه دي بالضبط، على وشك.

- متشكرة يا إيهاب، متشكرة جدا. تصيح على خير.
طلعت البيت غيرت هدومي وعملت كباية شاي أخضر بالنعناع
وقعدت في السرير، فتحت الدفتر ومسكت القلم وكتبت:

الحقيقة رقم ٧

مش كل الرومانسية قصص حب، فيه جرعات رومانسية رهية
بتيجي من الأصحاب.. الأصحاب اللي بجد.

والساعة ٢ بعد نص الليل التليفون رن وأول ما رديت سمعتها وهي
منفجرة في العياط: «انتى كان عندك حق!»
- خير يا مایسة!! مكلهاني الساعة اتنين بعد نص الليل تقوليلي إني عندي

حقا وإيه الجديد في كده؟ ما ده العادي بتاعي، إيه اللي حصل؟
- محمود سنايني!

- بجد! طيب الحمد لله!

- الحمد لله إيه ما أنا لسه باحبه..

- بينهالك يا مايسة.. إنتي حبيتي حالة الحب مش الشخص.. طول

مانتي بتدوري على الارتباط هتفضلتي تطلعي من واحد لواحد زيه.. طول

مانتي مش مركزة في السواقة ولا سعة و(طقة) وكل يومين ضاربالي شعرك

لون، هتفضلتي تختاري غلظ وتكلميني ترعجيني وأنا هافضل أبستف

فيكي يا مايسة!

- طيب أعمل إيه أنا دلوقتي؟؟

- هممم.. قولتيلي عملي إيه دلوقتي.. كويس السؤال ده وأنا هجاوبك

عليه بس توعديني تنفذني اللي هقولهولك بالحرف.

- أوعدك.

- أولا، ماتكتبيش على فيسبوك إنك اتولدت من جديد أو إنك في

الجيم وإن الرياضة كل حياتك وتتصوري (سيلفي) وانتي على المشاية، هو

عارف إن علاقتك بالرياضة انتهت بعد امتحان (رياضة ١) في ثانوية عامة.

- إيه؟

- وحسك عينك تغيري حالتك الاجتماعية على فيسبوك بعد يومين

وتكتبي (In a relationship)، هو عارف إنك ولا ارتبطتي ولا نبلة،

مفقوس قوي الجو ده. كنتي هتعملي كده صح؟

- إيه؟ أكيد لا يعني!

- أبوس إيدك ماتبعيلوش فيديو وانتي بتعيطي ومنهارة؟ ليه الناس

تشوفنا وإحنا (بنبربر)، ليه ها؟

- خلاص ماشي!

- آه ونصيحة لوجه الله، ممكن ماتدخليش كل ٥ دقائق تشوفي إمتي آخر

مرة دخل على الواتساب. اعترفي بتعملي كده ولا لا؟ طيب هتستفيدي

إيه؟ واوعي تجري تشتري سجائر عشان تنتقمي منه، إنتي كده بتنتقمي

من نفسك.. مش هيبقى تدخين وسرطان رثة!

- طب ما أنا أصلا بادخن.
 - طب على فكرة بقى التدخين بييجيب سرطان رئة!
 - ماشي.. طيب.. بلا سلام دلوقتي.
 - استني!! أنا لسه ماخلصتش كلامي! تحت أي ظرف من الظروف،
 ماتعمليش فيها هاني سلامة في فيلم (السلم والتعبان) وتروحي تحت
 بلكونته الساعة؛ الفجر وتقوليله: «على فكرة أنا مش وحشة قوي كده!»
 عشان غالباً الجيران هيطلبولك البوليس ومش بعيد يرموا عليك طيخ
 بابت أو مية غسيل!
 - لا انتظمني مش هاعمل كده.

- كويس، ولو القدر لعب لعبته وقابلتيه في حنة بالصدفة تجنبي تماما
 الجمل اللي من نوعية: مرتاح من غيري؟ هو أنا أستاهل منك كل ده؟ بكرة
 تعرف قيمتي!!

هو لو مش مرتاح كان كلمك.. ولو شايف إنك تستاهلي كان شالك في
 عينه، ولما بكرة ده يبجي ويعرف قيمتك يا ريت يلاقيكي مش مستنيه ولا
 موقفة حياتك عليه، ماتبقيش (Drama Queen) خلصنا بقى مش جورج
 كلزني هوا!

- حاضر.

- وعد؟

- وعد.

- عيشي حياتك. استمتعي بيها، استمتعي بجد عشان السعادة طالعة
 من جواكي مش من مصدر خارجي.. وماتنسيش دايا تحطي (زوج).
 - هاحظ حاضر.

- يلا أديني خلصت ذمتي ونصحتك وأهه كله بثوابه ماتكلميش هنا
 ثاني!

* * *

- تحبي تشربي حاجة؟
 - لا.

- على فكرة عجبني قوي النصيحة اللي قلتها لمايسة صاحبك دي بخصوص تغيير حالتها الاجتماعية على فيسبوك.

- إنت ممكن تعرف حاجات كتير عن شخصية اللي قدامك بإنك ببساطة تتابعه بيعمل إيه على فيسبوك بعد الانفصال على طول. لو جري غير الـ relationship status وخلاها (single) يبقى ما صدق وعاوز يجذب الانتباه اللي هو «أنا فضييت، مين قال تعالى؟»

لو عمل share لأدعية أو جمل من نوعية (لو كان خيرا لبقى) يبقى يا إما متدين يا عاوز يبان إنه متدين.

- طيب واللي بيكتب (تحياتي لمن غير حياتي) والحاجات التانية اللي زي (تألمت فتعلمت فتغيرت).

- لأ ده يتسحب منه الـ account فوراً!

- إنتي دمك خفيف جدا..

- صدقني.. ده المفروض يقللوا فيسبوك في وشه أو يقللوا الـ (account)

على صباعه.

- بتضحكيني جدا.. المهم عملتي إيه مع مايسة بعد كده؟

- أبدا.. قفلت معاها ونمت. صحيت ثاني يوم والفكرة اللي مسيطرة

عليا إني مش عايزة قهوة! عاوزة برجر! من حق المواطن ياكل برجر.. مرة في الشهر في السنة مش عيب.

صليت وحمدت ربنا على شوية العقل والشكل وماما اللي مستحملاني

ولبست بنظلون نبيتي وقميص أبيض طويل وجزمة جديدة.

سلمت على ماما وبُست راسها وخذت دعوة كل يوم:

«روحي يا بنتي ربنا يحب فيكي خلقه».

خذت الباب في أيدي ونزلت من العمارة، لقيته في وشي: «إيه الشياكة

دي؟»، قتلته: «شكراً»

- رايحة فين؟

- عاوزة ورد يا إبراهيم..

- نعم؟؟

- دي جملة من فيلم (أحلى الأوقات)، أنا أقصد عاوزة برجر يا إبراهيم

رايحة أكل برجر يا إبراهيم. فيه مشكلة؟

- طيب وبالليل؟
- هاروح ستاريكس أقعد لوحدي.. فيه أي تفاصيل ثاني عن يومي
تحب أقولها لك؟
- لا، أتمنالك يوم سعيد!!

دخلت ماكدونالدز، فرع المنيل.. وطلبت وجبة (تشيز برجر ميديام).
خدت أكلي في عجالة شديدة ورحت قعدت في أبعد ترايبيزة عن الناس.
شوية ودخلت بنت وولد صغيرين في السن جدا.. الاتنين مايزيدوش
عن تانية أو تالته ثانوي.. قعدوا أقدامي وعمالين يبصوا لبعض ومكسوفين
ويتسموا.. شوية وطلعلها (مج) فخار وفهمت من وشه وحركاته إنه
عامله بنفسه.. مسكت المَج وبصت عليه وراحت معيطة من الفرحة..
وفضلوا يتكلموا ويضحكوا.. يا مين يرجعني ثانوية عامة ثاني اللي ضاعت
وأنا قاعدة على المكتب باذاكر لما جالي التهاب في المفاصل.. مش كان زمان
الواحد جاله مج ولا حتى راح السبها!

خلصت أكل ومشيت وأنا بتأجيل مصير علاقة الاتنين الحلوين دول
إيه.. يا ترى هيكملوا؟ يا ترى هيكشفوا بعد شهر قليلة أو سنين إن
مشاعرهم كانت مزيفة ومش ناضجة كفاية؟ ويا ترى التطور الطبيعي
لعلاقتهم هيوصلهم لمرحلة الجواز ولا هيتفرقوا زي غيرهم كثير؟
رأيي الشخصي إن اللي خد قرار الجواز من شخص عرفه أيام الدراسة
ونفذ الكلام ده بعد التخرج على طول هو أكثر واحد خد قرار الجواز
بسهولة.. المشاعر في الوقت ده بتبقى لسه بكر، بخيرها، زي الأرض اللي
لسه ماحدث لمسها.. قلبه لسه ماتوجعش، ماتسابش، مافيش ذكريات،
مافيش مخاوف، مافيش كلاكيج..

أصعب واحد ياخذ قرار الجواز هو اللي فشل قبل كده.. فشل في
جوازه، في خطوبة، في علاقة طولت حبتين، في علاقة ماطولتش أساسًا،
المهم داق طعم الفشل وخاف يدخل في علاقات تانية وفضل مستني..
وكل ما يستني بيكبر أكثر.. اللي نَضَج وفِهم وعَقِل ولف وراح وجهه.. اللي
اتعود يشيل مسؤولية نفسه.. اللي حياته زحمة.. اللي ساب و(اتساب)..
شاف طلاقات وشاف جوازات.. عدى زي القطر على حياة ناس وكثير

كان (المحطة) لناس تانيين.. اللي مستحمل نفسه بالعافية.. الشخص ده لو ناجح كمان ومحقق قدر لا بأس به من ذاته، اضرب درجة صعوبة الاختيار في اثنين.. مش عدم احتياج لكن خبرة في (الاستغناء) عن الحاجات.. اللي اتجوزت أول واحد واللي اتجوز أول واحدة عرفها في حياته معظوظ وقراره سهل، لكن اللي فشل ووقع وقام وكمل، لما بيقرر بيقرر بصعوبة عشان ما عندوش استعداد يختار غلط تاني.

ركنت قدام ستاريكس ودخلت.. وقفت حوالي عشر دقائق قدام إسلام باحاول أقرر هاخذ إيه، بعد ما كنت باطلب نفس الحاجة دايماً وبدون تفكير (كراميل مكياتو).. وقفت عشر دقائق متنحة خالص.. وبعدين طلبت شاي.. أنا باتغير.. وكل حاجة بتتغير.. من غير ما أحسن.

خدت الميج ورحت تعدت في آخر تراييزة بعيد عن الناس. جاي على بالي أتفرج على أي فيلم عربي قديم. فتحت اللاب توب وحطيت الساعات في ودي. وقبل الفيلم ما يشتغل طلعتي إعلان حفاضات (پامبرز)، قلت يا بت عادي، (جوجل) بيلقح عليا بالكلام على طريقة طنط زي زي وبيفكرني إن اللي في سني اتجوزوا وحلفوا.. فكفاية استهبال وتسلم بقى. طبعاً اتحرق دمي وقفلت اللاب توب وقبل ما ألم حاجتي وأقوم، لقيت قدامي: «إيه ده؟ بتعمل إيه هنا؟»

- أول مرة أقابل بنت مصرية بتقعد في أماكن عامة لوحدها
- انت آخر بنت مصرية قابلتها كان إمتي أصلاً يا إبراهيم؟
- يالله من زمان.. تسمحيلى أقعد؟ هاخذ من وقتك ربع ساعة، ممكن؟
- اتفضل.

- بصي بقى، أنا لا كنت باروح مشاوير ولا غاوي أقف كل يوم في الشارع، أنا كنت باستناكي، بصراحة أنا من ساعة ما رجعت مصر بادور على عروسة ولما قابلتك لقيتك بنت ممتازة وقلبي ارتحلك جدا وما بقيتش شايف حد ينفعلي غيرك.
- اشمعنى؟

- يعني، بنت جميلة، شاطرة، سمعتك كويسة، والدتك ست محترمة

جلنا. في اللحظة دي رجعت بظهري وسندت على ظهر الكرسي وربعت

إيديا وقلتله: «وبعدين؟»

قال لي: «تقصدي التفاصيل؟؟ يبقى نتكلم في التفاصيل، بصي أنا عندي شقة مش بطالة في ٦ أكتوبر لكن أنا باكسب كويس جدا وهافتح عيادة قريب يعني نقدر نبيعها ونشترى في أحسن حنة في القاهرة؟ إيه أحسن مكان دلوقتي؟ نشوف حاجة ٣ أو ٤ أوض نعيش فيها الـ ٥ سنين الجايين وبعدين نشترى فيلا كبيرة.. أنا باحب أعيش كويس لكن طبيعة شغلي ويومي المقلوب بيضطروني أعيش حياة ملخبطة وعشان كده لازم مراتي ماتشغلش، وفيه أنشطة كتير قوي ممكن تعملها من البيت.. ولما نخلف هتشغلي مع البيبي على الأقل لغاية ما يدخل المدرسة وساعتها يا ستي أنتحللك أي مشروع من الحاجات البناتي دي.. تعملي (كب كيكس) أو تفتحي محل ورد تطلعي فيه طاقتك وكده يعني»

- حلوده! حلو قوي!

- إيه اللي حلو بالضبط؟ الورد ولا الكب كيكس؟

- ولا ده ولا ده، الحلو هو عمري اللي شفت سنينه بتجري قدامي في خمس دقائق وانت بتخططله مع نفسك كده.

- مش فاهم؟

فكيت إيديا وقربت من التراييزة، بصيتله في عينيه وقلتله: «شوف يا إبراهيم.. إنت عريس لقطه.. محترم، دكتور، شبه صلاح ذو الفقار.. حسبة كسبانة لأي واحدة عاوزة (عريس) لكن خسرانة لواحدة بتدور على حلم.. حلم تبنيه مع حد ثاني مش تستلمه منه على الجاهز باليوم والساعة والكب كيك. الجواز شركة، مؤسسة اجتماعية أحب فيها أكون شريك فعال مش ضيف شرف. آسفة يا إبراهيم. أنا باحب أخطط لنفسي. آه، وبالمناسبة، شكرا على حزام التخسيس.. أنا اديته لواحدة صاحبتني محتاجاه أكثر مني. شكرا ثاني. سلام»

* * *

«حضرات السادة الركاب، نرحب بكم مجددا على متن الطائرة المتجهة إلى الدار البيضاء ونحيطكم علما أننا سوف نصل بإذن الله خلال...»

- ما عرفش ليه لما سألك هتكوني فين بالليل كنت حاسس إنه هيجيلك.
- جايز.

- مش جايز، أنا متأكد إنك قلتيله هتبقي فين بالليل وانتبي عارفة إنه مهتم بقاله فترة وهيجي.. كان نفسك بطلع هو الإنسان اللي في خيالك؟
- بروضو جايز.

- غريبة.

- ليه؟ صدقني، أنا في الأول وفي الآخر بنت.. وأي بنت في العالم مها بلغت من مراحل النضج العاطفي والاجتماعي جواها فيه بنت صغيرة خائفة يبجي عليها يوم وتلافي نفسها ست عجوزة عايشة لوحدها مع الكلب بتاعها وتتخايق كل يوم مع البواب اللي شايفة إنه مستقصدها عشان بيجيلها جينة رومي جديدة وهي طالباها قديمة.. عارف إنت النموذج ده؟

- آه عارفة.. طيب وصديقته ليه على كده؟ مع إنه على كلامك شخص ممتاز وعريس (لقطة)؟

- ها حكيك حدوتة.. زمان، كان ليا اتنين صحابي مرتبطين من أيام ثانوي ويحبوا بعض جدا.. نظريا ماكانش عندهم مشاكل مستعصية تمنع إن علاقتهم تنمو وتكمل.. يعني السن كان مناسب، والتعليم، والمستوى الاجتماعي وحتى الميول والتوجهات.. المشكلة الكبيرة إن الولد ماكانش مقتنع بالجوازك (منظومة) وكان معترض على فكرة إنه التطور الطبيعي للحب. أما البنت فكانت بتعجه وشايفة إن الحب أصلا اعتراف ضمني بالموافقة على الجواز في المستقبل القريب أو البعيد.. فضلوا على الحال ده يتخانقوا شوية، شوية يقنعها وشوية تقوم عليه تنفجر في وشه لحد ما سابوا بعض.

الولد اختفى تماما وقعدنا كثير ما بنشوفهوش وطلعت إشاعات كثير، اللي يقول هاجر إسبانيا واللي يقول ده ربي دقنه واستشيخ.. بعدها بحوالي

١٠ شهور، باقلب في فيسبوك في يوم لقيت صورة فرحة وكتاب تحتها:
«أخيراً لقيت حب حياتي». بس كده.

بعيداً عن إحساس صاحبتني باللي حصل وفكرة إن المدة بين العلاقتين
قليلة وكل القصة دي، خلاصة الموضوع إن الجواز بيفضل منظومة
اجتماعية فاشلة والأمثلة اللي حوالينا بتفضل تجيب إحباط وبيفضل مايفش
عندك طاقة وبتفضل ظروفك مش ساعحة لحد ما بييجي يوم وتلاقي (حب
حياتك)، كل ده بيتغير. فهمت حاجة؟

- فهمت إن ابراهيم عريس (لقطة) لكن مش (حب حياتك). سكتي

ليه؟

- إنت ازاي فاهمني وفاهم كل حاجة كده؟ هو إحنا قطعنا ليه؟ بطلنا

نتكلم ونتقابل ليه؟ إيه اللي حصل؟

- ماحصلش حاجة، بس فيه لحظة كده ماينتفعش تفضل متمسك

بعلاقتك باللي قدامك فيها عشان ماتبقاش بايخ.. فيه لحظة لازم تديله

مساحته وفرصته يبعد عنك أو مايعدش بس يبقى عمل اللي يريد. خيلنا

مانتكلمش في اللي فات، المهم اللي جاي. كمل..

- أكمل؟ هو أنا وقتت فين؟ آه، رجعت البيت غيرت هدومي وعملت

كباية شاي أخضر بالنعناع وقعدت في السرير، وكالعادة فتحت الدفتر

ومسكت القلم وكتبت:

الحقيقة رقم ٨

الأحلام ساعات بتأخر.. بس في الآخر هتيجي.. هتيجي.

فضلت قاعدة في السرير باقرأ وعلى الساعة ١ بعد نص الليل بصيت

للموبايل اللي مارنش لحد دلوقتي وأنا مستغربة.. قلت أتصل ببايسة أسأل

عليها: «إنتي كويسة؟»

- أنا تمام.. إنتي إزيك؟

- مايسة؟ إنتي بتقوليلي إزيك؟

- آه.

- مش الحقيني؟ مش انصحيني؟

- أيوه،
 - متأكدة إن انتي كويسة؟
 - صدقتيني أنا تمام..
 - وعشان كده ماتصلتيش بيا؟
 - لا خالص.. أنا كل شوية باقى عاوزة أكلّمك وأرجع في كلامي.. لو
 كلمتك لازم أعترف عشان أنا مش باعرف أكذب عليك، انتي بالذات
 عاجناني وخابزالي..
 - وتكذبي عليا ليه؟ ما تقولي لي الحقيقة.. عملتي إيه؟
 - آآ.. أنا.. أنا «باحب»!
 - بجد؟؟؟
 - أيوه.. باحب واحد بيحبني جدا وهاتخطب قريب كمان.
 - إيه ده مبروك يا مايسة! طيب ومبسوطة؟
 - بصي.. هو شخص جدع ومحترم ودمه خفيف.. ده غير إنه شبه وائل
 كفوري شوية.
 - والله طالما زي ما بتقولي جدع ويبحبك ومحترم ودمه خفيف وشبه
 وائل كفوري يبقى التجوزيه..
 - بالضبط..
 - ولو جدع ويبحبك ومحترم ودمه (مش) خفيف لكن شبه وائل
 كفوري التجوزيه..
 - طبعا.
 - ولو مايبحبكيش ومش محترم ودمه يلطش بس شبه وائل كفوري..
 التجوزيه برضو.. ده وائل كفوري مش أي حد! ويا ترى الشخص ده معتز
 ولا سامح ولا وليد؟
 - لا محمود.
 - محمود مجدي؟
 - لا محمود.. المشد!
 سمعت الاسم ومابقيتش عارفة أحدد إحساسي ساعتها، لكن كان
 إحساس بين المفاجأة والصدمة والفرحة: «محمود المشد!! مبروك
 يا مايسة! مبروك يا حبيبتي! بس إمتى وفين؟»

- مش متصدقني، يوم خطوبة حسين وكاميليا.. رقصنا.. كلمني لما روجت.. كلمته لما صحبت، كلمتي وكلمته تاني وتالت.. قربنا من بعض.. أنا حبيت!

- مش مصدق إن بعد كل ده مایسة وحمود ارتبطوا؟
- بالعكس، لازم تصدق. من وجهة نظري، محمود ومایسة مناسبين جدا لبعض.. حتى عيوبهم بتكمل بعض.. محمود ومایسة هدفهم الارتباط كمشروع.. وده هدف منطقي ومش عيب.. مش عيب إن الواحد يبقى عارف عاوز يعمل إيه حتى لو لسه مالمقاش الشخص المناسب.. محمود ومایسة اتنين مستعدين نفسيا للارتباط وعاوزينه لكن كل واحد ماكانش لسه لقي الثاني..

- أنا متغرب كلامك.. آمال فين إيمانك بفكرة (حب حياتك) وإن الواحد يستني؟

- الناس غير بعض صدقني واللي يسعدني ممكن مايسعدش حد تاني.. أنا غير مایسة ومایسة غيري.. مش معنى كده إن هي غلط وأنا صح.. مانكوش إني اتكلمت معاها كتير في موضوع إنها ماتدورش وتستني حب حياتها لكن ده مايمنعش إني محترمة شخصيتها واختلافها عني.. محمود ومایسة هيكملوا.. وهينجح مشروعهم.

- ربنا يوفقهم.. وبعدين؟

- أبدا قفلت التليفون وعلى وشي ابتسامه رضا مبالغ فيها وتمت. وتاني يوم صحبت بدري جدا، صليت وحمدت ربنا إنه اداني يوم جديد أعيشه.. النهارده (لبلة الحنة) بتاعة كاميليا واللي خلال أيام قليلة هتبقى زوجة (حسين زكي)

- صباح الخير يا أمي.

- بونجور يا حبيبتني.. تاكلي إيه؟

- هاكل تفاحة أو أي حاجة خفيفة.. أصلي هاشترى بيتزا وأنا رايحة الحفلة بتاعة كاميليا وهاكل منها هناك.

- بيتزا؟؟؟ انتي كويسة؟
- آه إيه اللي فيها.. أنا هاتغدا بيتزا مش هافطر (فتة كوارع). ما تقلقيش قروي كده.

- طيب ردي على التليفون طيب..

- حاضر يا أمي.

رفعت سماعة التليفون الأرضي وده كان حدث ما يحصلش بالنسبالي غير في الأوقات القليلة اللي باقعدھا في البيت وطبعا المتصلة دايمًا واحدة: «آلو.. أيوه.. ازي حضرتك يا طنط؟»

- تمام يا روح طنط.. انتي عاملة إيه؟

- تمام يا ط..

- صحتك؟

- تما..

- الشغل؟

- ت..

- مافيش حاجة في السكة؟

- نعم؟

- على العموم اوعي تقلقي يا حبيبتي.. مافيش بنت بتقعد من غير جواز.

- لا وأنا أقلق ليه.. إذا كان حضرتك اهو واتجوزتي!

- إيه؟؟؟

- اااا.. قصدي.. مش قلقانة! ماماااااا.. تعالي كلمي طنط زي زي!

دخلت أوضتي لبست فستان أزرق واسع استعدادا للرقص والذي منه في الحفلة واستعدادا برضو لانتفاخ ما بعد البيتزا، ودخلت على ماما أسلم عليها قبل ما أنزل: «زي زي بتقول إنها شافتك امبارح قاعدة في مطعم بتاكلي لوحدهك وشكلك مش تمام، هو فيه إيه؟»

- مش تمام ليه؟ مش هي اللي شافتني أصلا وحتى لو شافتني.. إيه اللي فيها؟ هي شافتني ماشية على إيدي ورجلي؟ عادي.. بني آدم قاعد بياكل

ردافع تمن الأكل من حر ماله الحلال اللي اشتغل وتعب فيه..
 - خلاص خلاص.. باقول لك.. إنتي مش نارية ترجعي شغلك؟
 - هارجع.. بافكر أنزل بكرة.. زهقت من الأجازة.
 - أحسن برضو.. ارجعي شغلك يا حبيبتى واركزي كده وامسكي
 زمام أمورك.. بطلي تحسيها قوي كده..
 - آه حاضر.. أمي، هو ده جورنال النهارده؟
 - آه.. المهم، باقول لك يا بنتي بطلي تخافي..
 - فيه منيو البيتزا جوا؟
 - مش عارفة.. باقول لك بطلي تخافي وشوفي كده.. لو فيه حد يقرب
 منك شرفيه برضو.. لو فيه حد كويس قربي منه.. إنتي قلتلي إن فيه واحد
 تعرفه شاب ممتاز وتقريبا معجب بيكي.
 - على فكرة اللي فكر يعمل بيتزا بالدوريتوس هو هو اللي قال لهم يعملوا
 كنافة بالرد فيلثت.. هو إيه المشكلة إننا ناكل كل حاجة لوحدها؟؟!
 - ربنا يصلح حالك يا بنتي ويهديكي..
 - فيه إيه يا أمي؟ إيه يا جميل؟ ما أنا هادية أهو؟ هو فيه في عقل بتك؟
 - ربنا يحب فيكي خلقه.
 - لا.. لحد كده وكفاية يا أمي أبوس إيدك! من يوم ما اتولدت وانتي
 بتدعيلي: «ربنا يحب فيكي خلقه». كفاية يا ماما مش كل شوية هيحبنى
 واحد وارميه في الـ(Friendzone)!!
 - فريندزون؟؟ شفتي! يعني إنتي اللي بتطفشيهم!!
 - باطفش مين بس؟ إنتي عاوزة تطلعي المشكلة فيا وخلص؟
 - عارفة إيه المشكلة؟ المشكلة إنك خايفة تقربي من أي حد، فاهمة
 بزيادة وعارفة كل حاجة فبتنطي وبتستبقي الأحداث.. بتتوقعي الفشل
 من غير ما تجربي.. بتخيلي الغرق وانتي لسه على الشط من غير ما تبلي
 رجلك حتى. فكرتيني بالنكتة بتاعة الراجل اللي كان ماشي في حنة
 مقطوعة وعريته عطلت وكان هيموت من الجوع والعطش، شاف نور
 بيت بعيد قوي، قفل العربية وبدأ يمشي ناحية البيت وهو بيتقول لنفسه:
 أنا عطشان قوي عاوز بق ميا وأكل.. ليه يا رب كده؟ دلوقتي أروح البيت

ده، يطلع ساكن فيه راجل عجوز ريته الوحشة، ويبقى عاوز يلزقهالي، ويهدني بالمسدس اللي عنده، وأضطر أتجوزها، وتخلي حياتي جحيم، وفي الآخر أخذ المسدس من الراجل، وأقتلهم هما الاتنين، وأروح السجن، ومستقبلي يضيع!! وأول ما وصل وصاحب البيت فتحله الباب، صرخ وقال له: «مش عايز منك حاجة!»

ضحكت من قلبي لحد ما عينيا دمعت وهي كمان ضحكت بصوت عالي، حضتها وقتلتها: «حلوة، حلوة على فكرة.. بس عارفة إيه الأحلى؟ إنتي يا أمي. أنا هالبس وأنزل عشان أتأخرت على البنات». نزلت من البيت، ولسه بافكر في الكلام اللي ماما قالتة. جايز هي عندها حق في حاجات كتير ما عدا حكاية الخوف، أنا يمكن باخاف من حاجات كتيرة لكن الارتباط مش واحد منها..



- بتخافي من إيه؟

- باخاف من قوتي، من قدرتي الاستثنائية على الاستغناء عن أي حاجة أو أي حد.. باخاف من براعتي في التعامل مع لحظات الفشل والضعف.. باخاف من دموعي اللي مابقتش بتنزل خالص عشان أنا دايمًا قوية.. أنا باخاف بييجي يوم مايقاش فاضل حاجة أخاف منها.

- خليني أرجعك جملة واحدة لورا. إنتي بتقولي إنك بتخافي من حاجات كتير لكن (الارتباط) مش منها.. طيب، ليه مش مرتبطة؟ ليه ماتجوزتيش ولا حتى مرتبطة بحد؟

- مش عارفة، أنا عمري ما عشت قصة الحب اللي بتقعد تلات أربع سنين دي.. عارف إنت القصة بتاعة المدرسة والجامعة دي.. أهوده السيناريو الوحيد اللي كان ممكن بسببه أتجوز بدري.. لكن بعد ما كبرت ورأيتي في الأشياء كبر معايا، نظرتي اختلفت في الجواز عموماً.. الجواز في مصر بشكله ومفهومه الحالي مافيهوش أي مكاسب.. الجواز في مصر ضاغظ نفسيًا وماديا وعشان كده بيحتاج حب من النوع الـ(سوبر) عشان الواحد يستحمل السخافات والعادات والتوتر عشان يبقى مع اللي بيعجبه.

أما الشكل الثاني اللي بنحطله مكياج ونقول عليه (جواز الصالونات)،
(شكل تقليدي)، (عريس واتقدم) فدي الوصفة السحرية لحياة حزينة
وموت بطيء..

وعلى ذكر الشكل التقليدي ده، ساعات باحسن إن جواز الصالونات
ده عامل زي خاصية الـ (friend suggestion) بتاعة فيسبوك.. من منطلق
إن أكيد إنتي مش عارفة مصلحتك فين وأنا عارف أنا هارشحك لمين ومين
ينفعلك.. إيه رأيك في حاتم ابن طنط ميرفت، مهندس عايش في دبي؟
طب تامر أخو شادي اللي كان معاكم في الكلية؟ طب ما تشوفي عمود
صاحب زياد جوز منى بنت خالتك؟

المهم ما طولش عليك لا تنام مني، وصلت بيت كاميليا الساعة ٣
ومعايا؛ غلب بيتزا لارج.. وصلت أنا وسميحة أول ناس، بعد شوية
وصلوا قرايب ومعارف كاميليا واشتغلت المزيك والهيفصة وبدأ فيضان
الـ (ميلفي) وبوز البطة الشقية وحركة الإيد في الوسط الشهيرة. سبت
البنات عاملين دايرة حوالين كاميليا اللي واقفة بترقص في النص وخذت
كاس عصير التفاح وطلعت البلكونة: «سميحة، إيه اللي طلعتك البلكونة؟»
- نفس اللي طلعتك..

- كاميليا بتجوز أخيرا، تخيلي.

- أنا فرحانة قوي.. كاميليا تستاهل تعيش الحب.

- وانتي كمان تستاهلي تعيشيه يا سميحة..

- لا يا ستي مش عايزة! لحد كده وكفاية.. أنا هاركنز في شغلي وشكرا

على كده.. وانتي؟

- أنا عارفة أنا هاعمل إيه.. أنا هادي نفسي ٣ أو ٤ سنين في البلد، ويعد
كده هاسافر (كينيا) أعيش في الغابات المفتوحة أصور الغزلان والحمير
الوحشية وأبيع الصور.. ويمكن أتبنى طفل كيني صغير وأضيع عليه كل
لروني..

بصنلي باستغراب وقالتلي: «ثروة إيه؟»، قتلها: «الثروة اللي هاجمعها
من بيع الصور»، ضحكت ضحكة قصيرة بصوت وسكتت فجأة.. بصنلي
نظرة عمري ما شفتها في عينين سميحة في حياتي..

- باقول لك إيه.. أنا خايقة.
 - ليه يا سميحة بتقولي كده؟
 - عشان أنا ولا قوية ولا مستغنية ولا نيلة.. أنا عايزة أتحب.. عايزة حد
 يمك فيا. أنا قررت أشوف العريس اللي بابا جايهولي!
 - هتشوفي عريس صالونات؟
 - أيوه..

- طيب يا حبيبي ربنا يسعدك..
 - أنا مش سعيدة.. ومش هاعرف بسهولة أكون سعيدة.. ومش حابة
 نفسي بس هاحاول وهاشوف عشان مابقاش لوحدي زي ما هو كان دلينا
 بيهددني. أنا في مشكلة وعاوزاكي تبقي جنبي.
 - أنا مش عارفة أقول لك إيه، بس أنا مبسوطة إنك قلتيلي، دلوقتي إحنا
 بقينا اتنين في المشكلة مش واحد لوحده.
 عدى الوقت في الحنة والمزيكا والرقص وبدأت البنات تمشي واحدة
 ورا الثانية لغاية الساعة ١٠ مابقاش فاضل غير كاميليا وسميحة وأنا..
 - يلا تعالوا نتكلم في موضوع بجد..

- قولي يا سميحة.
 - إيه أغرب جوازة صالونات شفتوها؟
 ردت عليها كاميليا وهي بتشيل المكياج من على وشها قدام المرايا:
 «أنا عندي قصة! أنا مرة واحد شافني في البنك واستاني لما خلصت
 شغل وقاللي إنه عاوز يتجوزني»، قتلها «بس ده مش صالونات خالص
 يا كاميليا ده كده جواز بنوك». قررت سميحة تقلع الجزمة وتستريح على
 الكتبة وقالت: «أنا مرة كان فيه واحد معايا في الشغل وفي يوم قال لي إنه
 مستعد يتجوزني بكرة لو وافقت.. أنا طبعا قتلته لا إحنا مانعرفش بعض
 وأنا محتاجة أسمعك الأول وأعرف شخصيتك»
 - وبعدين؟

- في يوم نزلنا وكان وقت غدا، قال لي لو بتحبي السمك هاعزمك
 في مكان ممتاز. وصلنا المطعم وسحبني عند التلاجة عشان ننقي السمك
 فلاقيته جاب النوع اللي أنا باحبه وماجابش لنفسه سمك خالص ولما
 سأله قال لي «هاكل معاكي ولا إنتي بخيلة؟»، وأول ما طلبنا والجرسون

اندور قام فاتح الـ (مينيو) بإيد وفي إيده الثانية الموبايل وقعد يحسب احنا طلبنا حاجات بكام.

سألته كاميليا بفضول شديد: «وأكل معاكى؟»

- ده أكل الأكل كله!! أنا أصلا كانت نفسي اتسدت بعد حركة الآلة الحاسبة وبطني قلبت وبقيت هاموت وأروح.

سحبت كاميليا آخر كرتونة بيتزا، خدت منها حنة وحطت الكرتونة جنبها على الكنبه وهي بتقول: «المشكلة إن إحنا مجتمتع مخالف نفسه وتايه كده مش مركز أو مش عارف هو عاوز إيه، تلاقى دايم الحاجات اللي المفروض واضحة وصریحة ملخبطة وداخلة في بعضها.. زي مثلا موضوع الفلوس. من ناحية «اصرف ما في الجيب يأتيك ما في الغيب» لكن من ناحية ثانية «القرش الابيض ينفع في اليوم الاسود». طب إزاي؟»

ردت سميحة عليها وقالتلها: «وعندك كمان «الجنيه غلب الكارنيه» بس برضو «الفلوس مش كل حاجة»..

سكتت سميحة وقالتلنا «بصوا، لو على المخزون الدرامي في جوازات الصالونات يبقى اسمعوا الدراما اللي بجد بقى.. من ٥ سنين اتقدملي واحد اسمه (نادر) ونادر ده كان حكاية.. كان بيقول: «أنا كاجوال خالص ومش رجعي بس أنا باحب شوية حاجات تكون في البنت اللي هارتبط بيها وتكون شريكة حياتي»، وسألته: «زي إيه؟»

قال لي: «يعني لازم تكون مقتنعة إن احنا متساويين، لازم تشتغل وتساعد في مصاريف البيت وكمان تقوم بكل واجباتها كزوجة من طيبخ وغسيل وتنظيف وطلبات.. أنا ما حبش حد يدخل بيتي.. هي ملزمة تعمل كل حاجة.. برضو الراجل الراجل والست الست»

قلت له: «آه طبعا صح»

- طبعا الشغل مهم في حياة الست لكن لازم ترجع البيت قبلي وماتنامش غير أما أنا أنام..
قلتله: «آه ده أساسي».

- غير كده يوم الجمعة أنا غالبا باقضيه في البيت باقى هل كان طول الأسبوع لازم تقعد معايا بس ماتتكلمش عشان باقى مصدع من ضغط الشغل.

- بس يا بنات وقال لي إن العروسة اللي شافها قبلي اتضايقت جدا لما قال لها إنه عاوزها بعد الجواز تلبسه فستان سواريه شيك جدا لما يرجع من الشغل وتجهزله ميا وملح عشان رجليه ونطبخ طبخة جديدة كل يوم بعد ما تكون ذاكرت للولاد وحميتهم ونيمتهم.. وبالليل ترقصه!

في اللحظة دي أعصابي فلتت مني وماقدرتش ماتكلمش.. سألتها: «التي بتكلمي جد يا سميحة؟ هو قال لك كده»، قالتلي: «إيه مش مصدقاني؟» قلتها: «لا طبعا مصدقاني». أنا بس مش مصدقة إنها اتضايقت بس، دي كانت المفروض تتف عليه.. مش بس كده.. لا دي كانت المفروض تلم صحابها وأهلها واللي يتشددوها ويحفروا حفرة كبيرة ويرموه فيها وهاتك يا تفاة.. ويبقى شهيد السواريه والمعدوم (تفا)! فضلنا نضحك ولما كبس عليا النوم سلمت على البنات ومشيت وأنا بفكر..

سلمت على البنات ومشيت وأنا بفكر في كل بنت اتبهذلت البيهذلة دي عشان تسكت اللي حواليتها.. عشان مجتمعتها مايعترفش بأي إنجاز ليها طول ما الدبلة مش في إيدها الشمال. اللي اتجوزت مش شاطرة، واللي ماتجوزتش مش خايبة.. مافيش جدول زمني مثالي لازم كلنا ننفذه بالحرف، سيوا اللي يتجوز يتجوز واللي يشتغل يشتغل واللي يقعد يقعد.. مش لازم نبقى كلنا نسخ من بعض في الشكل والطبع والأهداف.. إحنا ليه بنعيش حياة ناس غيرنا؟



- فعلا ماكانش عندك حاجة تقوليها لسميحة يومها؟

- لا كان عندي.. لكن في اللحظة دي ماكتش عاوزة أقول أي حاجة. أنا عشت عمري كله باحلال الناس، بانصح، باتعاطف لحد ما الموضوع بقى سخيف وماسخ. مرة اتفرجت على فيديو بيوضح الفرق بين التعاطف والتقمص العاطفي، وقد إيه الكلمتين مختلفين في المعنى مع إنهم قرييين في الحروف.. على الأقل بالانجليزي قرييين.

أول مصطلح اللي هو (Sympathy) أو التعاطف، هو لما نحس بالناس..
لما نشوف مشاكلهم.. فيصعبوا علينا.. جمل كثير بنقولها من باب التعاطف
زي «يا عيني»، «يا حرام»، «ما علس»..

أما مصطلح التقمص العاطفي أو الـ (empathy) معناه التواصل.. هو
إنك تحس بحاجة جواك تربطها باللي بتسمعه من الشخص اللي فدامك،
الحاجة اللي واجعاها تلمس حاجة فيك إنت فتحط نفسك مكانه مش بس
تتعاطف معاه من مكانك. التقمص العاطفي إنك تحس (مع) الناس مش
بيهم.

- أفهم من كده إن الأجازة غيرتك وبدأتي تحسي مع الناس مش بس
تتعاطفي معاهم؟

- يمكن تكون دي من الحاجات اللي اتغيرت فيا فعلا، لكن فيه حاجات
فضلت ثابتة ورأيي فيها زي ما هو.

- زي إيه؟

- زي مثلا.. الحقيقة رقم ٩ اللي كتبتها أول ما رجعت البيت يومها
ويتقول:

مش المفروض البنت توقف حياتها وتجري ورا الفارس أبو حصان..
المفروض تجري ورا أحلامها والفارس هيسجي في ميعاده ويجري
جنبها مش قدامها.

- وإيه اللي حصل تاني ليلتها، جالك تليفون؟

- لا.. فضلت سهرانة ماجاليش نوم.. وبعد شوية فتحت فيس بوك
أشوف إيه اللي بيحصل في الدنيا.. لقيت صورة صديق قديم كان مرتبط
بنت أكبر منه بستتين.. قصة حب عنيفة استمرت أربع سنين.. كل الناس
كانوا ضد علاقتهم بالذات أهلها وأمله كمان. في الفترة دي خسر ناس
كثيرة قوي من أصحابه عشان ماكانش بيعرف يشوفهم لأنه كان على طول
معاهم.. كان دايماً معبط وقلقان.. حاسس إنه مش هيعرف يعول لها اللي
هي عايزاه.. أو مش هيلحق.. طبعا كانت النتيجة إنهم سابوا بعض.

تعب شوية لكن فاق بعدها وقعد فترة طويلة مستقر نفسياً.. وحيد
لكن متدني وسط أصحابه وأمله وأخذ خطوات مهمة في شغله.
من سنة تقريباً، صديقي ده قابل بنت ووقع في غرامها من أول نظرة..
لما عرفها على أهله وأصحابه حبوها زي هو ما حبها وكانت النتيجة إنه
اتجوزها في شهرين ثلاثة. مراته دي أكبر منه بسبع سنين.
- القدر مافيهوش حسابات، مافيش قواعد، مافيش شروط، مافيش
كتالوجات، مافيش (المفروض)..

- هو مين اللي فرض المفروض؟

- لو عرفتي قوليلي وقوليلي الأول إيه اللي حصل ثاني يوم؟

- ثاني يوم يا سيدي.. صحيت من بدري، لبست أقرب حاجة طلعت
معايا من الدولاب ونزلت. الغربية إن إبراهيم ماكانش مستني تحت ولا
قافل عليا ولا كانت عربيته موجودة من أساسه..

يومها قعدت ألف بدون هدف.. دماغني كانت عاملة زي شريط
الفيديو لما (بتجريه)، بتشوف مشاهد كثيرة بتعدي بسرعة قدام عينيك من
غير ما تميز تفاصيلها، بتحس قد إيه انت ثابت لما بتركز مع الشريط وهو
بيجري، بتعرف إن بقالك سنين واقف مكانك وبتتفرج..

أنا بدأت الأجازه وفي دماغني ٣ أسئلة عاوزه أجاب عليهم:

أنا مين بجد وعاوزه أعمل إيه في حياتي وهاوصل له إزاي.. وزهقت
من الأجازه وأنا لسه ماوصلتش لأي حاجة خالص.. لا عرفت أنا مين
ولا رايحة فين. طلعت الحكاية مش ديته إني (أغير) الأماكن والأنشطة
والوشوش زي إيهاب ما نصحني. طلعت الحكاية أكبر من كده بكثير.

عمرك وصلت لمرحلة ال(مش عارف) في حياتك؟

المرحلة اللي بتبقى تقريباً ما عندكش أي إجابة مؤكدة لأي سؤال مهما
كان بسيط؟ أنا باحب إيه؟ أنا عاوز إيه؟ أنا رايح فين؟ جاي مين؟ يومها
اكتشفت إني مش عارفة.. مش عارفة وبس..

قعدت أفكر أحلامي من سنة واثنين وعشرة.. الأحلام اللي
ماتحققتش، الأحلام اللي كنت عايشة عشانها ومركزة فيها ومضبعة عليها
طاقتي.. ويومها لما افتكرتهم حسيت بحاجة عكس بعض..

إحساس بالفرحة عشان الأحلام دي ماتحقتش لأنني مع الوقت عرفت
 وأناكدت إنها مش بتاعتي.. ولو اتحقت ماكتش هابقي أنا وأنا وماكتش
 هابقي مبسوطة بيها.. طيب ودلوقتي.. إيه أحلامي؟ ولو عرفتها.. يا ترى
 مي دي أحلامي فعلاً ولا مسألة وقت؟

- الوقت.. الحاجة السحرية اللي بتغير كل شيء.
 اللي بيغير طعم حاجات.. ويضيع طعم حاجات ثانية..
 يقوي ناس وييموت ناس ثانية..

الوقت.. الطرف الثالث في علاقاتنا ببعض وعلاقتنا بالأشياء..
 - الوقت يفضح.. وساعات بينسي.. وييقوي.. وكثير بيعالج. بعد ما
 لقيت كثير في الشوارع، لقيت نفسي قدام ستاربيكس.. ما طلبتش حاجة
 وقعدت في ترايبزة باصة على الشارع.. قعدت أشم ريحة الخريف وبوادر
 الشتا اللي لسبب ما بتصيبني بحالة من الشجن.. والشجن بييجر خيط
 ذكريات كثيرة ما باعرفش أوقفها..

- تسمحي أسألك سؤال مالوش دعوة بحاجة؟
 - انفضل.

- تفتكري الحب ممكن يموت مع الوقت؟
 - ممكن.. وممكن يتدفن حي.. يموت موة مش طبيعية..
 - طيب سؤال ثاني ولو مش حابة تردني اعتبرني نفسك ماسمعتيش
 حاجة؟

- انفضل.

- انني عمرك التحبتي قبل كده.. اتحبيني بجد؟
 - أيوه أنا اتحببت قبل كده.. اتحببت جداً كمان.. كان شاب ممتاز.. فعلاً
 كان هائل.. محترم وخلوق.. شكله لطيف.. متعلم تعليم كويس جداً
 ويشغل ورياضي وغير مدخن وهادي.. في البداية كنا زمايل وبعدين
 أصدقاء وأنا فعلاً كنت باحب أتناقش معاه في مواضيع عامة وكان بيعرف
 بضحكني.

مع الوقت بدأت أحس إن معاملته فيها اهتمام أزيد من اهتمام
 (الأصدقاء) ببعض لكن كنت في حالة إنكار، ماكتش عاوزة أخسره

فعلًا وتوقعت إن عمر علاقتنا ما ينتظر عن الصداقة الجامدة دي ولإني
في أمان..

أنا فاكرة في مرة اتصل بيا يسأل على حاجة والمواضيع جابت بعضها
وبعد ١٠ دقائق قتلته: «ماعلش يا علي، تعالى نقفل عشان إيدي وجعتني
من مسكة الموبايل». ماعرفش ازاي كنت باقدر أقابل معاملته الكويسة
بالدبش ده.

لحد ما جه يوم أنا فاكراه كويس.. جاب بوكيه ورد وعمل مشهد فوق
كوبري ٦ اكتوبر وكان موقف عجيب جدًا.. أنا فاكرة إن يومها لما وقف
واعترف لي بحبه، بدل ما أعيط أو أصرخ وأنط من فوق الكوبري مثلًا وأقول
بأداء دراماتيكي: «IDO»، ابتسمت وبصيت وقتلته: «شكرًا يا علي، شكرًا
على كل حاجة» وسبته ومشيت.

- معقولة كان ده رد فعلك؟

- أيوه. بعدها بفترة الدنيا طبعًا مامشيتش، ماعرفناش نتعامل مع بعض
غادي.. هو كان بيعبني أه لكن كان برضو ذكي وعرف اللي فيها.. آخر
مرة اتقابلنا قال لي: «انتى مابتحيينيش، وماحاولتيش تحييني، لكن أنا مش
زعلان.. كفاية إنك خلتييني أعرف إني قادر أحب».

كلمته دي كانت (قلم) على وشي.. بالرغم من كل المميزات اللي كانت
فيه لكن ماعرفتش أحبه.. كان نفسي ماكسفوش لكن عمر الواحد ما
بيقول «باحبك» لحد عشان بس مايكسفوش.

طبعًا خرجنا من حياة بعض بعد كل اللي حصل أكيد مافضلناش
صحاب، وهو بعدها بكذا سنة حب بنت تانية واتجوزوا وأفتكر عايشين
حياة هادية وسعيدة وأنا فعلًا باحترمه وبافتكره بالخير. من غير ما يقصد
اداني درس مهم جدًا في الحب.. علمني إن «الموبايل عمره ما هيوجع إيديك
لو مع حد بتحبه».

- عارفة، فيه حاجة غريبة جدًا في القصص القديمة اللي فشلت
وانتهت.. كل واحد فينا شايل في قلبه حكايته وعايش.. حكاية فاكرها
كويس كأنها امبارح.. فاكر ريحتها.. فاكر الأماكن.. الأصوات.. فاكرها
كويس بكل تفاصيلها.. مش شرط عشان بيعحب اللي فشلت قصته معاه..

مش شرط يكون بيشتغى يرجع بيه الزمن ويغير اللي كان.. ده ممكن يكون
 مش عارف أصلاً هو حبه ليه واذاي.. أو ما حوش بحالين..
 لكن دايمًا فيه قصة ما بتعديش علينا بالساهل.. عارفة القصة اللي
 انتهت بجملة «مش هينفع» دي؟ القصة اللي قتلها واحد من الطرفين أو
 والأغاني.. لكن حكايتها الكبيرة مرة زي أي حاجة حقيقية..
 شفتي إن أنا بدأت أتكلم زيك، المهم كملتي إيه اللي حصل بعد كده؟
 - مافيش، فضلت ألف شوية كثير وبعد مدة مش فأكرة قد إيه وصلت
 الشركة عند إيهاب.. وفي وسط الشغل وأنا سر حانة لقيته بيسألني:
 - يعني المزيكا دي حلوة ولا سريعة قوي على المشهد؟
 - إيه؟ مش عارفة يا إيهاب.. حقيقي مش عارفة..
 - طب باقول لك إيه.. سيبك من الشغل دلوقتي.. مالك؟
 - من ساعة ما خدت الأجازة وأنا ما وصلتش لأي حاجة.. ما خدتش
 قرار.. مالمقيتش أحلامي اللي كنت باحلم بيها من سنين.. ما وصلتش
 حاجة خالص..

- أنا كنت متأكد..

- هو أنا محبكاها؟ هو أنا بافكر في الحاجات كثير؟ بابالغ في تحليلها؟

- إنتي لسه عارفة دلوقتي؟

- مش باهزر.. هو أنا المفروض أبطل تفكير. صح؟

- بالعكس..

- طيب أعمل إيه؟

- اتصالحي مع كونك إنسانة.. إنسانة، مش سوبرومان ومش المرأة

الحديدية.. إنتي عارفة انني محتاجة إيه كويس لكن بتقاوحي عشان صعب

تعرفني بشعور الاحتياج.

- جايز أنا بطلت أحلم عشان أحلامي ماتت حولش مع الوقت

ل(احتياج). شكلي كمان فقدت حلاوة الحلم..

- شكلك كده فقدت حلاوة العبط! مشكلتك إنك مصرة تثبتي للناس

ولنفسك إن الحب ده جزء من الحياة، جزء صغير وممكن نستغنى عنه..

والتي من جوارحي عارفة ومتأكدة إنه مش جزء مهم ده كل الحياة.. إحنا
نعيش بالحب ونموت لما ينطل نحب.. بنموت من جوا. باقول لك إيه،

هو إحنا إزاي مافكرناش نحب بعض؟
- أنا قابلت ناس خلوني أفقد إيماني بالحب، لو حيثك وحسرتك انت
كمان هافقد إيماني بالإنسانية.. تصبح على خير يا هوييا!
رجعت البيت.. طلعت الفستان والجزمة والحلق، وحطيتهم على
السرير.. أصل تافى يوم فرح (كاميليا).

صحت الصبح من بدري، صليت وحمدت ربنا إنه اذاني حاجات
كثير أهمهم ماما اللي فاجتني بفطار كبير ولذيذ: اطيب أنا راضية ذمك يا
أمي.. هو منطقي إن كل الناس مش مبسوطة في جوازها وكل الناس دي
بتحاول تخلي الناس اللي مش متجوزة تتجوز فيبقوا مش مبسوطين زعيم!
- المشكلة مش في الجواز.. المشكلة في إدارة (الترقيات).

- إزاي؟

- الجبل بتاعكم نوعاته عالية قوي.. اللي بتشوفوه واللي بتسموه
خلاكم فاكيرين إن الجواز ده جنة، أو العكس.. شايفينه بيع. لكن هولي
الحقيقة مرحلة، مرحلة لازم الإنسان يمر بيها.

- ليه لازم؟

- عشان لازم.. وفيه حاجات البالغة في تحليلها بتفقدنا معناها
وطعمها.. الجواز لازم، لكن لما نلاقي شخص مناسب وعشان نلاقه
لازم نفتح قلوبنا وإحنا بنبص وبنشوف.

- وفي الآخر نختر صح ونتجوز ونحصل مشاكل فتتعلق، مش كده؟
- المشاكل بين المتجوزين عاملة زي المطب الصناعي اللي في أول شارع
بيتا.. معمول أساسا عشان الناس تهدي السرعة وتركز في الطريق..
ومع الوقت بتعود على وجوده وينحفظ شكله ومكانه فيهندي واحنا
داخلين عليه.. مع الوقت كمان هتكتشفي إن المطب مهما كان ارتفاعه،
فيه حنة أو طي من الباقي.. لو عرفتي تشني عليها وتعددي من فوقها..
مش هيحصل للعربية أي حاجة.. قومي البسي عشان ماتأخربش على
صاحبك.

- هتيجي إمتى؟
- على ٨ كده.. تكونوا إنتوا خلصتوا تصوير.

ماكتش متخيلة إني هافرح قوي كده زي اليوم ده.. كل لحظة عشتها مع كاميليا كانت مميزة بالنسبالي. أول مرة أستمتع بفقرة ال(ميك أب) واحنا بتفرج عليها وهي كل شوية تسألنا «حلر كده؟». فرحت فعلا بساعتين التصوير في جنينة الفندق وماكتش متضايقه خالص من ال(فوتوجرافر) وهو بيقولنا ننظ في الهوا مع بعض واحنا بنتصور. دموعي نزلت من الفرحة لما شفت نظرة حسين لكاميليا لما شافها بالفستان لأول مرة.

خلصت الزفة ووصل إيهاب، لابس قميص وجاكت بدلة على جينز وجزمة رياضة، إيهاب أكثر كائن برنس في نفسه، ماييه موش لابس إيه ولا شكله إيه.. إيهاب أكثر كائن متصلح مع نفسه: «شكلك حلر النهارده يا لينة»

- ده تأثير ٢ كيلو مكياج وحوالي ٣ ساعات كوافير.
- مساكين البنات.

- إشمعنى يا إيهاب؟ خير؟

- البنات دماغها مسوحاها، تفاصيلكم كثير قوي والحاجات عندكم مكلكعة. خليني أقربلك الفكرة.. الولاد عموما دماغهم زي طريق صلاح سالم كده، خط مستقيم، اتجاه محدد، رايح بس أو جاي بس وفيه أربع أو خمس حارات جنب بعض.. كورة، شغل، فلوس، سهر، سفر، لغاية نقطة معينة ممكن يزودوا حارة، الحب، الجواز.. أما البنات فدماغهم عاملة زي ميادين المعادي، كل ميدان بيوديكي على ٥ شوارع يطلعوك على ميادين تانية لحد ما تتوه فيهم.. فتلاقي إن التفكير في الشغل يبسحلهم يفكروا في الجواز في الفلوس في الدايت في اللبس في الشعر في الشوينج.. كله داخل في بعضه..

- على الأقل بنفكر.. بنعقل الأمور.. بنهتم.

- ما حدش ينكر عليكم ده.. البنات فعلا بتفكر كويس وبتفكر كثير.. لكن الولاد تقريبا مابتفكرش خالص.. ده غير إنهم هلاسين بالفطرة..

عاوزين يتسطوا، عاوزين السلام.. عارفين هما عايزين إيه وشايلين من
دماغهم أي حاجة ثانية.

- تيجي تقوم نرقص شوية؟

- تعالي.

لمدة نص ساعة كنت باضحك من قلبي وإيهاب بيستمريض حركاته
الخرعبلية في الرقص والحضور بيتفاعل معاه. وبعد شوية سمعت حد
بينده على اسمي.. لفيت لقيته محمود المشد:

«شكلك حلو النهارده»

- شكرا يا محمود.. أخبارك إيه؟

- All is Good.. كله تمام.

- صحيح، مبروك انت ومايسة.. سمعت إنكم..

- ممكن نقف برا القاعة دقيقتين..

سبت إيهاب بيرقص مع الناس وطلعت أتكلم مع محمود قدام القاعة

بناءً على رغبته: «عاملة إيه في الأجازة؟»

- تمام.. بس خلاص بافكر أرجع الشغل.. وحشتوني بقي أعمل إيه.

- ماتحاوليش تصطنعي اللطف والاهتمام.. انتي قلتي قبل كده إنك

بتكرهيني واني بافكرك بيوم التلات. على العموم ارجعي شغلك وأوعدك

مش هاحتك بيكي ولا هاقرب منك عشان ماتضطريش تعيشي غير يوم

تلات واحد بس في الأسبوع مش كل ما تشوفيني.

- أنا مش فاهمة حاجة..

- ولا عمرك هتفهمي، اعرفي إنتي عايزة إيه وركزي.. مافيش حد دايبا

صح، ومافيش حد عارف كل حاجة.. ركزي في اللي بيعجرك حوالبيكي،

ماتسييش نفسك في الدنيا وتبقي (عايشة) آه بس مش موجودة. Good

Luck and Bye Bye

- كنت متأكد إنه معجب بيكي، وانتي كمان أظن كنتي عارفة ومتأكدة.

او عي يكون صعب عليك؟

- أبدا.. صعب عليا الحب.

- إزاي؟

- صعب عليا الحب اللي بيتولد في قلب شخص تجاه شخص مافيش جواه حب له.

- طيب ابراهيم وفهمناه، ماكتيش متقبلة فكرة إنه يخطط لوحده ويتعامل معاكي على إنك جزء من خطته مش شريكته لكن (عمود المشد) مافكرتيش تديله فرصة ليه؟

- عشان هي كده.. يا تيجي في لحظة يا ماتجيش خالص.. عمود فعلا إنسان كويس.. ده غير إن اهتمامه وإصراره المقروض يعطمن أي بنت مش يزيد لها قسوة وعنف في الكلام وفي التصرفات.. لكن اللحظة ماجاتش، وهي كده.

- طب وإيهاب؟

- ماله إيهاب؟

- شايفاه إزاي؟

- إيهاب، صديقي اللدود.. وقف جنبني كتير وساعدني كتير.. لما أفكره لازم أفكر مواقف صعبة، حالات وفاة، أزومات نفسية، مشاكل.. دايا شايل معايا همي.. مافتكرش مرة احتاجته ومالقيتهوش.. مافتكرش مرة اتصلت به وطلبت حاجة وقال لي: «مش هاقدر»، كان دايمًا الأخ والسند عشان إحنا صحاب بجد.. إيهاب ده أنا.. ضميري الصاحي، مرايتي اللي باشوف فيها عيوب السودا المكعبرة.. وبعدها يبصلي ويقول «سيك انتي.. كله هيبقى زي الفل».. إيهاب الراجل الوحيد المخلص ليا لوالد الدنيا كلها خانتني.

- ما حبيتتهوش؟

- ما حبيتش مين؟ إيهاب؟؟ حبيته طبعًا ويواجهه جدا لكن حب من نوع

مختلف.. حب من نوع ثاني.. وماقدرش أخسره.

- طيب وبعدين؟

- خلص الفرحة ورجعت البيت.. غيرت هدومي.. وقفلت تليفوني

واستغرقت في نوم عميق.

صحيت الصبح بعد ليلة هادية دخلت أنام فيها وأنا مقررة إنني هارجع

الشغل من بكرة. صليت وحمدت ربنا إنه اداني يوم جديد أعيشه، ومن غير ما أفطر ولا أعمل أي حاجة نظيت في الجينز وضربت نظارة الشمس ونزلت من البيت لقيت عم ناجح بيغسل عربية إبراهيم: «إيه النشاط ده كله يا عم ناجح؟»

- الدكتور إبراهيم موصيني أغسل له العربية أصله رايح يخطب الليلة!
عجبالك يا ست الكل عجبالك!
- متشكرة يا عم ناجح.

مشيت وأنا باقول لنفسي النهارده هيبقى يوم جميل.. أو على الأقل أنا باثني ده. وصلت الشركة ودخلت من الباب، صبحت على أمين وعادل، رجال الأمن الشرفاء، وأخيرا وصلت مكنتي. وبعد شوية، جالي تليفون صباحي مفاجئ:

- إنتي فين؟

- في الشغل.

- يا سلام! ويا توى وصلت لقراراتك (المصيرية)؟

- باقول لك إيه يا إيهاب أنا النهارده بالذات مش حمل تريقة وحياتك!

- طيب بالراحة بالراحة. ممكن تعدي عليا في الشركة بالليل؟ عاوز

أفرجك على حاجة.

- ماشي. سلام دلوقتي.

وبين الاجتماعات والإيميلات واللي واللي، عدى الوقت بسرعة والساعة ٦ بالضبط، قفلت اللاب توب وملت حاجتي ونزلت جري متجهة لشركة إيهاب:

- حلو قوي المشهد ده. فعلا حلو.

- بجد عجيبك؟

- عجيني جدا يا إيهاب. إنت عبقرى!

ضحك وقام قفل الشاشة اللي كان بيفرجني فيها على المشهد وبعدين قرب من الكرسي اللي كنت قاعدة عليه ونزل على نص ركة وقدامي وقال لي: «ممكن بعد إذنك تستيني عشر دقائق بالضبط.. فيه ناس معايا في أوضة الاجتماعات هاخلص معاهم وأجيلك. ينفع أعزمك على (كراميل

مكيانو) من ستاريكس؟ عاوز أتكلم معاكمي في موضوع مهم.
 خرج إيهاب وسابني في المكتب اللي تفاصيله كلها متنقية بعناية، من
 أول الجوايز اللي مخطوطة على الرف تحت شهادات التقدير اللي متعلقة
 على الحبطة لغاية مكتبة الكتب والأفلام الضخمة اللي تجذب أي مدمن
 قرابة وسينما زي حالاتي. وفي وسط كل ده، لقيته لسه محتفظ بالصندوق
 الأبيض في اسود الكبير اللي كنت جاياله فيه هدية لما أخرج أول فيلم
 قصير في الكلية، وحاطط الصندوق في آخر رف فوق في المكتبة. عرفت
 الصندوق من أول لحظة أصله صندوق مميز عليه قصاقيص من أفشاش
 الأفلام القديمة. ماخبيش عليك، الفضول كلني وحسيت إن نفسي أفتح
 وأشوف إيهاب حاطط جواه إيه.

ولما فتحت لقيت توكة شعر وقعت مني أول يوم جامعة وكشكول كنت
 باشخبط فيه في محاضرات الصحافة وأول (سكربيت) مسرحية مثلت فيها
 على مسرح الجامعة ومناديل كتير من ستاريكس وكتب اشترتها لإيهاب
 في مناسبات مختلفة خلال الخمستاشر سنة اللي فاتوا وحاجات كتير كلها..
 بتاعتي.

حاجة خلتنني أقفل الصندوق فوراً وخذت شنطتي ونزلت جري
 وسقت بلا هدف. معقول يكون الحب قدامي بقاله ١٥ سنة وأنا مش
 شايفاه؟

بس (إيهاب) ده صديقي وصاحبني، أنا صاحبه الذكر زي ما هو
 يقول. ما يمكن هو؟ إيهاب حافظ تفاصيلي وعارفني يمكن أكثر مانا
 عارفة نفسي. وأنا كنت هاعرف مينين؟
 ويمكن مش هو؟

يمكن الحب الحقيقي هو (محمود المشد)؟ جايز أنا كل ما كنت باصده
 وبارفض أتكلم معاه ولا باديله فرصة يقرب مني كنت بابعده خطورة عن
 (القدر)؟ جايز خوفي من الارتباط هو اللي خلاني أشوف فرق الكام شهر
 في السن اللي بيننا حاجز كبير بأتحجج به قدام نفسي؟
 وليه ما يكونش حب حياتي هو (إبراهيم)، وعشان كده جوازته
 مانفتش مع مراته الأجنبية ورجع مصر يدور عليا بعد عشر سنين؟ جايز

القدر هو اللي خلاه يرجع، جايز القدر هو اللي خلى طنط زي زي تسكن في
 عمارتنا وتبقى صاحبة ماما أصلا؟
 ولا يكون (كريم)؟ والمرة دي عرف قيمتي وحس قد إيه كان سطحي
 ودلوقتي عاوز فرصة جديدة؟
 جايز حب حياتي كان (علي)، أطيب وأكثر إنسان جبني وكان عييه
 الوحيد إنه مستعد بزيادة في وقت أنا مش مستعدة فيه أبقى مع أي حد
 غير نفسي.

لأول مرة أحس إن أنا اللي محتاجة النصيحة، محتاجة استشارة عاطفية،
 محتاجة أفضفض.. لأول مرة أحس إنني ولا حكيمة ولا نيلة، أنا عيلة
 صغيرة تايه وخايفة وعاوزة حضن، عيلة في ابتدائي عاوزة أترمي في
 حضن دافي أستخبي فيه من الدنيا ومن نفسي:

- ألو، ماما.. إنتي فين؟

- في البيت.

- طيب قومي البسي.. هاعدي عليك، عاوزة أتكلم معاكمي شوية.
 خدت ماما من عند البيت ومن غير ما نتكلم ولا كلمة، فضلت سايفة
 لحد ما لقيت نفسي قدام قهوة صغيرة و(مخدقة) كده وشكلها من برا حلو
 قوي، نت دايميا باعدي من قدامها وأقول «في يوم من الأيام هاجرب أقعد
 في المكان ده» لكن ولا مرة حاولت.

- تحبي تقعدي هنا يا أمي؟

- غريبة.. أنا كنت مستياكي تودينا ستاريكس. أحب طبعًا، خلينا
 نجرب حاجة مختلفة مش هنخسر حاجة.

بالصدفة لقيت ركنة قدام المكان، قدام الباب بالضبط، عارف إنت
 المكان اللي يسموه (ركنة صاحب العمارة)؟

خدت ماما ودخلنا القهوة، طلبنا كيكة واتنين شاي أخضر:

- عملتي إيه في الشغل النهارده؟ ماشي الحال؟

- تمام الحمد لله. إزاي الكيكة دي حلوة كده؟

قالتلي: «حلوة قوي فعلا، والمكان جميل، مريح. لازم الواحد يجرب،
 لازم يطلع من الحتة اللي حابس نفسه فيها ومش عاوز يشوف الدنيا غير
 من خلالها.. لازم يجرب لازم يحاول.

سكنت شوية وبصتلي بصة عمري ما هانساها، نظرة كلها قلتي وخوف.
 لي اللعظة دي حسيت فجأة إني صغرت خالص ورجعت طفلة عندها
 خمس سنين: «إنتي كويسة يا ماما؟»

- لا طبعا مش كويسة، طبعا مش كويسة، مش كويسة طول ما أنا
 شابقتي كده. إنتي مهمومة، مهمومة قوي وحزينة.

- أنا فعلا مهمومة، مهمومة يا أمي. إنتي صحح، الواحد لازم يطلع من
 الحنة اللي حابس نفسه فيها ومش عاوز يشوف الدنيا غير من خلالها، فيه
 حاجات بتحتاج نطلع من مكان الراحة، من الحنة الأمان، فيه حاجات
 مش سهل توصل لها للمجرد إننا غيرنا جو مثلا في خروجة حلوة أو سفرية
 أو بعد يومين أجازة أو حتى شهر.

أنا كنت في الأول بادور على حاجة.. عارفها كويس لكن بالكذب
 على كل الناس وأولهم نفسي.. بادور عشان أكسب وقت، عشان خايقة،
 خايقة من الوحدة، خايقة من الروتين، خايقة من يوم أسأل نفسي فيه «هو
 أنا ضيعت عمري في إيه»، أنا بدأت الرحلة بادور على نفسي وعلى هدف
 وخلصت الرحلة وأنا لسه مش عارفة حاجة.

- ومين قال إن ده غلط؟ ومين قال إننا لازم نعرف أول ما ندور.
 مش عيب ندور ومانلاقيش، كفاية شرف المحاولة والتجربة. أهم حاجة
 ماتخافيش، جربي وحاولي مرة واثنين وتلاتة.

*حضرات السادة الركاب.. تستعد الطائرة للهبوط التدريجي في مطار
 محمد الخامس الدولي. من أجل سلامتكم، يرجى البقاء في مقاعدكم *
 - على فكرة، أنا ماقلتلكش كل الحقيقة لما سألتني عن الخوف.
 - عارف.

- عارف إيه؟؟ عارف إني خايقة من كل حاجة؟ عارف إني خايقة
 قوي؟ عارف إني خايقة من الحياة العادية، حياة اللاسلم واللاحرب، حياة
 عايشاها مش مبسوطة ومش زعلانة؟ عارف إني باخاف في يوم أشوف
 أحلامي بتجري مع السنين وأنا مش عارفة ألحقها؟
 خايقة أختر غلط وأندم..

خبايعة أنجوز عن حب وأنجان،
 أو أنجوز من غير حب ومايقاش مبسوطة..
 شايلة هم الفشل و شايلة هم النجاح..
 - ومين قال لك إن إحنا كمان مش خايفين؟ ومين قال لك إن الراجل
 مايبخافش؟ الراجل كمان شايل مليون هم على هم الحب والجواز..
 شايل هم الالتزام.. شايل هم المسؤولية..
 شايل هم اختياره.. شايل هم قراره..
 شايل هم يخليه يشيب وهو لسه شاب..
 شايل هم عياله اللي لسه ماخلفهمش ومش عاوزهم يتربوا في بيت هو
 مش فيه..

لكن زي ما فيه قصص فاشلة تحيب إحباط، فيه قصص نجاح كلها
 أمل وتفاؤل.. زي ما فيه نار فيه جنة.. زي ما فيه مرض فيه علاج..
 جايز شوية الانفلونزا دول هما اللي بيفكروا الواحد قد إيه الصحة
 مهمة.. جايز قلة الفلوس هي اللي بتعرف الواحد قيمة كل قرش وكل
 جنيه.. جايز الناس الغاظ اللي بتقابلهم في حياتنا.. هما اللي هيخلونا نعرف
 الطيبين أول ما نقابلهم ومانبعدش عنهم أبدًا..
 الحاجات المؤلمة بتخلينا نمسك في الحاجة الحلوة لما تيجي ونفرح بيها..
 نفرح بيها قوي..

أنا ناوي أكون زوج كويس، ناوي أصون مراتي وأخلصلها، ناوي
 أعمل بيت يكون مصدر سعادة ودفا لكل اللي فيه.. أنا هابقى أب كويس،
 أنا ناوي أكون أب كويس، أنا عاوز أصعبها قوي على أي واحد عاوز
 يدخل حياة بنتي.. مش عاوز أخلي في نفسها حاجة أو ناقصها حاجة تدور
 عليها برا.

أنا عاوز أجيب بنت شبهك بالضبط، عاوز بنتي تبقى نسخة منك.
 إيه؟ سكتي ليه؟

انتي من سنين هربتني لما حسيتي إن اللي بيتنا ممكن يكبر وإني مهم
 أقرب منك، والنهارده الصدفة جمعتنا تاني من غير ميعاد، ماينفعش
 نتجاهل القدر، ماينفعش نغمض عينينا عشان مانشوفش العلامات.

إدي نفسك فرصة، وإديني أنا فرصة أثبتك إن النجاح هو القاعدة
والفشل هو الاستثناء.
- انت بتقول إيه؟

- باقول اللي سمعته، إنتي بتدوري على نفسك وأنا برسو بادور. تعالي
ندور سوا. مش جايز نوصل؟

- إزاي حد لسه بيدور على نفسه زبي يربط مصير حد تاني بيه؟
- مش جايز تلاقي نفسك معايا؟ ساعات بتلاقي اللي إحنا محتاجينه في
المكان الوحيد اللي مافكرناش ندور فيه. بصي كده من الشباك، حمد الله على
السلامة.

- كازابلانكا، أجمل مدن العالم.. فيه قوة خفية كانت بتقول لي أسافر
البلد دي، في التوقيت ده، وأركب الطائرة دي، دي بالذات. يومها فلتلها:
أمي..

أنا قررت أسافر..

أنا عاوزة أسافر..

- جايز القوة الخفية هي اللي وصلتنى للكرسي اللي جنبك عشان أفاهلك
وما بعدش عنك تاني أبدا.
- جايز..

- ماقتيليش صحيح، إيه هي الحقيقة رقم عشرة؟

- مش هتصدق، الحقيقة رقم عشرة بتقول:

«مش عيب إنك تدور وما توصلش.. مش عيب إنك تعيش سنين
تدور.. هتوصل.. في يوم من الأيام أكيد هتوصل، أهم حاجة..
«استمر في البحث».

- يبقى لازم ندور. هاشوفك النهارده بالليل؟

- لو كنت سألتني قبل كده أكيد كنت هارفض لكن دلوقتي هاقول لك
أيوه، خلينا نتقابل، خلينا ندور سوا ونشوف السكة هتوصلنا لإيه..

حضرات السادة الركاب، هبطت الطائرة بحفظ الله ورعايته في مطار
محمد الخامس الدولي بالدار البيضاء، والساعة الآن الحادية عشرة صباحا
بتوقيت المملكة المغربية.

تم بحمد الله

القاهرة في ١٥ مايو ٢٠١٦
الساعة ٠٣:٠٠ ص
سها الفكري

الحقائق

- الحقيقة #١: الأحلام كثر والي عنده هدف أحسن من الي عنده فلوس.
- الحقيقة #٢: ماينفعلش حد يمسك القلم ويكتبلك قصة حياتك، ماينفعلش العالم يحدد مصيرك.
- الحقيقة #٣: لازم نستمتع أكثر بالناس الي حوالينا.. نستمتع بوجودهم، ساعات مايبقاش فيه مرة جاية.
- الحقيقة #٤: الجمال جمال الروح والروح مالهاش وزن.. الجمال عمره ما كان رقم.
- الحقيقة #٥: ماينفعلش تدور على شخص تحبه وانت لسه مش عارف تحب الشخص الي انت شايفه في المرآة.
- الحقيقة #٦: مايفش حد مانفسوش في الحب، بس فيه حد اتعود يستغنى.
- الحقيقة #٧: مش كل الرومانسية قصص حب، فيه جرعات رومانسية رهيبة بتيجي من الصحاب، الصحاب الي بجد.
- الحقيقة #٨: الأحلام ساعات بتأخر بس في الآخر هتيجي.. هتيجي.
- الحقيقة #٩: مش المفروض البنت توقف حياتها وتجري ورا الفارس أبو حصان.. المفروض تجري ورا أحلامها والفارس هيجي في ميعاده ويجري جنبها مش قدامها.
- الحقيقة #١٠: مش عيب إنك تدور وماتوصلش، مش عيب إنك تعيش سنين تدور، هتوصل.. في يوم من الأيام أكيد هتوصل، أهم حاجة «استمر في البحث».